

# 臨河縣志

署 涿鹿呂咸



地 520.215  
42

部 2:1-3

30164

共 3 冊



序

中國之富源在西北西北之富源在河套河套之上游在臨河其勢山河礪帶其地渠道縱橫其田土沃泉甘宜墾宜牧宜農林孕於山金可冶鈞於水鮮可茹北通庫蒙西控甘新商路交匯梯航雲集誠實業之奧區兵防之要塞亦即政治家所謂肇造新邑式廓爾宇者矣所患者漢唐變遷遼夏沈陷滄桑迭經華夷遞嬗甚至終明一代地不內屬委官書於駝棘夷私史於蟲沙值此遺文落落墜緒茫茫欲舉二千年來文物典章抱殘守闕補苴掇拾已非易易矣况乎地限蒙荒碑碣莫考俗染僿野采訪無人且茲事體大借非有宏識通才熟於當地情狀者恐率爾操觚非等於鈔胥即類於簿記又何以言之親切有味以述往古而示來茲此縣志之修誠不可一日緩已 沛生先生東魯經生西川循吏芳漱百籍體擅三長生平足跡半國中閱人最夥歷事最多析理最精晚年治套日久其於河套之實業兵防政治過去之成迹將來之大計罔不洞若觀火持之有故言之成理又值解組借廬條然物表名山著書適當其時邑人士羣以總編纂一席屈 先生 先生鑪錘在手矩矱從心凡

臨河縣志

卷一

序

一

無關體要者可略則略之凡有關體要者可詳則詳之 先生之心可謂精矣時而探險繼幽掃苔剔蘚時而兀坐仰思提要鉤元 先生之力可謂勞矣前不及見古人後可以待來者以一心運之以一手成之青林黑塞鼓吹文化誠不愧朝陽鳴鳳矣是編歷十有四月而告竣其中幾經挫折幾經盤錯幸賢明紳耆排衆議破羣疑始終堅持而不懈黃前局長所謂天下無一蹴而就之事誠有味乎言之也 保莊 庚午四月來臨適值是編編纂功甫及半凡可以輔助進行者不惜出全力以維持之今幸告厥成功吾知發展西北之碩畫當以是編擬爲張本也是爲序

中華民國二十年二月上浣

臨河縣縣長靈邱白保莊叙

序

民國初元咸於北平外部得讀潘總裁河套水利計畫書簡端盛述五原王知事沛生政績特詳咸日嚮往之未嘗一日忘之也十六年春咸在綏適拜

總辦綏西水利之命於歸化旅邸得交沛生先生快慰饑渴就詢河套水利實業及地方利弊罔不口道指數洞中竅要蓋先生治套最久其富有經驗者然也六月咸復奉

兼攝臨河設治局局長之命咸初學製錦佐紱需才強起沛生先生爲指南助聯翩蒞臨先生擅長文學老於吏事出其緒餘遂令因地制宜百廢具舉古訓所謂爲政在人者歟冬十月奉

廳令催修縣志咸維臨河南襟秦晉北控蒙疆東翼包綏西通甘涼大河弦貫陰山弧張泉甘土沃隱曜含光誠西北之奧秘亦并冀之金湯所患者漢唐郡縣省併無方遼金州邑廢置失常終明一代淪陷遐方尋勝址於駝棘驚世變於滄桑徵獻則故老零落考文則碑碣銷亡采風者臨流却退問俗者中道傍徨將欲考古耶二千年華夷代嬗棼如莫紀將欲證

臨河縣志

卷一序

一一

今耶數十載風雲滄洞語焉不詳况開局修志茲事體大地方民窮財盡經費不充一難民陋俗僿采訪無人二難檔案劫灰參考失據三難當是時卽有文效龍雕才稱獺祭強起操觚而能述而不能作亦鈔胥而已能作而不能擇亦簿記而已是非心通百籍體備三長惟規時而審始勢網舉而目張總編纂一席非沛生先生其誰與歸在全體事經公推在先生理無反顧案定上聞邑人士延頸企頸以爲不朽盛業指日可成矣何期咸適以病去官繼任者爲 沛生先生先生宵旰勤政日不暇給修志事遂至中止咸於十七八年服務北平以郵筒屢促臨紳嗣以地方多故稽延不報皖鳳黃局長碩甫晉北彭縣長進吾先後來攝邑篆迭奉

催修縣志之令爰乃根據前案召集邑紳議定於十八年十二月十日開局修纂先生走函索請咸任內收回黃土拉垓河教堂地原檔按是案成於有清末葉爲我北方外交最痛心之事咸於十六年兼攝水利地方兩篆迭次上請收回幸

綏政府始終堅持俾咸得以貫徹宗旨迄告成功是役也渠長百餘里地逾千餘頃完全收

歸國有光我故物張我主權上托

政府之威靈下恃固結之民氣周旋壇坫幸無隕越亦何功之有筆諸志乘聊以誌雪泥之印則可若鋪烈揚休則非咸所望於先生者也天下事莫大於創始莫難於窮荒先生處窮漠絕塞人文零落之區既無左圖右史供其蒐采又無鴻儒耆宿相與參稽三更螢案半榻蠹編孜孜惟日矻矻窮年先生可謂獨任其重者矣是編大旨略於述古詳於證今疎於考據翔於事實紀現在之狀況策將來之進行作鄉土志觀可也卽作河渠貨殖農林諸傳記讀亦無不可也嗟乎士君子得志則展其所學不得志則筆之於書青林黑塞惠我好音黃沙白茅遙託逸響後有作者引而長之恢而張之亦先河後海之例也是爲序

民國二十年四月上浣

臨河設治局局長涿鹿呂咸序

臨河縣志

卷一序

三

序

地方志書何爲而作也古之人察天地窮古今進退廟堂遨遊里巷眺覽山水考摹金石境之所觸寄之於情情之所托宣之於言故於物有志於人有志於事有志於志其不忘而已彼夫博引繁稱一鈔胥足以充之鏤金刻名一博士足以爲之藻績山川吟嘯風月一華士足以任之簡端縱有千言胸中實無一得以此言志可以陶情而不足以經世可以行近而不足以致遠歷觀古天文志五行志食貨志職方志豈第以空文自見哉此中有史法焉凡以有本有文之體隱厲可法可我之意而已其在省曰通志在郡曰郡志在縣曰縣志大而疆域之險易田野之經界河山之阨塞城邑之建置河渠水利之沿革原隰土會之肥磽戶口比較之登耗教育之興廢財賦之盈虛以至墾政鑛政牧政農政林業商業工業下而社會之習尚鄉里之風教舉莫不有志志也者原始以要終察來以彰往凡有關係於地方治要者筆則筆之凡無關係於經國之大體治世之遠謨者削則削之夫然後始可與言修志

彥邦 十八年蒞臨之時正

臨河縣志

卷一 序

四

政府催修縣志之日考西漢臨河縣隸朔方郡郡領十縣至光武時已省併臨河諸縣爲西河郡臨河之名在東漢初已省併不復見且其地歷六朝隋唐以迄於金元忽夷忽夏旋廢旋興甚至終明一代地不內屬勢成中斷臨河舊址徧考典籍莫能確定此地理上無可徵信者一也伊古經邊大政莫詳於漢而漢書所載惟徙民十萬戶以實之一語其他設防固圉經田養民立教化俗諸大計均闕而不詳此政治上無可徵信者二也不第此也地染蒙俗文教未敷書沿亥豕之訛文襲魯魚之謬採訪乏人三難浩劫迭經民窮財竭膏薪莫繼四難然此猶未極其難也非熟習當地之經過歷史不能始終條貫非洞燭當地之目前情狀不能本末兼賅此編纂人選上難而又難者也用特召集全體紳董往復討論公推前五原縣知事臨河設治局長王沛生先生充任總編纂先生以魯西名宿爲塞北循吏博學通識物望攸歸兼以治套日久全局情形瞭如指掌紳董全體修贄請教先生遜謝不遑蹙然弗敢任是時紳董等前席請曰地則棘荆初闢時則典冊中湮古無可考莫如述今往不可彰莫如察來可詳者詳之可略者略之可刪者刪之可增者增之只求有開之必先何慮無

徵之不信不先不後先生會逢其適惟願出其緒餘成此盛業有光下邑多矣先生鑒於羣情之迫切勉從其請嗣彥邦於十九年秋解組去官繼任者爲彭君進吾亦勤政愛民關心文化之良吏也彥邦去之日諄諄敦請俾引其已敗之緒卒成此不朽之業未幾果於是年十二月開局編纂郵書見告彥邦欣欣色喜深幸後來者居上相與有成也夫天下事一蹴而就者百不獲一尋常建一策謀一事其中不知經若何波折歷幾許盤錯而後成輕且易者尙如此而况振文化於荒徼尋墜緒於劫灰爲舉世所不經見之事重且難者又如彼乎然而沛生先生且不畏其難也且力任其重也官與紳又始終貫澈通力合作而有意竟成也於以見天下事無不可爲西北文化將於是書爲權輿矣是爲序

中華民國二十年三月上浣

臨河設治局局長鳳陽黃彥邦撰

臨河縣志

卷一

序

五

序

客有問於余曰臨河有可志乎曰古無可志今有可志也古何以無可志曰文不足徵獻不足徵此其無可志也今何以有可志曰宏規日肇庶政日新此其有可志也閒嘗登高遠望見夫陰山弧張大河弦貫渠道縱橫濠塹天限卽軍事家之所謂要塞也又見夫嶽峙淵渟包孕富有泉甘土肥百彙胎胚此政治家之所謂奧區也又見夫涼夏新蒙經緯商路千流沾漑綺交脈注大利所在農林墾牧此實業家之所謂天府也噫嘻中國之大勢在西北中外人士遊歷調查企圖開闢而發展之者其在斯乎然其地經漢唐建置當年締造經營燦然大備何意今古代謝華夷遞嬗簡斷篇殘風微人往古人之所謂樹榆爲塞立障限夷設墩置屯之遺與夫立郡置邑敷政立教之要或搶攘於烽煙或銷沈於草萊卽有學優括地才裕畫山之輩亦無由叩寂聘虛鑿空逞臆也雖然往者不可追來者猶可紀周原猶是禹甸依然撫此山川阨塞之形勝疆里分合之經界河流墾植之成迹其中之流者峙者經者畫者登耗者損益者卽此數十年來之事實已足資後來者千百年之借鏡倘

臨河縣志

卷一

序

六

漫不注意略無紀載恐過此以往天道日遷人事日變并此已成之局又隨風雲星霜以俱往後世之軍事家政治家實業家更欲徵信而無由西北益無開展之望此其關係非淺鮮也同仁等有見於此又奉

政府催修縣志之令幸值我 沛生先生駐旆是邦歷有年所 先生三長備體百籍漱華早歲入貢木天壯年贊襄秘席治套最久對於當地之利病得失風土習尚以至地方將來之因革大計罔不灼然於心了然於口當是時也誠可謂難得之機會不再之遭逢矣同仁等再三敦促羣以總編纂一席屈先生 先生辭不獲已於十八年十二月十日呈准立案開局編修亦知滍潯之水不足潤龍文棗栗之儀不足噉鳳羽第以我 先生此邦與穀不忍重違羣望不得不慨任其難力任其重如此用是周諮屑焦旁搜腕脫登狼山而左右顧月落受降之城引大河以南北流雲迷高闕之塞風霜雁磧燈火螢窗墨枯雪甌毫禿霜頽計時歷三十六旬始斐然成編煌煌鉅製炳炳鴻篇先生以一心撰之以一手成之志益苦力益劬矣甘棠樹畔重結文字之緣大榆塞邊再印雪泥之迹後有作者弗可諉矣謹序

中華民國二十年四月穀旦

臨河二區區長李增榮三區區長陳占財四區區長楊春林傅正業全撰

臨河縣志

卷一序

七



序

作志難作志於窮荒絕塞人文寥落民智否僂之區則尤難作志於風微人往時易勢殊華夷代嬗典物銷沈之目則難而又難雖然天下事惟其萬難措手其相需也愈見其迫不能待急不容緩此其中有三要焉開嘗度陰磧踰狼山登高望遠訪榆塞於窮崖蒼烟浩莽尋長城之片石翠靄飄零求古人之何以設堠立燧置屯分戍者渺焉不可復覩至後世所謂渠道縱橫可以限戎馬山口糾紛可以用間伏而既無精密之測勘按圖可索又無明詳之紀載一覽而知據天然之形勝莫知道從此兵學家所以頽然氣沮原望示我以要塞者也此志書之關係於兵學者一按漢書朔方郡治縣十臨河隸之至東漢光武初季已併臨河五縣改隸西河郡在西漢之初其經田立學通商惠工締造經營安邊殖民之大略必至詳且備惜書缺有間後世無傳近代別開生面所謂墾植水利教育農林諸大政次第舉行或略有端緒或已兆萌芽究竟其損益因革之故得失向背之機第據官府成案其缺者儼同殘篇其完者直如簿記惜無通達治體者爲之彙其全而挈其要此政治家所以嗒然神喪

臨河縣志

卷一序

八

亟望示我以方鍼者也此志書之關係於政治者二按漢置朔方郡當時移民實邊必爲之飭材訓農經商勸工擘畫實業所以裕民生而阜民用者無所不至西漢去古未遠當能以九職各執其事各精其業其獎勵實業者亦必秩然有序燦然大備惜時勢變遷經二千年代興代替地方日淪於腥氍民生日委於草萊近年墾務肇興河套重闢千里平原萬頃沃壤全國人士挾重貲踰險阻間關奔走相顧而言曰西北實業奧區其在斯乎究竟目前經畫之成績將來預定之成算其愚者習焉不察行之不著其智者知之而不能言言之而不能盡此實業家自崖而返半途而廢亟望導我以正軌者也此志書關係於實業者三具此三要地方之亟需志書也既如此而雁磧草黃文人返駕龍沙林黑學士廻車修志之人選相需殷而相遇疎也又如彼此所以屢奉令催修志官紳日夜籌謀詢謀僉同總編纂一席群口交推我 沛生先生決非異人任也 先生東魯名宿入貢優選廷試高等銓次蓉垣歷官川魯冀燕朔方歷職幣制鹽莢運輸身親民社廻翔樞垣於萬幾百政舉得其治要又歷覽名山大川東涉秦嶽西登華峯憑陵虎牢肴函鳳嶺褒斜劍閣之奇游攬三峽荆門

金焦及東溟諸島之秀於水則踰大河渡長江游渤海歷地則得見三都兩京城關闕隘之雄壯市廛商場之富麗於人則日與名公鉅卿文士大夫遊聆其言論風采因已極天下之大觀平生之壯遊已况乎生平治套最久其據孤城以抗強虜出談笑而應梟帥日在驚風駭浪之中不摧保境安民之志其對於當地墾政農政林政及水利牧畜礦產教育與夫保衛兵防戶口物產諸大計罔不挈其綱領通其要竅又况博通百籍才擅三長本其素所蓄積筆之於書著之於篇其必有有條共貫斐然可觀者斷斷然矣至於地當邊遠既無通儒碩彥供其采訪又無五典三墳相與參稽更無斷碣殘碑華表蠹簡備其探索而考證此真所謂含尺素而旁皇操寸觚而却退者矣先生獨慨然力任其難非第爲副衆望應羣請正有見於西北開闢正在此時若任其漫散無紀恐過此以往將此時已成之局及將來改進之計畫後有作者雖欲徵信而無由也是編先生以一心撰之以一手成之三更燈火五夜星霜手披腕脫口吟舌茶神敝氣索不敢告勞其大旨略於論古詳於述今刪其冗繁翔於事實傳云履而後知其難又曰知之匪艱行之維艱而先生且不畏其難也且力任其難也

## 臨河縣志

### 卷上

序

九

上足補書官所未及下足啟文化於來茲豈曰小補之哉是爲之序

中華民國二十年三月下浣

前臨河設治局局長晉代王績世拜撰

序

間嘗走通都過大邑攬其田疇經界而其地方之廢治可知也察其戶口多寡而其民生之登耗可知也遊其鄉校而知其學風之秀野焉入其市廛而知其市政之良窳焉觀其山川阨塞而其兵防之得失可知也探其河渠經畫而其水利之廣狹可知也然不有以紀之誰從而稽之不有以徵之誰從而信之况當地處遐荒人文墜廢倘登紀未有成書雖有目極八荒神遊六合上下千百年之心究無以觀其異而辦其同此地方志乘之纂修誠不可一日緩矣士君子操觚登壇幸而遇繁盛都會亦或居水陸通衢左圖右史恣我參考鴻彥魁儒供我諮詢華表豐碑任我摩挲紫崖丹穴備我縑索如八珍羅筵如萬寶列市但使抽妍而騁秘即可扼要而提元是亦作者之幸會文人之極遭矣若乃地限絕塞境囿遠荒訪古城於遼夏尋遺址於漢唐穴城社於狐兔踐碑碣於牛羊狼山冷月龍蹟斜湯灰沈鐘簷翠埋攙槍任華夷之代謝失中外之大防徵文則簡篇零佚考獻則故老銷亡悲遺文之落落悵墜緒之茫茫於是時也課虛則寂鑿空則荒臨鉛丹而趨起裁尺素而旁皇此志書總編

臨河縣志

卷上

序

一〇一

纂一席文璣所遜謝不遑者也於時官紳前席請曰處聲教闕寂之地值人文墜落之時搜金石於劫灰燕然之銘功何處夷金湯於荊棘受降之城址何存事經久而失傳言無徵而不信臨河修志誠有倍難於他邑者雖然事莫難於創始功莫大於開荒我臨河爲西北奧區包綏屏障天然形勝於政治上軍事上實業上久爲中外人士所注目况當興復伊始建設方張幸大難之初平維百度之更新又值我先生久治茲土漫天樾蔭匝地棠甘其戀戀於此邦而不忍去也已十六年於茲矣上而興廢沿革之歷史下而風土人情之狀況莫不目覩能紀耳熟能詳况值借塵以息影正可閉戶以著書時不可失機不再來先生即不爲一身榮名計獨不爲地方文化計乎至於古無可稽莫如述今往無可鑒莫如彰來先生心通百籍體擅三長高下從心鑪錘在手但令有當於體要何必拘守夫叮畦先生其勿固辭以重違羣望也文璣辭不獲已於十八年十二月十日開始編纂文璣三邊下吏一介書癡學殖就荒立言有愧况值此交通梗塞則質辯何從圖冊凋殘則蒐討不備疊序草創則采訪無人備膺夫特別之困難不得不爲特別之取裁於是苦志覃精澄思渺慮略於考據詳

於事實刪其枝葉存其根要規時事以立言絕非臆造去繁條以扶幹不尙鑿空其大旨以  
略述過去陳迹詳紀現在狀況預策將來進行上以副國家發展西北之遠略下爲都人士  
建設振興之張本治絲先引其端治水先濬其源是編特濬源引端之意也後有作者引而  
愈長濬而愈宏可也是爲序

中華民國廿年四月吉日前署理五原縣知事臨河設治局局長東魯古任王文墀撰并叙

臨河縣志

卷上

序

一一

序

庚午冬月臨河縣志編纂告竣 沛生先生囑序於信並囑爲之校訂而釐序之信才識淺陋學殖就荒近年謀食四方硯田日蕪於茲又十年矣丙寅歲負未來套從事農業時則有冀豫齊魯諸同志如田君鞠人皮君鶴年楊君禮軒張君海瀾房君魯泉許君俊英接踵雲集企圖實業農隙促膝斗室相與上下其議論僉謂臨河踞西北上游不惟爲實業奧區卽政治家軍事家周歷山川縱覽原隰莫不以爲設防立屯興養立教之根據所患漫散無紀無鴻篇鉅制備載過去之事實現在之狀況及將來進行之規畫既無以辨其異同卽無以得其體要嘗以是說貢諸 沛生先生亦頗踴其議惟慮茲體事大非私家所能擔負也先生爲東魯名宿經濟文章焜耀鄉邦生平足跡幾徧海內其閱人之多歷世之久於人情世變如燭照計數治套最久歷變亦最深在驚濤駭浪之中不改保土安民之素於後套歷代軍事政治實業利病得失因革損益罔不成竹在胸鉤元提要持之有故言之成理惜時與願違不得竟其所施戊辰秋臨篆解組清風兩袖明月一廬課子閉門絕口不復譚時事同

臨河縣志

卷上

序

一一一

仁等追隨先生咸以先生爲指南導蓋其誘掖後進熱誠相感者深也已已春縣府迭奉

纂修縣志之命官紳合詞推重 先生先生辭至再謂臨河爲西漢朔方舊治至東漢已省併無存一切掌故均已散佚事則無典籍可攷物則無碑碣可据人則無鴻儒耆宿可供諮訪如斷港絕潢無從引濬如枯木萎苗無可生發徵實則虛鑿空則荒余所以遜謝不遑者以此之故信與同仁等前席請曰道在因時文以隸事可略則略可詳則詳可筆則筆可削則削古無可考證以今可已往無可彰鑒諸來可已嗣又重以官若紳之環請 先生始勉任總編纂一席案上定日開辦孜孜終日矻矻窮年半榻蠹編三更螢火既澄思而渺慮復騁秘而抽妍以一心運之以一手成之先生力任其重而不辭其重也先生備歷其難而不畏其難也是亦先生對於地方文化與發達地方之大計以全力貫注之苦心也士君子有經世之志有經世之具而不遇其時機不得已發爲文章傳諸當世質諸後來此則關心西北大局者所延頸企踵爭先快靚者也謹序

中華民國二十年三月上浣 東魯桓臺耿秉信叙

臨河縣志凡例

(一)西漢臨河舊治經數千年來淪陷變遷文物典章掃地無餘是編畧於往代之考據詳於近代之事實亦據事實錄之意補闕搜殘以俟來哲

(一)是編參合史例及各縣志例首圖表次紀略事略終以雜記殿末撮要刪繁分類編次  
(一)本縣文化萌芽教育未普黨務尙無正式登記亦無正式黨部黨務一門暫時從略以待補登

(一)臨河古治自東漢已省併西河其舊治疆域湮沒無徵編中地輿城邑兩門僅就一統志古朔方郡歷代沿革叙列以存大綱至古臨河舊址容俟博古君子詳考補列

(一)本境水利爲河套民生唯一根本卽爲凡百庶政興廢進退之樞紐是編於本境各大渠詳確勘測精密圖繪並附具說明以爲將來改進方鍼

(一)本境墾植農業林業均爲民生之命脉是編不憚旁諮博采擇要詳載用備將來發展改良之張本

臨河縣志

卷上

凡例

一三

(一)地方大計不外軍事政治實業有清以前文獻無徵是編於近二十年來過去事跡及現在狀況有見必錄有聞必紀以資注意西北者之考鏡

(一)列國采風正變同列凡以寓褒貶示法戒也本境漢蒙雜處禮教風俗雜駁不純是編據事直書罔知忌當俾當事者訓型有據勸懲有方焉

(一)本境疆域重關兵燹迭經典籍飄殘官書中散私史無傳凡關於金石藝文古物名蹟及忠義孝友節烈鄉賢名宦文苑獨行各類蒐采百方迄無一得惟付諸闕文以待博雅

(一)方今五族共和蒙旗屏藩北部儼然一家欲企同風先在同文是編本張氏綏乘同文表照錄登列從此聲息相通隔閼永化興養敷教是爲階引

(一)時人筆記論說詩歌凡有關於地方治要者概入雜記以備考鑑  
(一)志書原本史例凡詞涉浮濫荒誕不經之說概與刪除

(一)本境地圍蒙荒典冊無存采訪寡助補苴撥拾疏漏叢多所望海內鴻博糾正彌補匡

其不逮

臨河縣志

卷上 凡例

臨河縣志目錄

卷上

序文

凡例

目錄

題名

圖 全縣地輿 城關 永濟剛濟渠合圖 蘭鎮三大股渠合圖 黃土拉垓河渠圖 楊家河子渠圖

表 戶口 物產 同文

紀略 地輿沿革 城邑建置沿革 山川要隘

卷中

紀略

事略

墾務沿革 地方保衛 賦稅 渠道水利 教育 商業 交通 兵防  
風土習俗 荒政 農業林業 全境蒙旗界址戶口生計保衛禮俗召廟

官吏 紳耆

臨河縣志

卷上 目錄

一五

卷下

雜記

渠道 移墾 社會 建築 風俗 礦產 古蹟  
慈善 贈別 紀異 附記



纂修臨河縣志題名

監修

呂 咸 河北涿鹿

黃彥邦 安徽鳳陽

彭繼先 山西大同

白保莊 山西靈邱

總編纂

王文墀 山東濟寧

協修

王績世 山西代縣

校訂

高建章 綏遠薩拉齊

臨河縣志

卷上 題名

一六

耿秉信 山東桓臺

郭晟源 山東濟寧

測繪

張念慈 河北宛平

參考

魏三槐 陝西府谷

李守身 山西靈邱

朱鴻勳 山東濟寧

皮萬齡 河北鹽城

協理

李增榮 河北棗強

楊春林 山西河曲

李元楨 河北棗強

劉忠貞 山西保德

汪治泉 綏遠臨河

陳占財 綏遠臨河

賈毅 綏遠武川

傅正業 綏遠薩拉齊

崔增權 綏遠托克托

楊鶴林 山西河曲

賈占權 綏遠武川

劉長義 綏遠薩拉齊

劉畛 山西代縣

于相龍 河北寧津

臨河縣志

卷上 題名

楊鐸林 山西河曲

田全貴 吉林昌圖

王侶 山西代縣

采訪

胡希明 山西靈邱

班子義 綏遠臨河

楊忠 山西河曲

張國翰 綏遠固陽

張毅辰 綏遠臨河

楊葆和 山東廣饒

毛維周 山東即墨

房魯泉 山東安邱

許大可 山東德縣

王作忠 山東濟寧

律聯璽 山東濟寧

王作謀 山東濟寧

臨河縣志



卷上 題名


圖表序

周制司會掌國之官府郊野縣都之百物財用凡在書契版圖者之貳以遂羣吏之治司書掌邦中之版土地之圖以周知入出百物大司徒掌邦之土地之圖與其人民之數以佐王國安擾邦國自古圖表之學列有專門後世廢而不講政治家軍事家遂眯目山川無以制勝幃幄勞心簿籍莫克對照鈎稽近來科學日新無事不列圖表鈎玄提要朗若列眉瞭如指掌是亦省文省事之權輿也爰分圖表於左

# 綏遠省臨河縣全境地圖


## 明說

按臨河界北東至豐濟渠西至阿拉善王旗地東界南北界歷來測勘家均限於河南北山者何也一則由於河南山北現仍未鑿開一片沙碛并無漢民住居有治地無治民此不得不從略者一也一則由於蒙人堅守閉關主義深固固拒不欲外人闖入其境從事采訪人多則勇林英繼人少則艱險難犯此不得不從略者二也有此二因故仍沿用舊圖而其內容詳益加詳密益加密惟於劃界之原案有五待表而出之者查清光緒二十九年劃定西境設立五原廳廳北界包烏拉三公旗全部跨陰山至瀚海為止南界包達拉杭錦兩旗南跨大河而治之當日由薩分五以旗界為縣今日由五分臨亦以旗界為縣界是臨河北界跨陰山至瀚海而止臨河南界跨大河至杭錦兩旗南界而止的為白臘與周原後日發展實業建設兵防按圖可索固綽有餘地也檔案具在用特表而出之



# 臨河縣城關全圖

## 說明




按臨河自民國十四年七月設立設治局城址照原案設立強油坊之議劃定界址城垣週圍一千零八十丈城西距永濟渠三里許地形東半高西低若覆孟當地者老勸城址移東半里免水患不報是年九月縣署警察所落成十月築城垣工未及半以冰泛而止十六年呂局長創議修城崇墉屹立三月工竣十月兩等學校女子小學校建築報竣城東門曰真綏南曰瀾安西曰通寧北曰敷化陰陽家言築北門不利至今猶闕之惟西城自十六年春永濟渠冰汎迭告水患根本解決勢必另擇高原遷陟城社惟費鉅事頗不易猝辦只有加修城西護城堤為揚湯止沸之計庶幾可資捍禦矣城闕街基地以寬長十丈為一方道路經緯分明當日劃留祠壇廟校倉社及其他公共場所餘地甚多惜自十八年後當事者漫不經意或意圖收益任民間領買恐日後地方發展於城闕建立大規模公益之廠所勢必無地可容矣


# 永濟渠剛目渠合圖

## 明說

查永濟渠身長一百四十里口寬二十六丈中流寬九丈有餘下游渠稍寬四丈餘高於渠口十六丈有奇尾閘宜洩不利每遇水漲動輒橫決此受病一大原因現在每年僅流種地三千頃倘開寬渠稍上下游高下相準五年後能有澆灌萬頃之希望正渠外各支渠密如蛛網計有二百道之多得難詳列又剛濟渠渠口久堰近年并未上中游只有永剛渠新永剛渠永盛和渠尚可進水惟流地無多該渠無獨立之必要故統併入永濟水利社兼管以省款費而一事權



# 蘭鎮爾三股大渠合圖




## 明說

查蘭鎮渠創於何人何年均不可考清光緒末季重修於邑紳李振海先生計渠口寬八丈餘自口至放稍處長三十餘里自烏蘭腦色分闢兩稍一通蘭鎮大  
 拒寬三十尺深六尺長四十餘里一通丹打木堵寬深與蘭鎮拒之稍同每年能澆地六七百頃三大股渠開創於民國六年田紳金貴李紳振海趙紳海三  
 家合辦故名三大股該渠初創不能上水嗣經合力猛進乃底於成寬長與蘭鎮渠等每年澆地二三百頃





# 第四區楊家河烏拉河圖



## 說明

按烏拉河為綏甘分界地向不隸於渠道範圍天然水利自來取之不盡上游水歸王爺地農民引用下游水歸臨河平定村農民引用惟每年上水無多往往上游干畝沾溉下游涓滴莫分應照水利章程公組水利社以專其責而均其利又楊家河子渠有清道光末年創於東場楊氏厥後湮蕪民國六年楊董事茂林崛起創修仍其舊名並未襲其舊址歷時七年之久廉款四十萬之多渠長一百四十餘里寬八九丈深一丈支渠四曰黃楊木堵曰烏蘭潭渠曰老仙渠曰三潭渠均長七八十里每年澆地兩千頃他渠有時爭議本渠農民始終無違言良以由一家創修由一家經理其責專其權一其利故平均而善備也設使合股公辦已不知生幾許波折又使收歸官有更不知生幾許紛更所謂團體無實業簡人有實業其信然歟



臨河縣志

卷上

戶口表

一一一

| 表           | 口          | 戶          | 年          | 八          |
|-------------|------------|------------|------------|------------|
| 總           | 四          | 三          | 二          | 一          |
| 計           | 區          | 區          | 區          | 區          |
| 一二五八〇       | 三九五四       | 三二一八       | 一六六七       | 三三一四       |
| 女男<br>二二三四〇 | 女男<br>七〇〇六 | 女男<br>五七五〇 | 女男<br>二九一四 | 女男<br>五九六二 |
| 三五三〇二       | 一八七三       | 一五八〇       | 五八九三       | 一〇七八       |
| 一三五二六       | 二六四七       | 三八三五       | 二四八三       | 三七〇〇       |
| 無           | 無          | 無          | 無          | 無          |
| 女男<br>一〇三   | 無          | 無          | 無          | 女男<br>四三   |
| 女男<br>三三三   | 無          | 女男<br>一四   | 女男<br>二二一  | 無          |
| 女男<br>三三三   | 女男<br>二五二八 | 女男<br>三〇五四 | 無          | 無          |

物產表序

周官物五土之宜以植羣彙禹貢分九州之壤以育百材自古天不愛道地不愛寶有心人入其邦郊遊歷市町觀物產之豐耗可以規政治之良窳此其中關於天時者半關於人事者半蓋長養之功功在造物利導之權權在政府也臨河獄時淵淳孕育宏富其已發其藏者穀米之利牧畜之利礦冶之利羽毛齒革之利若因而導之推而廣之月異日新吾知其方興未艾也爰列物產表於左

臨河全縣物產表

| 類別 | 名稱   | 歲產數 | 本地時價    | 運銷用途                 | 備考 |
|----|------|-----|---------|----------------------|----|
| 五穀 | 甲 小麥 | 二萬石 | 每石價洋十五元 | 運包頭銷十之五蒙古運銷十之二本地銷十之三 |    |
|    | 乙 莞豆 | 一萬石 | 每石價洋十元  | 同銷十之三蒙古銷十之四          |    |
|    | 丙 糜穀 | 五萬石 | 每石價洋八元  | 運包十之三本地銷十之四          |    |
|    | 丁 穀子 | 三千石 | 每石價洋七元  | 本地銷                  |    |

臨河縣志

卷上 物產表

一一一

| 五穀           | 皮毛       |
|--------------|----------|
| 戊 葫蘆         | 甲 牛皮     |
| 巳 扁豆         | 乙 羊皮     |
| 庚 蕎麥         | 丙 羊羔皮    |
| 辛 玉蜀         | 丁 驢馬皮    |
| 壬 苡麥         | 戊 狐皮     |
| 癸 大麥         | 巳 狼皮     |
|              | 庚 羊毛     |
|              | 辛 駝毛     |
|              | 壬 羊腸     |
| 五千石          | 二千張      |
| 每石價洋十三元      | 每張價洋五元   |
| 五千石          | 三萬張      |
| 每石價洋十元       | 每張價洋二元五毛 |
| 一百石          | 三萬張      |
| 每石價洋八元       | 每張價洋三元五毛 |
| 一百石          | 三百張      |
| 每石價洋八元       | 每張價洋三元五毛 |
| 三百石          | 七百張      |
| 每石價洋十二元      | 每張價洋十二元  |
| 五百石          | 一百張      |
| 每石價洋十二元      | 每張價洋二十元  |
|              | 三十萬斤     |
|              | 每斤價洋三毛   |
|              | 五萬斤      |
|              | 每斤價洋六毛   |
|              | 一萬條      |
|              | 每條價洋四毛   |
| 運寧夏十之五本地銷十之五 | 均運銷包頭    |

臨河縣志

卷上 物產表

一三二

| 牲畜      |        |         |         |         |
|---------|--------|---------|---------|---------|
| 甲       | 乙      | 丙       | 丁       | 戊       |
| 牛       | 羊      | 馬       | 騾       | 駝       |
| 二千頭     | 一萬頭    | 一千匹     | 三百匹     | 三百隻     |
| 每頭價洋三十元 | 每頭價洋六元 | 每匹價洋三十元 | 每匹價洋五十元 | 每隻價洋三十元 |
| 均本地銷售   |        |         |         |         |

| 蔬菜      |         |         |         |             |         |         |         |
|---------|---------|---------|---------|-------------|---------|---------|---------|
| 甲       | 乙       | 丙       | 丁       | 戊           | 己       | 庚       | 辛       |
| 白菜      | 蘿蔔      | 山藥      | 蕪菜      | 芹菜          | 秦艽      | 西瓜      | 瓜子      |
| 二十萬斤    | 五十萬斤    | 六十萬斤    | 二十萬斤    | 一萬斤         | 一萬斤     | 五萬個     | 五百石     |
| 每百斤價洋三元 | 每百斤價洋一元 | 每百斤價洋一元 | 每百斤價洋十元 | 每百斤價洋十元     | 每百斤價洋十元 | 每百個價洋十元 | 每石價洋十五元 |
| 本地銷售    |         |         |         | 運包十之三運本地十之四 |         |         |         |

| 藥材     |        | 水產     |         |     |
|--------|--------|--------|---------|-----|
| 甲      | 乙      | 甲      | 乙       | 丙   |
| 甘草     | 肉蓯蓉    | 魚      | 蒲       | 葦   |
| 五萬斤    | 二十萬斤   | 五萬斤    | 二萬斤     | 一萬斤 |
| 每斤價洋五分 | 每斤價洋三分 | 每斤價洋三角 | 每百斤價洋五角 |     |
| 均運銷包頭  |        | 本地銷售   |         |     |

漢蒙同文表序

居今日而欲開闢西北劃一政教必自調和漢蒙始將欲調和漢蒙必自溝通文字語言始不通蒙文聲教不能周暨不通蒙語意見不能融和近代獻縣張氏編定綏乘一書本綏遠旂志方言精校詳參另立同文表是真重譯之宏編亦同風之先路也爰列其同文表如左

| 類別 | 音別  | 漢            | 蒙               |
|----|-----|--------------|-----------------|
| 天文 | 天   | 騰格哩<br>格根騰格哩 | 得該都騰格哩<br>庫克騰格哩 |
|    | 清天  | 格哥巴爾         | 烏的希保力巴          |
| 日  | 天亮了 | 納楞           | 格噶勒             |
|    | 日   | 巴魯克搜的勒       | 納楞克爾時巴          |
| 影  | 影   | 薩楞           | 格根薩楞            |
|    | 月   |              |                 |
| 月  | 月暗  | 薩楞補魯凱依       | 得該都哈噶斯          |
|    | 下弦  | 倒勒都哈噶斯       | 薩楞都古令           |
| 月食 | 北辰  | 薩楞克爾持巴       | 鄂都              |
|    | 天德  | 阿勒坦噶達素       | 巧勒孟             |
| 七星 | 畢星  | 倒倫鄂都         | 瑪奇特             |
|    | 霞   | 安吉順胡希古       | 烏立              |
| 浮雲 | 雷   | 圖納勒巴         | 補爾庫巴            |
|    | 雷   | 諾古庫烏立        | 補登              |
| 電  | 雷   | 阿雲格          | 阿雲格都格爾巴         |
|    | 電   | 察克勒幹         | 包朗              |
| 下雨 | 電   | 包朗襖拉巴        | 索倫噶             |
|    | 霜   | 們都爾          | 希古的爾            |
| 霜  | 霜   | 克魯古          | 格素              |
|    | 雪   |              |                 |
| 露  | 虹   |              |                 |
|    | 雨   |              |                 |
| 响雷 | 霧   |              |                 |
|    | 陰   |              |                 |
| 雲  | 昂星  |              |                 |
|    | 明星  |              |                 |
| 星  | 月圓  |              |                 |
|    | 上弦  |              |                 |

臨河縣志

卷上

同文表

臨河縣志

卷上

同文表

二五

|  |                                                                    |                                                                                         |                      |                                                                     |                                                                                               |
|--|--------------------------------------------------------------------|-----------------------------------------------------------------------------------------|----------------------|---------------------------------------------------------------------|-----------------------------------------------------------------------------------------------|
|  | 天<br>時                                                             | 陽<br>和風<br>氣                                                                            | 阿烏爾<br>邁力圖薩力肯<br>阿爾噶 | 陰<br>溫風<br>風                                                        | 薩力肯<br>哈隆薩力肯<br>畢里格                                                                           |
|  | 十天干                                                                | 阿爾板額希<br>庫克圪沁<br>烏格格沁<br>什拉克沁<br>察汗圪沁<br>哈拉克沁<br>胡拉納格<br>巴拉斯<br>祿<br>茂哩                 |                      | 甲<br>丙<br>戊<br>庚<br>壬<br>十二地支                                       | 庫克<br>烏藍<br>什拉<br>察汗<br>哈拉<br>阿爾板和彥爾額哩奇騰<br>烏庫爾<br>挑賴<br>茂蓋<br>和尼                             |
|  | 申<br>戌<br>時<br>春<br>秋<br>古<br>年<br>去年<br>明年<br>本年<br>豐年<br>旱<br>月大 | 密奇<br>諾亥<br>恰克<br>哈布爾<br>納穆爾<br>額爾騰<br>吉勒<br>恩格爾生吉勒<br>亥圖吉勒<br>孟吉<br>額力伯吉勒<br>剛<br>薩楞依克 |                      | 酉<br>亥<br>季<br>夏<br>冬<br>今<br>每年<br>前年<br>來年<br>富歲<br>澇<br>閏月<br>月小 | 特克雅<br>噶亥<br>烏拉哩拉<br>那<br>額佈勒<br>鄂多<br>吉勒補哩<br>烏爾濟能吉勒<br>依哩庫吉勒<br>巴彥吉勒<br>烏彥爾<br>依柳色楞<br>薩楞巴格 |



臨河縣志

卷上

同文表

二六

|    |                                               |                                                                 |  |                                                               |                                                                                                                                                                                   |
|----|-----------------------------------------------|-----------------------------------------------------------------|--|---------------------------------------------------------------|-----------------------------------------------------------------------------------------------------------------------------------------------------------------------------------|
|    | 數目                                            | 單月<br>日子<br>凶日<br>節日<br>昨日<br>明日<br>初一日朔<br>三十日晦<br>午<br>刻<br>冷 |  | 雙月<br>吉日<br>除夕<br>昔日<br>今日<br>每日<br>十五日望<br>早<br>晚<br>熟<br>凍了 | 額羅遜薩拉<br>額都爾<br>茂古額都爾<br>額勒吉圖額都爾<br>額楚克額都爾<br>瑪爾嘎額都爾<br>希能尼更<br>畢圖公<br>烏得<br>本奇<br>奎騰<br>額羅遜薩拉<br>賽音額都爾<br>胡沁烏的<br>烏爾都額都爾<br>額諾哥額都爾<br>額都爾補哩<br>阿爾板塔佈<br>額柯爾<br>烏得希<br>哈隆<br>庫拉得巴 |
| 地輿 | 五<br>七<br>九<br>二十<br>四十<br>六十<br>八十<br>百<br>萬 | 塔布<br>多羅<br>伊蘇<br>和林<br>都沁<br>古楞<br>納彥<br>昭<br>圖孟               |  | 六<br>八<br>十<br>三十<br>五十<br>七十<br>九十<br>千<br>億                 | 珠爾噶<br>迺木<br>阿爾板<br>古沁<br>塔畢<br>達楞<br>伊林<br>胡格<br>補木                                                                                                                              |
| 地輿 | 本地<br>鹽地<br>潮地                                | 鄂勒噶<br>達木素太噶<br>奇各大<br>噶咱爾                                      |  | 濕<br>乾<br>城地<br>所管地                                           | 迺騰<br>胡賴<br>胡吉爾圖噶<br>哈拉雅圖噶                                                                                                                                                        |

臨河縣志

卷上

同文表

二七

|    |                                   |                                                |  |                                   |                                                |
|----|-----------------------------------|------------------------------------------------|--|-----------------------------------|------------------------------------------------|
|    | 海 湖 池 泉 水 冰 山 磨 灘 水               | 達賴 潭各勒 淖爾 佈拉克 烏素 穆素 和爾買 畢柳 昆兌 希爾圪巴             |  | 江 河 大海灣 井 山水 紅土坎 溝渠 火石 水泛溢        | 穆楞 果勒 多海 胡都克 烏彥爾 烏藍以力更 蘇巴克 巧凱古爾 必拉哈巴           |
| 五行 | 紅銅 銀 五行                           | 塔本瑪哈漠特 們格 吉斯                                   |  | 金 銅 鉛錫                            | 阿力塔 古哩 挑拉格                                     |
|    | 沙漠 塵土 野灘 邱 下濕 山 陵 山嶺 山鼻 山陽 石峯 石 洞 | 果畢 討告素 塔拉 托布齊克 和托果爾 阿烏拉 托博 達巴 哈木爾 哈波爾 哈達 齊魯 阿貴 |  | 沙 泥 澤 阜 曠野 岡 沙岡 山助 山嘴 山陰 荒山 盤石 河灣 | 額哩素 沙補爾 庫得額 古獨古爾 凱哩 習勒 茫哈 哈畢爾 阿魯 和布海 烏庫爾齊魯 額爾更 |

臨河縣志

卷上 同文表

|                                  |                 |  |                                               |           |
|----------------------------------|-----------------|--|-----------------------------------------------|-----------|
|                                  |                 |  | 方<br>向                                        |           |
| 大 長 正 斜 縱 濁 淺 近 薄                | 下 拐角 側傍 中間      |  | 東 南 東南 西北 往 上 往前 向左 在 上 中 六合                  | 鐵 木 火     |
| 伊克 烏爾圖 奇克 吉嚕 和力圖 補林爾 歸肯 哀爾 寧根    | 倒力都 珠布克斯 哈珠 和隆特 |  | 郡特 額木納 郡額木納 巴隆惠納 得該希 烏魯克希 郡希 德魯勒 東木達 珠爾汗阿吉勒吉爾 | 特穆爾 印獨 噶勒 |
|                                  |                 |  |                                               |           |
| 小 短 歪 橫 清 深 遠 厚 廣                | 方 頂上 根前 邊上      |  | 西 北 西南 東北 往 下 往 北 向 右 在 下 四 方 上               | 生鐵 水 土    |
| 巴哈 阿胡爾 哈吉該 昆都倫 通格拉克 恭 和洛 珠講 阿古吉木 | 額特該德 鄂賴 德力格特 嘉哈 |  | 巴隆特 惠納 巴隆額木納 郡惠納 倒部希 惠希 巴隆希 倒部勒 都爾板足克 德該都     | 希哩密 烏素 習羅 |

臨河縣志

卷上 同文表

|                              |              |         |                        |              |
|------------------------------|--------------|---------|------------------------|--------------|
|                              | 城池           |         | 宮室                     | 人倫           |
| 狹低入窄圓難軟整虛不好                  | 城歸化城         | 路邊關     | 宮九重廟家柵子塔關              | 君大臣高祖祖父      |
| 哈布楚勒保鄯尼鄂羅為騰波林凱依波爾凱依蔣楞畢圖胡達拉莫烏 | 和屯尼斯拉力和屯庫克和屯 | 甲木察汗克力密 | 鄂爾登伊順達不胡哩蘇密格爾哈沙蘇布爾噶哈拉克 | 汗賽特胡隆齊額補克作齊克 |
|                              |              |         |                        |              |
| 高出寬方易破實狠好                    | 土郭國城樓        | 關       | 殿寶座大寺房藩籬門窗             | 王官曾祖祖母       |
| 恩都爾噶爾額爾根都爾波力津奇力波爾哈挑哈格爾亥烏賽狼   | 巴力噶素烏魯斯阿色爾   | 拿庫該蘇    | 哈爾希色古哩召板申什不個烏達強吉       | 額正諾彥額隆齊額密更額琦 |

臨河縣志

卷上

同文表

三〇

|  |  |                                                                                            |    |            |                                                                            |    |      |                  |
|--|--|--------------------------------------------------------------------------------------------|----|------------|----------------------------------------------------------------------------|----|------|------------------|
|  |  | <p>父 伯 兄 子 阿哥 弟婦 友 丈夫 妻 曾孫 嗣 姓 親近</p> <p>額齊克 依克阿巴格 阿哈 扣 阿巴該 斗波勒 哈尼 諾庫爾 額密 吉齊 烏爾 鄂保克 哀爾</p> | 職官 | 人 門人 婿 名 妾 | <p>昆 設畢 庫哩更 尼哩 巴汗額密</p> <p>賽特 噶畢牙圖賽特 珠爾幹雅不達拉衙門 托特噶都賽特 察克登交卡克齊賽特 胡希古諾賽特</p> | 禮制 | 禮 贊禮 | <p>邀斯拉力 邀斯倒得</p> |
|  |  | <p>母 叔 嫂 媳 弟 朋 夫人 夫 孫 玄孫 族 世 疑遠</p> <p>額珂 巴格阿巴格 波哩更 波勒 斗 諾庫爾 哈同 額爾 阿奇 古奇 圖嚕勒 烏彥 阿克拉各</p>   | 官  | 師 女 孩子們 養子 | <p>巴克什 扣肯 扣克特 忒吉該僧扣</p> <p>圖布穆勒 塔爾哈噶拉克僧賽特 額勒肯賽特 占補特甲凱嚕克僧賽特 將軍 姜楞尼章京</p>    | 儀仗 | 前進   | <p>吉各斯各力 達不習</p> |

臨河縣志

卷上

同文表

三十一

|                           |                            |                            |                  |
|---------------------------|----------------------------|----------------------------|------------------|
|                           | 音                          | 政事                         | 德性               |
| 跪起讓謝恩年班散了                 | 五音鐘鏡鈸牛腿號琴箏竹馬               | 政事感化權罰法查搜常事例               | 道義智威嚴            |
| 索古得包斯迺力塔力畢珂希克都杜爾古吉隆吉習雅塔拉買 | 塔本阿雅拉克中肯強烏庫爾波連圖利雅土克雅吐克茂屯茂哩 | 札薩克可斯該額爾可巴察噶吉拜奇寧吉可本可哩克和例   | 邀素珠嚕密密爾更素嚕       |
|                           |                            |                            |                  |
| 叩頭揖退進貢會盟                  | 鼓鑼雲板木鐸簫胡笳                  | 教威賞律例巡狩辦公務功                | 仁禮信孝             |
| 杜爾古杜歸斯凱額該阿力巴板哩楚拉幹         | 肯格爾各哈楞各托卡強鄂齊拉經乎畢習古爾茂屯楚古爾   | 蘇爾噶古哩和隆賞和里察噶特買希特該阿力板可哩克噶必牙 | 額嚕希彥勒(見前)巴圖額力波爾力 |

臨河縣志

卷上 同文表

三二

|     |        |     |          |
|-----|--------|-----|----------|
| 弟   | 斗伍齊    | 事奉  | 阿斯爾      |
| 使令  | 甲勒     | 順   | 額依波哩     |
| 事   | 為拉特買   | 色難  | 察賴克楚     |
| 謹敬  | 珂奇彥歸   | 無違  | 勒齊庫烏貴    |
| 無忝  | 固圖噶乎烏貴 | 極孝  | 珂齊拉勒     |
| 不匱  | 茂好希烏貴  | 忠   | 希達爾古     |
| 正   | 齊克     | 不徇情 | 尼古爾齊拉胡烏貴 |
| 不諱  | 達嚕胡烏貴  | 不瞞  | 達力特力胡烏貴  |
| 不護短 | 額磨力胡烏貴 | 不偏  | 克力波哩胡烏貴  |
| 廉   | 齊波勒    | 無瑕  | 奇哩烏貴     |
| 體面  | 尼古爾太   | 聰明  | 齊沁       |
| 聰慧人 | 特古力得爾  | 明白  | 哥更       |
| 通慧者 | 密得齊    | 心靈  | 索諾不色爾    |

|    |     |      |     |       |
|----|-----|------|-----|-------|
| 人事 | 福   | 補音   | 有福分 | 補音太   |
|    | 全福人 | 伊囉勒圖 | 壽   | 額勒齊   |
|    | 有壽  | 額勒濟太 | 造化  | 克什格   |
|    | 有造化 | 克什格太 | 富   | 巴彥    |
|    | 喜   | 巴彥爾  | 太平  | 恩克    |
|    | 安康  | 阿穆古楞 | 平   | 圖布陸   |
|    | 祥瑞  | 邀羅   | 先兆  | 巴力克   |
|    | 保佑  | 伊布格巴 | 神妙  | 該哈本希克 |
|    | 事   | 克哩格  | 奇瑞  | 烏奇勒   |
|    | 公務  | 阿力巴  | 情   | 加嚕克   |
|    | 訟   | 加哩亥  | 呈詞  | 加嚕克   |
|    |     |      | 煩   | 圖布克太  |
|    | 從善  | 阿布木該 | 聰敏  | 烏化補爾  |
|    | 敏悟  | 烏化太  | 知識  | 密達    |

爭 宴席 緣故 惡 動 沒有 不妨 來 回 進 坐 陞 說

奇魯勒 胡哩木 烏楚爾 牧 庫德勒 烏貴 該貴 伊勒 哈哩 鄂勒 掃 德布希 克勒

鬪 邀請 好 言 有 有碍 走 去 出 臥 起 站 何

楚幹 泰音 巴圖魯勇賽音 烏噶 拜那 惱奇太 牙布 鄂齊 噶拉 可布特 包斯 交克掃 阿掃

聽 給與 哭 呼 擊來 不要 你的 我的 他們的 誰 公中的 非 做甚麼

梭納斯 額克 危拉 倒達 阿巴依勒 阿不胡貴 齊尼 密你 特登迺凱 懇 阿力巴迺凱 布魯 佑凱那

看 笑 要 擊去 你 我 他 咱們的 誰的 是 可以 那邊

烏吉 伊念 那特 阿巴奇 阿布那 齊 畢 特勒 瑪迺 克你凱 孟 包勒那 察噶那



|                                                                                                                        |                                                                                                                  |                          |                         |                                                                                                             |
|------------------------------------------------------------------------------------------------------------------------|------------------------------------------------------------------------------------------------------------------|--------------------------|-------------------------|-------------------------------------------------------------------------------------------------------------|
|                                                                                                                        | <p>這邊<br/>無蹤跡<br/>何以<br/>豈是<br/>從何處<br/>這們那<br/>們支梧<br/>並全然<br/>徒然<br/>如此<br/>無用<br/>不知<br/>有干涉<br/>極至</p>       |                          | <p>次<br/>抬轎<br/>拉物</p>  | <p>文學<br/>五經<br/>中庸<br/>孟子<br/>書經<br/>禮記<br/>有學問<br/>章<br/>蒙古書<br/>冊檔</p>                                   |
| <p>那嚙那<br/>巴拉蘇魯克烏貴<br/>牙公都爾<br/>由奈<br/>哈那斯<br/>額那肯特爾肯<br/>鄂克圖<br/>和果色嚙爾<br/>依木<br/>可哩克烏貴<br/>密特庫烏貴<br/>哈嚙爾太<br/>推拉</p> |                                                                                                                  | <p>烏達<br/>額勒古<br/>齊魯</p> |                         | <p>文學人<br/>額爾德穆騰<br/>塔本諾木<br/>奇布東達都<br/>孟子<br/>札薩克圖諾木<br/>遨素拉力圖諾木<br/>額爾德木圖<br/>烏銀格<br/>蒙古力畢奇<br/>丹巴</p>    |
|                                                                                                                        |                                                                                                                  |                          |                         |                                                                                                             |
| <p>不勝<br/>有甚麼<br/>奈何<br/>何處<br/>幾乎<br/>不可<br/>常是<br/>休要<br/>平白的<br/>現成<br/>無干涉<br/>問他<br/>那樣</p>                       | <p>特斯克力烏貴<br/>由貝<br/>牙奇拜蘇保力胡<br/>哈密嚙<br/>何賴<br/>保力胡烏貴<br/>依魯<br/>畢替<br/>得迷力<br/>畢林<br/>哈密嚙烏貴<br/>特公都爾<br/>梯木</p> | <p>又<br/>套車<br/>巧</p>    | <p>八斯<br/>庫哩<br/>烏林</p> | <p>四書<br/>大學<br/>論語<br/>詩經<br/>易經<br/>春秋<br/>文<br/>滿洲書<br/>策簡<br/>題目</p>                                    |
|                                                                                                                        |                                                                                                                  |                          |                         | <p>都爾板畢齊克<br/>依克蘇爾塔力<br/>希古穆吉力奇拉力<br/>習力克拉力圖諾穆<br/>珠爾亥圖諾木<br/>沙律圖諾木<br/>烏特哈<br/>滿吉畢奇克<br/>特木的茂都<br/>色都布</p> |

臨河縣志

卷上

同文表

三五

|                                                                   |                              |                                                           |                          |
|-------------------------------------------------------------------|------------------------------|-----------------------------------------------------------|--------------------------|
|                                                                   | 武備                           |                                                           | 身體                       |
| 翻譯<br>學<br>背<br>發憤<br>通了<br>書<br>紙<br>墨<br>蘸筆                     | 兵<br>步兵<br>精兵<br>海螺          | 旗<br>弓<br>包頭箭<br>部伍<br>甲<br>順刀<br>鋼叉<br>大炮<br>鉛丸          | 頭<br>眼<br>鼻<br>眉         |
| 烏爾齊古勒<br>蘇嚕買<br>齊該吉力<br>習木達買<br>尼布達爾吉<br>畢奇克<br>察阿素<br>波珂<br>依的古力 | 奇力克<br>雅步幹奇力克<br>習力達克<br>補哩彥 | 凱依哩<br>訥木<br>果都哩<br>安該<br>胡彥克<br>色勒木<br>色哩彥<br>烏庫爾佈<br>束木 | 討力蓋<br>尼都<br>哈麻兒<br>庫木色克 |
|                                                                   |                              |                                                           |                          |
| 習<br>讀<br>勤學<br>效法<br>講<br>信函<br>筆<br>硯                           | 馬兵<br>防兵<br>戍師旅<br>彘         | 箭<br>盛緊<br>盛<br>矛<br>腰刀<br>烏鎗<br>火藥<br>預備                 | 髮<br>耳<br>口<br>睫毛        |
| 蘇嚕力噶<br>文習買<br>克奇彥<br>達古哩雅<br>泰力補哩力<br>甲奇的力<br>比依哩<br>交羅力         | 印哩圖奇哩克<br>薩克圖奇爾克<br>丹音<br>脫克 | 哈拉哈力<br>素木<br>強格拉<br>倒古拉克<br>吉達<br>伊勒都<br>佈<br>丹哩<br>畢力特該 | 額斯<br>奇克<br>阿穆<br>索爾茂斯   |

指甲 掌 肘 膝項 咽喉 腮 牙關 山根 臉 額顛 血 涕 辮子

胡木斯 阿拉各 托亥 庫珠 和賴 甲究爾 貝勒 杭箱爾 尼古爾 莽迺 齊素 尼素 哥吉各

乳頭 臍 腎 脚面 脚心 助骨 心 脾 腎 筋 胆 腸 命

庫可 奎斯 補各斯 額力迷 烏力 哈畢斯 珠爾克 德里古 波勒 習爾布素 束力蘇 哥的素 阿密

胸膈 指 手 眉甲 胡鬚 唇 舌 牙 瞳人 鬢 面 津涎 淚

謙吉 胡魯 噶爾 杜隆 包胡勒 烏嚕力 克勒 習都 噶力齊齊凱 切穆爾亥 切賴 習力素 尼力補斯

心窩 胯 大腿 脚跟 骨 脊骨 肝 肺 油 脊髓 胃 尿泡 元氣

阿邀力亥 叟吉 古彥 保爾畢 牙斯 賽爾 額力各 烏什凱 額可 訥古素 和倒的 遠不色克 烏各烏力

流品

氣 魄 足心汗 嗜 拐子 啞 豁牙 斃足 病

阿密斯胡力 素克 習布力 梭和爾 倒哈楞 克哩該依 額木特可爾 戴不噶爾 額布沁

魂 汗 秃 麻子 聾 缺脣 歪脖 羅圈腿 殘廢人

東尼索 庫彖斯 和吉格爾 潮哈爾 都哩 色特爾凱 格力吉格爾 凍尼公 圖土吉不特克

漢人 蒙古人 農人 買賣人

可塔特昆 蒙古力昆 塔拉迺昆 胡都力特汗諾昆

滿洲人 讀書人 工人 黃衣僧

滿吉昆 畢齊克昆 遠爾汗昆 喇嘛

青衣僧

和尚

道士

本布

活佛

哥更

修行人

迪彥齊

知前世仙人

呼弼力汗

活佛封號

呼圖克圖

放馬人

阿倒齊

閑散人

蘇拉

俗人

哈拉昆

鰥

果尼

寡婦

波力伯松

獨

噶克齊

媒

文奇

化緣人

巴達爾沁

乞丐

歸林齊

聽差人

甲拉齊

傳事人

密特格

雇傭人

庫奇諾昆

獵人

古祿格齊昆

尼姑

察八幹齊

醫生

額密齊

唱曲人

倒齊

跟馬人

庫圖齊

奴才

包拉

婢

音吉

匠人

達爾亨

|     |        |     |       |
|-----|--------|-----|-------|
| 相面人 | 察賴新吉各奇 | 推算人 | 烏古拉各齊 |
| 說書人 | 烏里各爾齊  | 報捷人 | 色特古力  |
| 祈福人 | 補哥齊    |     |       |

|    |    |       |     |       |
|----|----|-------|-----|-------|
| 器用 | 桌子 | 習連    | 椅子  | 散達哩   |
|    | 鎖  | 鄂尼蘇   | 鑰   | 圖勒庫爾  |
|    | 壺  | 德波爾   | 尊   | 洪達汗   |
|    | 罈  | 隆乎    | 碗   | 阿彥各   |
|    | 箸  | 薩不哈   | 盤   | 丕勒    |
|    | 犁  | 安吉蘇   | 耙   | 湯那古爾  |
|    | 犁鏡 | 托里    | 鋤   | 阿爾齊古爾 |
|    | 把子 | 麻拉塔古爾 | 碾   | 田呼木   |
|    | 磨  | 盈     | 木石杵 | 麼楚爾   |
|    | 箕  | 得布爾   | 節   | 額力格克  |

臨河縣志

卷上 同文表

|    |         |     |        |
|----|---------|-----|--------|
| 碌磚 | 補拉      | 鐮刀  | 哈達古爾   |
| 帽  | 瑪拉蓋     | 有頂戴 | 津斯圖    |
| 衣  | 胡不七蘇    | 服   | 胡諾爾    |
| 朝衣 | 圖哩衣和不七蘇 | 袍子  | 德波勒    |
| 褂  | 庫魯木     | 枕   | 德哩     |
| 蟒袍 | 蟒納克德波勒  | 補褂  | 蒲斯圖庫魯木 |
| 靴  | 瑪海      | 皮靴  | 古特力    |
| 禪  | 額木特     | 襪   | 咬木素    |
| 扣鈕 | 挑不齊     | 腰帶  | 布蘇     |
| 皮襖 | 珠不察     | 背心  | 齊該吉木七  |
| 襯衣 | 察木七     | 毡雨衣 | 喀波能    |
| 簑衣 | 掣木爾該    | 鞋   | 沙亥     |
| 車  | 特爾格     | 轅   | 阿拉勒    |

飲食

轅端橫木  
車箱  
車轎  
輻條  
轎  
巴山兜

保拉噶  
哈希拉克  
庫勒特  
格該素  
叟克  
登訥古爾

羊角椿  
車軸  
車轄  
車輞  
轎車

楚哈達素  
騰可里克  
和勒果布齊  
穆克爾  
叟肯特爾格

米飯  
肉  
瘦  
酒  
醇  
飲  
醉

布達  
瑪哈  
圖弄害  
阿爾凱依  
包爾素克  
烏  
掃克托

麪  
肥  
湯  
黃酒  
吃  
嚼  
嘗

古哩爾  
塔爾紅  
胥勒  
達哩素  
伊第  
甲吉拉  
阿木塔力

飽了  
飢  
熟了  
燒酒糟  
黃酒糟  
清茶  
奶茶  
麪茶  
酸奶子  
醋  
稀  
有味  
脆

察達吉  
額力波爾吉  
包魯吉  
巴齊麻格  
沙嚕格  
通格勒才  
蘇太才  
吉哩爾太才  
哀哩克  
伊斯古楞  
星更  
烏尼爾騰  
叩哩克

餓了  
生的  
温  
奶子酒  
茶  
熬茶  
芝蔴茶  
奶子  
奶皮  
咯生些  
稠  
臭  
餡饌

額魯斯吉  
圖凱  
波聯  
阿爾  
才  
哈拉才  
麻林古牙  
蘇  
額嚕木  
圖凱肯  
額特更  
和凱  
邀希

臨河縣志

卷上

同文表

四〇

|                           |                          |                                                               |
|---------------------------|--------------------------|---------------------------------------------------------------|
|                           | 珍寶                       |                                                               |
| 藍 紅 黑 綠 秋香色 淡黑            | 寶石 銀 青金 車渠 珊瑚 寶貝         | 芝蔴 麥 米 草麥 苳麥 高粱 茄 茶菜 韭菜 芹菜 竹笋 木耳 海帶                           |
| 庫克 烏藍 哈拉 諾網 諾網不塔爾什拉 哈拉不塔爾 | 額爾德尼 胥勒 洞 璫明 們各 哈斯齊老 和諾克 | 阿拉各那 佈代 阿木 阿爾拜 習希 烏庫爾習希 車斯 該木惱部 郃郃特 巧郃爾 和蘆送索邀 塔力圖 達賴惱部        |
|                           |                          |                                                               |
| 黃 白 紫 顏色 紅青               | 珍珠 瑪瑙 琥珀 綠鉛 錢            | 糜子 豆 稻 苳麥 黍 菜 白菜 葱 蒜 薑 蘑菇 金針 蒿苳                               |
| 什拉 察汗 保羅 恩哥 庫克不塔爾什拉       | 青補特 瑪嫩 胡布 烏由 交索 塔哩牙      | 蒙郃力阿木 補哩七各 圖土爾各 薩各達 旭拉凱 惱部 察汗惱部 桑該惱克 色哩木斯格 哈隆額佈 穆古 什拉齊七克 希魯凱依 |

|     |         |
|-----|---------|
| 果子  | 吉密斯     |
| 蘋菓  | 阿力本拉特   |
| 柿   | 毛東諾沙不塔哈 |
| 杏   | 歸拉素     |
| 葡萄  | 烏珠木     |
| 松子  | 蘇水爾     |
| 杜棣  | 哈得      |
| 小瓜  | 克力古瓜    |
| 蓮花  | 哩彥化奇七克  |
| 紅花  | 古力古木奇七克 |
| 芍藥  | 察那七奇克   |
| 薔薇花 | 甲特爾奇七克  |
| 蓼   | 烏順希木力達克 |
| 桃   | 桃羅      |
| 梨   | 阿果本     |
| 李子  | 里斯      |
| 棗   | 察不噶     |
| 栗   | 圖賴波勒    |
| 榛子  | 希得      |
| 西瓜  | 塔爾不斯    |
| 核桃  | 胡希格     |
| 牡丹花 | 瑪達爾巴奇七克 |
| 鷄冠花 | 烏拉補爾阿爾貴 |
| 桔梗花 | 胡爾登察汗   |
| 金錢花 | 交素奇七克   |
| 梅   | 烏達補力奇七克 |

|      |          |
|------|----------|
| 動物   |          |
| 禽    | 花架       |
| 鶴    | 松        |
|      | 榆        |
|      | 藥        |
|      | 竹葦       |
|      | 馬蓮       |
|      | 蓬蒿       |
|      | 人參       |
|      | 參蘆       |
|      | 靛花       |
|      | 兔絲草      |
| 吉古爾騰 | 奇胡魯爾     |
| 禿古嚕  | 納拉素      |
|      | 巴爾格素     |
|      | 額密       |
|      | 胡勒蘇(蘆葦同) |
|      | 甲凱力達克    |
|      | 哈木胡力     |
|      | 昆額密      |
|      | 甲拉噶素     |
|      | 補達那      |
|      | 什拉烏哩彥古   |
| 柳    | 亥拉素      |
| 柏    | 阿爾奇      |
| 楊    | 烏梁素      |
| 草    | 額佈素      |
| 菖蒲   | 吉個蘇      |
| 棘草   | 哈拉蓋      |
| 芸香   | 蘇魯       |
| 參鬚   | 沙哈力      |
| 賁茂   | 得力蘇      |
| 益母草  | 都爾波力津額布蘇 |
| 淡竹葉  | 吉哩力克補爾奇克 |
| 鳳凰   | 噶嚕第      |
| 孔雀   | 脫古斯      |



臨河縣志

卷上

同文表

四二

鶴鶉 鳴雀 小雀 鵬 鸚鵡 戴勝 獸 鹿 青羊 狐 獾 馬

補特納 奴古斯 什包 必力鳩亥 補爾古特 討德 波不格力津 郭羅 包克 科巴爾伊瑪 烏尼克 圖魯吉 茂哩爾

鷄 鵝 烏鴉 鷺鷥 芝麻鵬 鶉鴉 黃鸝 象 四不相 狼 野貓 獺 駱駝

特卡 噶嚕 可聯 特該力 甲噶哩 塔克塔 阿力坦和哩古力代 嘉 哈達罕 巧開 麻哩爾 塔爾巴 鐵勉

牲口 乳牛 馬駒 騾 貓 灰鼠 舍利孫 龍 蛇 蠶 蝦 蟻

莫勒 烏念 達嚕 老斯 密貴 可哩木 希柳蘇 象 茂蓋 拉各密那凱 迺木力吉 殺木和爾亥 希哩古力濟

驢 牛犢 羊羔 騾馬 天馬 豹 貂 蟒 魚 蝦蟇 龜 蠅 蟲

額力吉克 圖古力 胡嚕克 阿克塔 青達嚕 伊爾不色 補拉克 阿佈魯茂蓋 吉嚕素 密力凱 元拉各密那凱 伊拉又什牡力 和爾亥

|   |        |    |       |
|---|--------|----|-------|
| 蠶 | 固哩和爾亥  | 班蝥 | 江察和爾亥 |
| 蜂 | 察爾奇該   | 蟬  | 吉爾可力  |
| 螢 | 巴力圖珠貴  | 蝶  | 額爾拜凱  |
|   | 噶力圖和爾亥 |    |       |

表五

本區山水名稱同文表

山水名稱之紛歧莫綏遠若考地理者圖與圖異書與書又異本一也而二之本二也而一之開卷紛然茫無涯涘則以文之不同故也不同而欲強同之譬諸削趾適履鶴脛續鳧固不易為力音一而字萬烏得徧載之哉茲僅就一統志蒙古游牧記諸書所已言者著之於篇亦舉一反三之意云爾

|   |                  |   |                        |   |                    |   |                     |
|---|------------------|---|------------------------|---|--------------------|---|---------------------|
| 漢 | 陰山<br>白雲山<br>新婦山 | 蒙 | 色爾貝噶札爾<br>插漢和碩<br>白爾白狼 | 漢 | 西神山<br>劉嶺<br>黑山四子旗 | 蒙 | 巴林翁公<br>毛德爾<br>喀喇和碩 |
|---|------------------|---|------------------------|---|--------------------|---|---------------------|

臨河縣志

卷上

同文表

|         |       |          |          |
|---------|-------|----------|----------|
| 殺羊山 四子旗 | 阿爾哈林圖 | 獨牛山      | 烏克爾圖祿    |
| 陽山      | 杜蘭    | 鵲山       | 沙齊哈爾     |
| 富峪      | 巴顏鄂坡  | 密柳坡      | 博多克布爾哈蘇  |
| 黑山 茂明安旗 | 喀喇托羅海 | 殺羊山 茂明安旗 | 哈喇特克     |
| 方山      | 賀爾賀   | 居延山      | 崑都倫      |
| 狼山      | 綽農陀羅海 | 牛頭朝那山    | 吉蘭陀羅海    |
| 老虎山     | 巴爾圖   | 宿鬼山      | 札拉       |
| 雪山      | 察蘇台   | 帷山       | 額古德      |
| 麥梁山     | 額貴恩都爾 | 白石山      | 插汗七老圖    |
| 大青山     | 漠喀喇   | 赤城山      | 烏藍拜星     |
| 牀山      | 鹿勒    | 連山       | 和岳爾喀喇鄂博  |
| 馬神山     | 翁公    | 陽山       | 洪戈爾      |
| 拂雲堆     | 烏珠爾察漢 | 夾山       | 和岳爾喀喇托羅海 |

臨河縣志

卷上

同文表

四四

總材山  
回回墓  
省嵬山  
黃水河  
密柳坡  
黑河  
鐵柱泉  
甜水井  
魚海  
黑河伊盟左翼後旗  
柳河伊盟左翼後旗  
蒲河  
芹河

磨多圖  
賀佟圖  
阿羅布斯  
西喇木倫  
多克布爾哈蘇  
喀喇木倫  
哈達馬爾  
賽音  
札哈蘇台  
伊克土爾根  
布爾哈蘇台  
呼魯蘇台  
伊克西喇爾吉台

錦屏山  
黃草山  
馬陰山  
鹽泊喀爾喀族  
柳河  
帷山河烏喇特族  
冷泉  
深井  
赤沙泉  
兔毛河  
魚河  
大昆兌河  
小芹河

岩靈  
庫勒爾齊  
阿克塔和碩  
達卜孫  
布爾哈圖  
額古德  
魁屯 即奎騰  
敖泉  
烏藍  
陶賴昆兌  
折葛蘇台  
伊克昆兌  
巴哈昆兌  
巴哈西喇爾吉台

獐河  
金河  
石窯川河  
銀盤水  
捕魚池  
苦水池  
長鹽池  
大鹽池  
太子灘  
馬鞍山  
蟠羊山  
陶山  
豐州灘

西爾哈  
西拉烏素  
額圖渾  
西黑爾  
折葛蘇台  
插汗札達海  
達布蘇圖  
特默圖察汗  
巴哈昆兌  
席拉得伯僧  
衣馬圖  
喀喇特木爾  
伊克蘇爾哲

紫河  
細河  
清水河  
清湖  
蒲池  
黑水池  
鍋底池  
越沒灤  
娘娘灘  
牛心山  
太白  
紅螺谷

烏藍木倫  
納林  
佟哈拉克  
佟哈拉克淖爾  
虎蘇台  
喀喇烏素  
喀喇莽奈打木素  
鄂爾吉虎  
伊克昆兌  
巴顏朱爾克  
插汗  
五藍察布

地輿沿革紀略

漢臨河縣隸朔方郡地居河套西偏在古五原部西南與漢臨戎縣近在南河以北北河以南北河實古黃河故道卽今之五加河又名五角渠是也自漢後郡縣變更時遷勢易臨河故城遺址載籍無傳臨河之疆域遂湮沒難考洎清末葉河套地均隸五原縣轄境民國十四年綏遠當道因五原轄境袤長控制不便特劃五原西鄙地百餘里另立設治局復漢舊名曰臨河非第循舊名將欲復漢治也作地輿沿革紀略

漢元朔二年置朔方郡臨河縣隸之

按漢書朔方郡縣十三封朔方修都臨河呼遼窳渾渠搜沃埜廣牧臨戎徐繼畬兩漢沿邊十郡考略河套本新秦中地漢初入匈奴武帝元朔二年收其地置朔方郡徙民十萬以實之領縣十故城在河套者七在套西者三前漢郡治三封在套西後漢治臨戎在套內修都呼遼亦在套內又漢書衛青傳元朔元年青爲車騎將軍明年出雲中以西至高闕走白羊樓煩王遂以河南地爲朔方郡使竇建築朔方城後漢書永和五

臨河縣志

卷上

紀略

四五

年徙朔方居五原是後漢已移置郡地水經注河水東北逕三封縣故城又北逕臨戎縣故城西又北有枝渠東出謂之銅口東逕沃埜故城南元狩三年又北趨而爲南河出焉是大河分流爲南北河自漢代已然或稱河自元魏分者誤也又北迤西溢於窳渾縣故城東元朔二年開朔方郡治有西部都尉治有道自縣西北出鷄鹿塞其水積而爲屠申澤河水又屈而東仍爲北河東逕高塞南又東逕臨河縣故城北又南合南河是漢朔方郡在北河以南五原郡西南臨河縣又在南河以北朔方郡西南也明矣漢光武中興始置并州以領之省臨河五縣併入西河郡

按西漢盧芳之亂竊據邊郡光武中興始置并州以領之而郡縣省併大半省朔方郡之臨河修都呼遼窳軍渠搜五縣而以西河郡之大城縣隸朔方漢末荒廢建安中置新興郡爲治太原界晉仍之

晉永嘉後爲前後趙前後秦地義熙中夏赫連勃勃據之

按大清一統志鄂爾多斯表永嘉後爲前後趙前後秦地讀史方輿紀要晉亂石勒併

朔方兼置朔州義熙九年赫連勃勃於朔方水北黑水之南築城曰統萬北魏初都盛樂後沒於秦道武興而恢復舊域以陞北爲畿內地太武帝始光中置懷朔武川撫冥柔玄四鎮於雲州北境立朔州以統之後改懷朔於朔州而於舊朔州置雲州仍治盛樂魏書太和元年置東夏州領郡四朔方郡居其一領縣三臨河不與焉

隋大業改夏州爲朔方郡

唐因夏州亦曰朔方郡

按唐書關內道夏州朔方郡中都督府縣三曰朔方曰德靜曰寧朔讀史方輿紀要安北都護府屬關內道永徽初薛延陀既滅鐵勒諸部回紇等復討禽突厥遣種車鼻可漢於金山因置燕然都護府領狼山羈縻府州二十有七龍朔二年徙燕然都護府於回紇總章三年又改爲安北都護府開元二年徙治中受降城單于都護府屬關內道天寶初安北單于都護盡屬朔方郡大曆八年徙治振武軍唐末拓跋思恭破黃巢有功賜國姓李有銀夏綬宥靜五州之地

## 臨河縣志

### 卷上

紀略

### 四六

宋太宗太平興國中河套地復爲王土後陷於趙德明仁宗景祐爲夏所併

遼金

按夏始祖拓跋思恭據有西部之夏州地及元昊立盡取河西地慶曆初復陷豐州北控大漢置軍河北以備遼

遼

爲李夏所有地

金

爲李夏所有地

元滅夏立西夏中興等路

按元太祖仲弟哈薩爾之後太祖之後分據青山以北是爲後之烏蘭察布六旗爲漢五原郡地太祖十五世孫達延漢之後盡據黃河以南是爲後之伊克昭七旗爲漢朔方郡伊克昭盟卽鄂爾多斯地後廢爲東勝雲內二州及延安寧夏等路

明初爲東勝等州城並立屯戍天順間爲蒙古所據

按明天順間蒙古酋長阿勒綽爾與瑪古里海始入河套嘉勒斯賚復糾合們都爾倚爲巢穴宏治間和實復入其中又延綏志明初王保保據河套洪武中追逐之築東勝等城并立屯戍總制楊一清上言河套當復未果行其後隨屢入寇嘉靖中無歲不擾

總督曾銑請復河套嚴嵩譖殺銑自是無敢言者此以終明之世該地不內屬之證也  
清天聰八年征服其地編烏伊兩盟統之乾隆六年以河套地隸薩拉齊廳治之光緒二十  
九年析薩拉齊地西路隸五原廳治之

按清天聰八年太宗征察哈爾土默特部衆悉降後編爲二旗領以左右翼都統及四  
副都統及後青山北之喀爾喀右翼四子部落茂明安烏拉特六旗相繼來庭併設札  
薩克錫號曰烏蘭察布盟南河以南之鄂爾多斯左右翼前中後各三旗亦設札薩克  
後復增設前末旗共七旗錫號曰伊克昭盟是爲西二盟設盟長副以領之雍正元年  
設歸化城理事同知乾隆元年建綏遠城設綏遠將軍轄土默特及西二盟又設綏遠  
城理事同知六年設綏遠道分設歸化和林格爾托克托薩拉齊清水河善岱昆都崙  
七協理通判二十五年裁善岱昆都崙二協改其他五協理爲理事通判廳同治四年  
改薩拉齊通判爲同知光緒二十九年析薩拉齊廳之大余太附益以達拉特杭錦烏  
拉特三旗爲五原廳

## 臨河縣志

### 卷上

紀略

### 四七

民國元年改五原廳爲縣治八年析縣東界所屬之烏拉特中旗地及武川西界茂明安旗  
地隸固陽設治局十年析縣東南界所屬之達拉旗及烏拉特前旗地隸包頭設治局  
十四年析縣東界烏拉旗地隸大余太設治局析縣屬西界杭錦達拉烏拉等旗地隸  
臨河設治局

按漢代臨河縣原隸朔方郡在北河以南居鄂爾多斯旗地地踞河套全部漢五原  
郡在北河以北爲烏拉特旗地跨陰山前後而治之是在漢代朔五兩郡界限分明  
厥後併置改易名移勢異自五代以後朔方五原之地迭遭淪陷舊治湮沒迨清季  
由薩拉齊析分五原治境包鄂爾多斯北部及烏拉特全旗而有之是清五原縣幾  
全佔漢朔方五原兩郡之地計東界至茂明安西界西界至阿善旗東界綿延千里  
南至杭錦達拉旗北部北至陰山北瀚海南北界五六百里不等其幅員廓廣占綏  
區面積三分之一民國二年曾以五原控制不便有設縣佐於大余太及纏金地之  
議三年王紳同春糾集地方募款築縣城於隆興長北五里之白圪梁四年五原縣

王知事文墀由包頭移治後套新縣城披荊斬棘百廢俱興惟轄境東西千里鞭長莫及擬請分地以治迄未果行九年固陽設治以五原東境地益之十四年包頭設治以五原東南界地益之十四年大余太設治劃五原烏蘭腦包以東地益之臨河設治劃豐濟渠以西地益之分治原案臨河東至豐濟渠綏當道派蕭振瀛爲臨河設治局長來套劃界五原紳董張厚田崔國仁劉士傑唐兆銘堅詞爭界謂五原母縣原案治境不及百里不得謂平呈三上當道又派劃界馮委員邀同臨河紳董李增榮楊春林陳占財傅正業公同會議議決臨河東界以剛濟渠爲限北至義和久活水泉南至渠口大河蕭局長振瀛會同地方紳董規劃全境疆里南至黃河北至大青山即陰山西至烏拉河迤西阿拉善旗東界東至剛濟渠規模大定焉惟查綏區當日劃分各廳地界均以旂界爲經今臨河疆域純由五原西界劃分按光緒二十九年劃分五原奏案所有杭錦達拉烏拉旂地向歸薩拉齊廳管轄者盡歸五原管轄今由五劃臨所有剛濟渠迤西之抗達烏三旂地向歸五原管轄者今統歸臨

## 臨河縣志

### 卷上

紀略

### 四八

河管轄前例具在旂界所至卽縣界所至烏拉特旂地界北跨陰山至瀚海爲限是臨河北界隸境當不限於陰山而止杭錦旂地南踰南河是臨河南界轄境當不限於南河而止奏案具在可考而知語云尺地寸土不可予人設令從此地方發展市廛駢列村里輻輳地狹民衆人滿爲患則踰河而南循嶺而北取我原有之地不難按圖而索從容布置因利乘便可坐而定因特表而出之以爲後日之考訂疆域者有所借鏡焉

城邑建置沿革紀略

臨河在西漢隸朔方郡城在河套西偏自漢後朔方郡或廢或復或省或併時易勢殊書闕有間郡城既迭經變遷縣城亦莫定方位迨至民國十四年劃五原西部創設臨河設治局擇地於強油房建築縣城名雖仍舊城則肇新規時立制古今異宜特作城邑建置沿革紀略

漢初置朔方郡徙民十萬以實之郡領縣十臨河隸之

按朔方郡治縣東爲渠搜西爲廣牧西北爲臨河漢代臨河凡兩見實則一城厥後無傳

漢光武省朔方郡之修都臨河呼遒窳渾等五縣而以西河郡之大城隸朔方郡

按臨河縣在東漢已省廢無復舊治其故城遺址湮沒當已久矣

晉末石勒併朔方郡兼置朔州

魏置懷朔等四鎮

臨河縣志

卷上

紀略

四九

按懷朔應在烏拉旂北在今五原臨河北境非古朔方地

隋大業初改夏州爲朔方郡隸縣三

按隋改夏州爲朔方郡郡治三縣均非舊治縣名古臨河縣名久已省廢其故城益不可考矣

唐朔方總管張仁愿築三受降城

按讀史方輿紀要西受降城在廢豐州北八十里志又云本漢朔方郡臨河舊理所云又按漢代郡縣地理五原郡在北河以北朔方郡據有全套是朔方五原界當以北河爲限唐西受降城當在五原郡西界今又云本漢朔方臨河舊理所在古人畫界犬牙相錯臨河治城在北河南其轄境或在北河以北亦事之所恒有也

宋仁宗景祐爲夏所併

按唐末造拓跋思恭以滅黃巢功賜國姓曰李有銀夏豐宥靜五州地

遼

地爲李夏所有



金

地爲李夏所有

元滅夏立西夏中興等路

按元太祖仲弟哈薩爾之後據青山以北地是爲今之烏蘭察布盟卽古五原郡地太祖十五世孫達延漢之後據黃河以南地是爲今之伊克昭盟卽古朔方郡地朔方郡卽鄂爾多斯旂地

明初爲東勝等州城立屯戍嗣爲蒙古所據

按明代河套地一陷於蒙古酋長阿爾勒綽爾再陷於和實再陷於王保保洪武中遂之立東勝等城駸駸乎有城邑焉旋又陷於蒙古楊一清曾銑屢請規復河套不報終明之世河套不內屬惜哉

清天聰八年征服其地編爲伊兩盟以統之乾隆六年析其地隸薩拉齊廳光緒二十九年析薩拉齊西部地隸五原廳

按清初青山北喀爾喀右翼四子茂明安烏拉特各部來庭編爲烏蘭察布盟南河以

臨河縣志

卷上

紀略

五〇

南鄂爾多斯左右翼前中後各三旂後復增設前末旂共七旂編爲伊克昭盟雍正初設歸化城理事同知乾隆初築綏遠城設將軍理事同知六年設綏遠道分歸和托薩清善岱崑都崙七協理通判二十五年裁善昆二協理光緒二十九年析薩拉齊所轄達拉杭錦北部烏拉特三旂全部隸五原廳是時鄂爾多斯烏拉特旂地合治於五原古朔方郡地半隸於今之五原治矣

民國元年改五原廳爲縣治三年築五原城十四年七月析五原西界地隸臨河設治局九月築臨河縣城

按民國初元改廳爲縣三年議在五原東路大余太西路纏金地設縣佐以助理之十三年綏遠實業廳長段永新呈請劃五原西區地分設臨河縣十四年綏遠當道任蕭振瀛爲臨河設治局長蕭局長抱進取之壯懷負建設之全責凡百措置均能不憚勞不畏難貞以毅力貫以全神不苟一時之安用策百年之計其規畫城垣也援設治強油房之原案測景定向辨方立位確定城基地址時有熟於地形家耆老主張應將城

址移東半里免受永濟渠水患卒弗納初不料縣城西面屢被水患也城垣週圍計一千八十丈城四門東曰翼綏南曰瀾安西曰通寧北曰敷化城基地計二十頃有奇悉民間地產出厚價收買民爭獻納無敢匿官爲之編號畫方每寬長十丈爲一方地分三則平價招領劃市廛定民舍限期建築逾限者收其地不稍寬假又爲之分經路四緯路二十有四壇廟基址若干區學校基址若干區其規畫井井也如此其建築官舍也堂勿取高室勿取廣椽樑勿尙雕鏤屏壁勿尙丹漆爰進工師董乃事分乃職大者總其成小者執其藝披星而作戴月而息計月課績計日課工肉於俎酒於盎錢於積勤者賞惰者罰人人樂於從事而事易集當時董其役者則有李區董增榮陳區董占財傅區董正業楊區董春林于會長相龍田會長全貴王董事績世智者用智巧者用巧材者用材謀者用謀計時三閱月築室百餘楹落成之日邑之人咸奔走觀成焉洵可謂善於用衆者矣惜乎時值冬令范土水沍城工築未及半遂至中輟泊自十六年夏呂局長咸來攝局務鑒夫危垣三尺不足以固防而禦侮也特開地方行政會議首

## 臨河縣志

### 卷上

紀略

### 五一

以城工爲先務特設城工建築處以李紳增榮總其事以王董事侶副之分股辦事以各區董事分任之呂局長早作夜巡督促不遑在事各紳董羣力并進羣策交贊均能各慎乃事各勤乃職是以始終工無曠料無減費無糜閱二月而大工告成是役也計支款一萬八千元由地方攤捐內撙節挪補前功克竟而民間擔負并未加重傳曰凡事豫則立此道得也十七年秋黃局長彥邦宰是邑因縣西城迭遭水患創議加修護城壩兼築補城垣墻議甫就緒旋去官繼其任者爲彭縣長繼先力持原議任汪區長治泉爲城壩工程經理以王董事侶副之城工則彌其缺補其殘壩工則卑培高薄增厚有彭縣長握要提綱以擘畫於上有各紳董併力同心以贊助於下工成之日邑之人咸舉首額慶曰從此金湯鞏固庶免唳鶴之驚隄防永安差免其魚之患邑有神君其造福何有旣極也方今地方無事及是時修明庶政百度更新通商惠工興商訓農行見梯航輻輳水陸交衝列市雲連百塵霧聚蕞爾邊邑安知不成一繁盛大都會是在官紳合作亟起而進行之也

山川要隘紀略

秦據陽山而匈奴遁漢取河南而單于降失險者亡得險者昌臨河黃河弦貫陰山弧張南襟秦晉北控蒙疆東障包綏西通甘涼據而守之固西北之鑄鑰恢而張之亦萬世之金湯特作山川要隘紀略

按今臨河地舊隸漢朔方郡郡地在鄂爾多斯旂旂界所至即郡界所至南至榆林邊墻北至北河東至土默旂西界西至阿拉善旂東界統稱河套非限於南河北北

河南也按大清一統志山則有夾山在左翼前旂東南八十五里黑山在右翼前旂東南六十里退諾克拖龍海山在左翼後

旂東南一百四十里恩多爾拜山在右翼前旂南二百二十里黃草山在右翼中旂西北八十里哈伯義齊山在右翼中旂西一百二十里其他如邵龍

山省蒐山馬陰山巴從得右峯敖西喜峰伊克翁公崗插漢拖羅海岡可退坡諸山川流則有庫葛爾黑河巴漢托蘇圖河赤沙河車根木倫河烏爾巴齊河黑河諸川在漢均隸朔方郡地惟朔方郡套內七縣自漢光武時已省併廢置均失其舊究不知何山隸屬何縣是漢臨河縣名在東漢初已廢併無存其地址方位久已莫考縣

臨河縣志

卷上

紀略

五二

界既不能詳其治境內之山川形勢更無從臆斷此窮搜圖籍古臨河之方位與其治境之山川要塞久已湮沒而莫可確定也明矣然而鑒往尤貴知來考古不如證今援刪書之例為考文之資請斷自近年臨河設治始

山隘要塞考

按古朔方郡在鄂爾多斯旂地即今之伊克昭盟古五原郡在烏拉特旂地即今之烏蘭察布盟清光緒二十九光析伊盟達拉杭錦旂北部烏盟烏拉全旂地為五原縣轄境是古五原在北河北新五原在河南兼鄂爾多斯烏拉旂而治之今臨河由五原西界劃分是統烏伊兩盟之西部而治之矣查今臨河境以陰山為幹脈由賀蘭山蜿蜒而東當縣城正北百里有狼山又名狼居胥山狼山西二百里有古高闕迤東有雞鹿塞後漢永元初竇憲出鷄鹿塞是也狼山北有榆溪塞秦郤匈奴於河套樹榆為塞以限北夷是也計縣境陰山隘口迤西為高闕塞在狼山口西蒙古游牧記即所謂綽農陀羅海其口正當黃河北流折東處兩山對峙若門戶中有道通

新疆路較他路近二千里又東什涼口在纏金渠之西北可抵哈爾察齊泉又東門池口對黃羊木頭正北直達塔齊勒克圖鄂博之要隘又東烏蓋柏爾口在狼山口西北通木納山亦達格拉山之要隘又東烏蓋口在纏金五加河正北通木納山之要隘又東東襖蓋口在狼山口西又東狼山口在狼山正山北勢險峻爲用兵要地又東石蘭計口在狼山口東亦要隘又東葫蘆斯兔口在狼山北形勢險要又東馬池口在狼山北通察漢泊又東慶打口通中公旂要口又東馬蓋息便口北越東公旂界達察漢泊迤北通察漢鄂博此臨河北境之諸要隘也

### 川流要隘攷

按今臨境河流以黃河爲經以各渠爲緯水經注河自高闕南又東逕臨戎縣故城北又南河東逕臨戎縣故城北又東逕臨河縣南按黃河自寧夏界北流出邊經鄂爾多斯西行五百里一枝分爲二歧其東注地有析枝城水經所謂南河也其北河流至阿爾布坦山南迤西溢爲大澤土人名騰葛里腦兒卽古屠申澤自此屈而東

## 臨河縣志

### 卷上

紀略

### 五二

流過右高闕南行二百里許稍東南流又折西南與南河合乃直向東行經烏拉特南至大素根河入河此屈朔方郡所隸各河流也查近日臨河轄境以南北河爲經以各渠道爲緯他條水均無關險要南河橫亘全治中心各河口均關重要入縣境東南爲馮們圖口又西爲秀華堂口又西爲黃羊木頭口又西爲可克木口又西爲有毛腦海口此臨河南河沿岸之形勝也至於東路有洋行渠長二十里寬一丈五尺此爲第一道要隘里西有剛濟渠長百里寬四五丈不等此爲第二道要隘又西有土默渠長二十里寬二三丈不等此爲第三道要隘又西有戶口渠長二十里寬二三丈不等此爲第四道要隘又西德成渠長四十里寬三四丈不等此爲第五道要隘又西有天德源渠長四十里寬二三丈不等此爲第六道要隘又西有強家渠長二十餘里寬一丈五尺此爲第七道要隘又西有魏楊渠長二十里寬二丈此爲第八道要隘又西有五大股渠長二十餘里寬二丈此爲第九道要隘西路有烏拉河長百餘里寬六七丈不等此爲第一道要隘又東有楊家河子渠長一百四十里

寬七八丈不等此爲第二道要隘又東有黃土拉垓河渠長一百三十里寬六七丈不等此爲第三道要隘又東有三大股渠長八九十里寬四丈此爲第四道要隘又東有蘭鎖渠長八十里寬五六丈不等此爲第五道要隘又東有永濟渠長一百四五十里寬八九丈不等此爲第六道要隘各渠均口通大河尾貫陰山下之五加河卽北河處處天塹重重湯池守之可以韜甲藏兵扼奇設伏決之可以陷車徒限戎馬制敵而不受制於敵况乎支渠套搭糾錯如九夷長坂如八陣變態久居其地者尙有時迷於嚮往而他更可知此真天造地設之要隘軍事家幾費工作幾費測勘日夜疏鑿開闢求其一而不可必得而今測星羅碁布竟能坐扼其要亦何幸如之也用特質諸留心軍事地理學者

### 墾務沿革紀略

中國以農立國禹平洪水后稷教稼此爲中國墾植創始時代上古注重民生任民種植不加限制迨至周禮地官專設土均土會墾地之法逐漸求詳至強秦北逐匈奴拓陰山北之餘地使貧民墾闢名其地曰北假此爲河套墾務開始時代厥後田官罷除邊疆多事千里河套旋興旋廢移民開邊之大計迄未實行甚至終明之世河套迄不能內屬嗚呼禹甸滿目荒榛良足太息有清末造庚子遭變岑春煊督師入衛道經河套慨然興移民屯墾之思光緒三十年奏派貽穀爲西盟墾務督辦貽督辦統籌全局規定西盟墾務應先由河套入手於是勸導蒙旗次第報墾規模遂大定焉作墾務沿革紀略

達拉特旗墾務項下

按達拉特旗地凡二種曰放墾地曰永租地而放墾地又分二種曰四成地曰四成補地此二種地界不隸臨河故略而不詳考其永租地均隸八道官渠隸於臨河境者有永濟渠永租地計地八百頃有剛濟渠永租地計地二百五十頃案譯永租者不放之

## 臨河縣志

### 卷中

紀略

一

謂也其地由墾局包租於蒙旗由墾局開渠招租所得租銀公家與蒙旗按成收之其意曰地仍蒙地公家所得者不過渠費與經理之費而已原奏案所云渠到何處地即開至何處蒙旗雖有地無水澆灌卽等石田有渠卽有地無渠卽無地渠之所至地不愛寶以明地力之不足恃人力之大可憑也當時與達旗訂定上上地每年每頃收租銀四十兩上次三十兩中二十五兩下二十兩所收租銀除二成爲渠工其餘作十成計算公家得三蒙旗得七嗣因租地無定額當事者任意出入不免上下其手民國元年始定爲包租之制官渠八道永租地以兩千頃爲準每頃收租銀十五兩每頃年收水利經費銀四兩五錢以一兩三錢歸包戶作修渠費以三兩二錢歸公家作水租此由公家不能兼顧分包各地商經理時期迨分包地商虧負日重民國九年一師旅長楊以來組織灌田水利社投貲集股將官渠渠道完全認包乃經理五年虧租至十餘萬之鉅經王紳同春張紳厚田楊紳文林組織匯源水利公司認包永濟剛濟豐濟沙河義和渠五道其通濟長濟塔布三渠仍由灌田社以興農社名義包租行之數年仍

無起色此爲地商總包時期十四年國民軍第八旅石旅長友三兼充包西水利總辦盡收各官渠由官經理當因比年糧價昂貴地之收入日見增漲永租地租照舊額征收水利經費加至每頃收銀八兩後改爲收洋十元此爲各官渠收回官辦時期究竟商辦則爭欲自利利不歸公官辦則工大費鉅入不敷出二者俱失當局思欲改良而亟求進步十七年春墾務局孟總辦斌儀徧召各地方紳董齊集總局大開水利會議各提議案反復討論旁採周諮不厭求詳議定每渠各立水利社并附水利董事會以監督進行水利社長及董事會董事長由全渠大戶公推品行端方熟悉水利者充之永租地仿墾地官租例丈青收租租價每頃三十元半歸蒙半歸公水租每頃收水租洋十元以七成作渠費一元五角歸公以一元五角歸水利社作常年薪工辦公費設有臨時要工由該社估算經費呈准由該渠地戶徵款修理十八年夏設包西水利管理局以領之是年三月當道召集各社社長董事長在包頭開會因水利局暨各社經費不足議定每地一頃加征水利經費兩元合之原征十元以七元作渠費以二元五角歸公以二元五角作租水社經費案經全體通過此爲官渠地官督民辦時期民國十四年達拉特旂報墾西昭地五千頃地全隸臨河二區經達旂地畝局蕭局長收界南至大河岸北至五加河南三道濠東至豐濟渠西至杭錦旂地當時撥交實業廳地一千二百頃撥領山東墾民地七百五十頃其餘丈放民戶千餘頃所餘餘荒無幾與原報數不符祇以常時倉猝丈放既未畫方又不編號不實不盡浮冒弊混在所不免十六年呂王兩局長迭次呈請覆丈又經王局長擬具辦法屢蒙采納將來見諸實行定收成效該地分三則上地每頃荒價洋一百元中地八十元下地六十元每地價百元加建建築費洋十元教育費洋五元實業費洋五元十八年二月又奉令每地價百元加征軍事建築費二十元又黃土拉垓河渠達旂地係光緒庚子賠款地當日達旂應出賠款銀十四萬兩三十年綏遠當道派員會同蒙員及教士三面交涉以黃土拉河達旂地一千四百頃抵作賠款歸教堂管業該地實數一千零八十八頃有餘所謂一千四百頃者殆概數耳當時教士所定條件異常苛虐當道委曲求全勉強簽認自該

地歸該教堂因利乘便藉該地左右我民衆其勢力遂日益澎漲官廳無如之何近年革命功成達旗地畝局呂局長咸奉令收回該地爰組立收回黃土拉河教堂地會議以書面正式召集該教士鄧德超該教士延不到會約屢爽呂局長奉令以無條件收回遂即派員分別勘收該渠地招民領墾分地爲三等荒價附加均如達局例惟地價百元加收教育費五厘達局於十八年四月十日奉令裁併第五分局嗣又移交第六分局此達拉特旗隸屬臨河境內墾務沿革之大略也

#### 一 杭錦旗墾務項下

按杭錦旗放墾伊始按蒙墾奏議略云該旗東巴噶中巴噶地東界達拉特旗界南至黃河西至商人王善舊渠北至達拉旗南界呈報認墾當即派員驗收東西長二百三十四里南北寬八九十里至十數里不等邊寬中窄形若蜂腰與原報地段相符云云又將兩巴噶西界可墾之地約數千頃呈報併入前次所報界內亦經派員驗收云查該地分五等丈放上地每頃荒價銀一百兩上次九十五兩中地九十兩中次八十五

### 臨河縣志

#### 卷中

紀略

三

兩下八十兩旱地凡五等上地每頃荒價銀五十兩上次四十兩中地三十兩中次二十兩下次十兩又查該旗兩次報地七千頃編作元亨利貞四號至十四年由五原劃歸臨河征租者爲元字號一段計地一千五百餘頃地均隸臨河一區丈青征租每頃每年征洋三元七角有奇附辦公費一成縣留七厘辦公解廳三厘又民國十四年杭旂報墾西巴噶地三千餘頃局設臨河三區陝壩鎮地分三等上地荒價一百二十元中地一百元下地八十元每地價百元附加建築費十元教育實業費洋各五元十五年國民軍退却駐臨徵集民糧無算經馮上將軍令所有徵集民糧糧價准由民欠杭局荒價內抵除令甫下因地方大亂局員奔散未及將糧價收賬計應抵地價四萬一千餘元經地方紳董據案哀籲案至今延懸未結杭局於十八年四月奉令裁併第五分局嗣又移交第六分局此杭旂地隸屬臨河內境內沿革之大略也

#### 一 烏拉特旂墾務項下

按民國十八年設立綏遠墾務第六分局駐臨河境陝壩鎮該局勘收烏拉特狼山灣



圖密淖西中兩公旂報墾地界址坐落在縣境東至千林廟西牌界爲界西至阿拉善王王爺地卽甘肅邊界爲界南至達拉特旂并杭錦兩旂報墾各地爲界北至狼山山麓以下爲界該地東屬狼山西屬圖密淖依山傍水地勢平衍惟測勘形勢自東北斜西南一百三十餘里應分兩段勘收查圖密淖地東西長約十餘里合面積約三千頃有奇而狼山灣地東西長約一百二十餘里南北寬約二三里至一半里不等平均寬以一里半計算合面積約九百七十餘頃共合面積三千九百餘頃內除沙石城灘溝渠道路不堪耕種及不能上水者約佔面積三分之一并劃留戶口召廟地不計外約可放地一千三百餘頃按照清混水渠水各地丈放計可收洋一十二萬有奇勘收該處界內不論生熟荒地但以辦別土質能上水與不能上水及收穫之多寡擬定等則酌定地價分五等上等清水地每頃荒價洋二百元下等混水地每頃荒價洋一百六十元上等渠地每頃荒價洋一百二十元中等渠地每頃荒價洋一百元下等渠地每頃荒價洋八十元每收荒價一百元附加一成五建設費五分實業費五分社會文化

## 臨河縣志

### 卷中

紀略

### 四

事業基金費以資挹注該地現已丈放過半約於十八年度內卽可放竣將來收竣時所有地數欸數約可超出原定預算此臨河丈放中西兩公旂報墾地之大概情形也

地方保衛紀略

自來國家保衛地方百計籌劃而不足地方各謀自衛羣力合作而有餘周官比閭卒伍管子軌里連鄉皆地方自衛之良法有清咸同末季曾湘鄉創辦鄉團其力足以芟除梟雄夷平大難其後風行海內終有清之世團練政策日益求詳臨河設治未久團政粗具規模然保境安民試之輒效所謂有治法必有治人其信然歟特作地方保衛紀略

按古臨河縣舊隸漢朔方郡自古籌邊之法莫詳於漢所謂實邊之政屯田之法慎封守嚴斤埃爲邊邑立百年之計不苟一時之安者其法必至詳且備惜我國史例於固邊設防之要略略而不書況時易勢殊代有變遷甚至終明之世地不內屬地方保衛之法無從徵考清乾隆八年河套歸薩拉齊廳治其時河套僻處西徧氍裘毳幕彌望黃沙勢難遙制光緒二十九年劃河套之地隸屬五原廳廳署寄居包頭鞭長莫及厥後三十年在後套降興長北五里白圪梁地方建修五原公署始設警察兩棚駐廳署此外仿鄉團之法設民警八十名分駐四區按民警官長曰民警佐官兵薪餉由地方

臨河縣志

卷中

五

徵集此爲後套地方創立保衛團之始惟地闊兵單分布不敷今之臨河卽前之五原西界民警之馬跡旂影有終年不得一見者時爲之地限之也至民國改廳爲縣四年五月五原王知事文墀以縣署在包遙制不便移治後套縣署以從民意六月以民警佐強萬義帶民警二十名駐強家油房卽今之臨河縣城地此爲臨河設立保衛之始六年奉令民警改編保衛團照章以三十人爲一隊每區駐一隊總團董以王紳同春充之其編制之法仿徵兵制團丁均由大戶保送限制綦嚴無如陽奉陰違人則濫竽充數游兵無賴兼收并蓄魚肉鄉民苛案勒擾之事往往不免保民善政轉而厲民縱之難圖激之生變已成尾大難掉之勢十年薩五包東警兵爲外奸勾結響應譁變五原西區保衛團李隊長虎東爲其所部范天保等槍斃尋以劉三洪代其職劉三洪爲綏西積匪在五原南區受撫地方人特加優容匯源水利公司劃剛濟渠地三四十頃歸劉三洪耕種聽其開渠澆水不責其值故不數年而財雄一鄉地方人之策勵而獎勵之者亦云至矣惜彼昏不悟憑藉保衛團勢力所至之處人人側目十四年臨河設

治蕭局長立置劉三洪於法經所謂自作孽不可追者歟蕭局長依法改編武裝警察隊七十名分爲三大隊以姚聯榜爲總隊長編置伊始壁壘一新十五年二月第一隊兵士內訌相率譁變倒弋橫擊槍斃劉隊長立即紛竄四鄉旋即就撫若輩旋撫旋叛習爲固然當局不能痛加懲創澈底改革養癰貽患各縣覆轍相尋禍機潛伏一觸卽發惜哉是年四月于局長景文來臨收拾殘局拾遺補闕復爲三隊規制如舊七月間國民軍全部來套分駐五臨部衆數萬悉索敝賦日不暇給正式武裝隊遂爲傳達軍書催送糧秣之差夫秋冬之交土匪蠶起姚局長聯榜親率該隊會同五原武裝隊及杭旂游擊隊合力剿匪歷時兩旬奔馳三百里卒能力挫強虜匪燄稍靖十六年一月國民軍全部西退是時地方大亂武裝隊之槍械搜括殆盡三月匪首石海率匪衆百餘突佔縣城勒索槍械孫局長國棟盡出警隊殘餘武裝予之臨河武裝隊至此人皆徒手空擁虛名焉六月呂局長咸來宰是邑深念夫武裝徒手不足自衛令各區董大戶設法籌備又收楊正業之槍十枝以增益之於是武裝隊稍復舊觀改編爲兩隊計

額三十名以柴高魁總領之以武榮楊正業分領之十二月王局長文墀接設治局任武裝隊悉仍舊制十七年春奉令改編保安隊額設隊兵三十名分三班以楊紳春林充大隊長以柴高魁武榮王化南分領之是年夏復改爲保衛團範圍縮減團丁減爲二十名以劉紳長義爲團董自是當道注重團務規制日臻嚴密實行徵兵制凡團丁均由大戶選送薪餉一概裁撤其少數團費及馬乾由地方樽節籌集民間不出養團之款費人人均有充兵之義務民間見其簡而易從也又痛念夫比年變亂仰賴軍隊保衛不如各謀自衛之甚便也於是不募而集不招而至貧戶出丁富戶輸械履畝抽糧按時徵款人人有自衛之精神人人結自衛之團體計自十七年秋冬以來雖迭經趙匪往返竄擾而數萬飢民竟無一從賊者又計自十八年秋冬以後以迄十九年春季全境內並未發生劫案而十百成羣橫行鄉里者更寂然無聞此可知保衛團之確能自衛其成效大驗概可見已近日奉頒保衛團法規法制嚴明程序周密依法編組頓復舊觀各縣長爲全縣總團長各區長爲區團長鄉鎮長爲甲長又有甲牌互保之

法務期澈底刷新無復游民潰兵瀾跡其間其槍械必重行檢查以清界限本縣彭縣長將縣團取消另編馬兵三十名歸公安局兼轄地方收省費之實效除革冗員之虛糜厥功偉已夫地方養兵爲地方用也乃各縣地方保衛機關平日優游無事坐領薪餉恒舞酣歌習爲固然一旦地方猝遇軍事而此正式鄉兵祇足供徵糧催草傳送軍書之用往往遣發一空欲求其守衛官舍保護庫藏而不可得更何望其荷戈前驅禦侮勦匪哉此真可爲長太息者矣噫地方日出養兵之費而不收養兵之用此又何怪地方人視之如贅瘤而斂手側足不樂供億也幸而天時人事紛集交乘外迫於萑苻之紛生知我民不能不亟圖自立內迫於征索之日困知我民不能不合謀自強或則幡然改圖毀家紓難或則憬然知悟破產充公採購槍械招募武勇俾期家自爲防人自爲戰散則爲商爲農聚則爲兵遠則內地各縣近則薩武固陽各縣往往一縣保衛團累萬盈千團幟高揭而潢池小醜輒望遠引而莫敢犯不可謂非我民衆窮極思返轉弱爲強一大機括也我臨河東障包綏西通甘寧北控蒙疆南襟秦晉省防國防

臨河縣志

卷中

紀略

七

鑄鍵在是倘能依照保衛團法切實推行或則堅壁清野烽埃無驚或則憑山帶河鞭弭從事將奇正可以互用攻守可以自如詩曰與子同袍與子同仇此豈獨一身一家之利國家邊計亦實利賴之矣機不可失時不可待吾願地方人亟起而直追之勿令作者徒以空文自見也幸甚

賦稅紀略 地方捐款附

禹貢三壤成賦周官九賦徵財國家取於民也有經制國民奉於公也有常供此古今之通義亦中外之通例也臨河在前漢隸朔方郡嗣後代有變遷迨金元之後隸夏州治省併無常終明之世地不內屬歷代文物典制散佚無稽欲考臨河賦稅成法斷自民國十四年臨河設治始特作臨河賦稅紀略

一 臨河縣政府徵收賦稅項下

- 甲 杭錦旗元字地段地原額一千五百頃官租每地一頃額徵銀一兩八錢照每兩合洋二元一角計算應合洋三元七角八分附加辦公費一成縣府留支七釐解廳三釐其未升科之地一律自十八年起每頃徵短租三元作為縣府行政經費
- 乙 杭錦旗官租照章丈青收租十七年共丈地六百餘頃徵洋一千八百八十一元八角六分九釐十八年丈地七百四十九頃六十三畝八分三釐徵洋二千八百三十七元一角九分

臨河縣志

卷中

紀略

八

- 丙 契約每田房產價百元徵正稅六元附徵財政廳辦公費二成洋二元教育費洋二成洋二元計價一百元徵正附稅十元

丁 紅契應徵全稅白契均徵半稅

- 戊 印花稅十四年銷洋六百二十二元七角三分十五年銷洋二百零八元十六年銷洋八百七十四元八角十七年銷洋九百七十五元七角七分十八年銷洋二千三百三十七元均照定章百分之十提成留縣作辦公費

一 臨河烟酒事務第四區分卡設置規制及稅率定額

- 甲 分卡於十八年二月一日設立
- 乙 分卡因係創設所有稅收比較尙未規定
- 丙 臨河烟酒稅全境全年約收洋兩千元
- 丁 臨河全年烟酒牌照費約收洋八百元分兩期交納
- 戊 分卡設卡長一員月薪洋四十元馬巡二名每月每名工食洋十元

己 分卡公賣因係創設尙未定額

一臨河塞北關分卡設置規制稅率比較各項

甲 分卡於民國十七年二月間創設

乙 分卡在縣境計有三處一縣城一秀華塘一黃羊木頭黃羊木頭之分卡本年二

月奉令移設陝壩并令臨河城稅務分卡事宜歸秀華塘分卡兼辦

丙 各分卡稅收比較自民國十五年地方多故收數銳減并未規定比較

丁 各分卡各設卡長一員經徵員一員稽查一員馬步巡各二名

戊 各卡長月薪三十五元經徵員稽查員月薪十五元二角伙食每員每月洋四元

馬巡每名每月工伙食費洋十三元二角步巡每名每月工伙食洋六元每月公

費洋二十五元

己 國貨稅額按值百抽二五徵收洋貨按值百抽五徵收如持有運照或子口票等

件概不徵稅每件徵收手數料費銅元四枚

## 臨河縣志

### 卷中

紀略

九

庚 無論何項貨物一律照正稅附加十分之一徵收

一臨河統捐局徵收捐厘項下

甲 統捐局舊名清源局臨河未劃分以前僅設秀華塘分卡一處至十四年設治後

仍舊設卡至十六年九月改名統捐局

乙 總局設局長一員月薪一百二十元文牘會計經徵各一員月薪三十元分徵即

卡長月薪二十八元書記八員月薪十六元稽查四名月薪二十元馬巡五名月

支工食八元巡士七名月支工食十元巡丁七名月支工食八元

丙 分卡五處第一卡駐善丹廟第二卡駐秀華塘第三卡駐鎮番泉第四卡駐天義

生第五卡駐東西場分巡處二處第一卡分巡處駐太陽廟第二卡分巡處駐陝

壩

丁 每卡額設分徵一員即卡長書記一員馬巡一名巡士巡丁各一名其餘稽查書

記等餘額仍由總局指揮分駐分巡處及各卡審察事務繁簡互相抽調概不拘

定

戊 每年比較以八萬元爲準徵數不足比較

按志書體例本境所有國家徵收機關於百貨徵額如值百抽若干及每年實收數目若干均須

詳載以資徵信本局對此不憚詳求如縣政府歲租印花塞北關百貨正附稅均得其確實

徵額獨統捐局函覆以捐收名目繁雜一時實難抄送故本局編纂對於統捐捐額略而不

詳特此註明

已 屠宰稅爲統捐局專管事項據函覆屠宰稅一項已於十八年度以包額四千四

百元准李子英承包一切手續可向該包商調查

一地方公益捐款項下

甲 牲畜捐向來指該款爲警團專款每馬騾牛一隻均捐洋四角附加二成作爲教育補助

費該捐款如不敷警團開支則由地畝或商捐彌補

乙 地畝攤捐如教育農林道路義倉營繕以及區社及地方教育公安財務建設差

## 臨河縣志

### 卷卷

紀略

一〇

務各局并商會一切經費均係量入爲出以預算之多寡爲攤派之數目近三年

每水地一頃攤捐不過十三四元

丙 商捐擔任公益費全部十分之二由商會徵收交財務局存支

按臨河自十四年七月設治凡關於修建城垣公署局所及設治局行政經費議定呈准由

地畝攤捐每地一頃捐建築費洋五元捐行政費十元當以亟於建築徵收建築費不敷開

支呈准由行政費挪用二萬餘元准由達旂地畝局荒價附加建築費項下挪還行政費迨

至十七年行政費無着經王前局長文墀向道署呈請改縣因與定章不符不得已呈請由

地方地畝照前定捐派行政費前例五份之一徵收每頃照收洋兩元并下不爲例呈准有

案迨十八年十月改升縣治行政費仍歸無着經彭縣長繼先呈請仍由地畝攤收凡升科

地准予留支官租作爲政費不再加派外凡未升科之已報墾地及外墾地一律按每頃收

洋三元以昭公允而利推行

水利沿革利病紀略

西北之大利在農田農田之命脉在水利自來開闢西北他務未遑首先經畫水利爲唯一之要政河套渠道縱橫即古人溝洫遺法古者遂人治野制其地而溝封之一夫百畝夫間則有遂十夫有溝百夫有洫千夫有澮萬夫有川古曰川澮即今日河套之各幹渠也古曰溝曰洫曰澮即今日河套各枝渠子渠也至匠人爲溝洫法起於二耜爲偶終於廣深四仞爲川即河套治渠土方之制也至稻人掌下地之稼以潄蓄水以防止水備乾涸也以溝蕩水以遂均水欲流通也以列舍水以澮瀉水防汛濫也即今日河套治渠築堰築壩劈梢放退水之法也地猶是地法猶是法善用之有利無害不善用之有利亦有害有明徐御史貞明注意西北水利嘗裹糧從二三屬吏週歷經度之信其可行疏陳十二利碩謨大計切實周至所謂小試之則小效大用之則大效也旨哉明季周用之論水利也謂大禹治水神功不過盡力溝洫誠以天下皆溝洫天下皆容水之地天下皆治溝洫天下皆治水之人水無不治田何所不墾况西北水利有基可圖不必創也善因其利而利之而已特作水利沿革

臨河縣志

卷中

紀略

一一

利病紀略

論永濟渠沿革及利病

永濟渠爲河套各渠之冠又名纏金渠何以曰纏金或因渠水滌纏作金碧色象形而名之歟或謂渠水寶貴價重兼金取義而名之歟抑因蒙旗地名如蘭鎖之例而名之歟均未敢臆斷也按永濟渠創於何人關於何年莫可詳考聞諸故老云渠在道咸之季有地商四十八家公共經理今之公中廟即昔年地商釀費建立公共議事場所規模亦壯闊哉當時各地商包租蒙旗外墾地連阡接隴用水均仰給於該渠渠道平時歲修及臨時要工地商等按釐出費通力合作儼然有同利共害之團體當其生地甫闢渠水暢旺歲告上稔每年灌地三四千頃收糧數十萬石惜價值低落不能遠販古人所謂粒米狼戾紅朽堪虞恍然遇之此爲永濟渠全盛時代迨至同治初季西師勦匪凱旋大兵就食永濟渠列壘百里拆聲相聞各大商竭力輸將絡繹不絕不三年悉索敝賦搜括殆盡兼以軍民雜處農事日荒渠工日廢各地商坐是失業強肉弱食爭相雄長爭地爭水械鬥劫奪儼然敵國起視該渠決



決巨瀾變而爲涓涓細流矣此爲永濟渠中落時代迨有清末葉光緒三十年中朝派貽欽使來綏督辦墾務收永濟等渠爲國有又規畫養渠之法勸蒙旗將附渠各地永租歸公所謂永租者永租歸公不再放墾之謂也按永濟渠屬永租地計八百五十頃始則渠歸官辦積弊叢生迨入民國改歸商辦減歲租每頃繳銀一十五兩著爲例該渠包商楊君茂林爲水利專家精心果力能衍王氏濬川之傳而參其變平日經營渠道以培養花戶爲第一要義謂花戶聚而後合作始有力花戶富而後大工始不誤早作夜思浴兩柳風統籌全局爲之開渠口濬渠道開渠梢沾溉日宏收益日增村廬雲屯鷄犬相聞此爲永濟渠中興時代是時也當事者應如何獎勵而扶持之俾令克厥全功何意功未及半又改歸包商李蘭青承包李包商既少實力又乏經驗舉全渠大權盡付之渠頭之手渠埝地蕪毫無成績獨其蓄水放稍一節尙足差強人意初永濟渠放稍入五加河僅流到距正梢七十里韓烏拉爲止七年夏河水盛漲永濟渠餘水充溢勢不能容五原王知事一面諭五加河下游各地戶迅濬河身預備引水又諭李包商曰與其閉水自利何如放水利人務將餘水盡量洩放以

## 臨河縣志

### 卷中

紀略

一一一

灌下游向未上水之地果爾遵照宣洩不惟五加河上游足用卽下游梅令廟萬和長烏蘭腦包大樹疙巴以至二分子此二百餘里內莫不旁匯交通計本年增澆地不下三千頃且永著爲例傳曰仁人之言其利溥哉其此之謂歟九年又改歸灌田社包辦無效十一年改歸匯源公司包辦又無效十四年國民軍石旅長友三總辦水利收各渠官辦仍無效迨十七年春墾總局大開水利會議廣集羣思俯順輿情始定官督民辦之法各渠各立水利社以本地之公正而兼熟習水利者充經理治渠之法始漸入軌道焉永濟渠水利社第一期經理韓君增祿第二期經理汪君治泉均老於水利經劃秩然此爲永濟渠由商包官辦改良時代此永濟渠近百年來沿革之大略也按永濟渠在民國以前襲用舊口進水不暢渠身寬不過五丈梢寬不及三丈長度不過七八十里自包商楊茂林重修渠口渠身加寬至七八丈長至一百四十餘里近年渠身通暢寬至十餘丈八九丈不等每年澆地不下三四千頃規模已大定已所有亟需改進者約有三端一曰濬渠梢以暢尾閘渠猶人身開疏胸膈以通其來路必先利導腸腕以洩其去路渠梢偏窄渠身水積不能容勢必旁決橫衝激

成裂腹穿脇之患惟開梢工鉅不在歲修之例可呈請公家補助半費由地畝攤出半費則欸易集事易舉水患可永杜矣二曰建石閘以圖經久渠中築壩向來全特土料少則需欸數百多則需欸數千築拆煩難澆灌不免稽延起閉拙笨渠流不免淤澄何如改爲石閘運用從心操縱在手計每閘需五尺長一尺寬厚石條五百件合以人工灰料不過萬元分上中下三游建三閘較之常年築壩似費實省一勞永逸何便如之三曰加高培厚以防漫溢堤岸種樹以固堤防重修工房以資聲應歸縣府專管以便指揮又各渠所同不獨一渠爲然也是在留心水利者加之意焉

#### 蘭鎖渠記事本末

渠何以蘭鎖名以地名也地何以蘭鎖名地爲蒙地襲其名末通其義無定字亦無正音也如高阜蒙人名爲腦包又名淖包又曰惱包也渠創於何代建於何人無官書無碑碣無百年世族傳聞異詞莫可詳考自前清光緒三十年貽欽使來套辦墾注重渠道地商李君振海治農業於五原西偏規模闊大與五原濬川王氏先後相望見蘭鎖渠久湮不治慨然以

### 臨河縣志

#### 卷中

紀略

一三二

興復爲已任於是虛心延訪各水利專家集羣思採衆議按諸實地試驗反復測勘比較其遠近高下之勢參合其順逆向背之宜出鉅貲庀衆工分段濬修披星而作戴月而巡冒風兩犯霜露巡察督課未嘗少息止勤者賞人知勸怠者罰人知愧且勸且愧是以工無曠而事易集計自渠口下渠正身至烏蘭腦包長三十餘里寬五十五尺深六七尺自腦包關兩稍一則通蘭鎖大櫃寬三十尺深六尺長四十餘里一則通丹達木堵寬三十尺深六尺長三十餘里上游利在合所以蓄其全力下游利在分所以暢其末流分合運用在乎一心所謂行所無事非歟渠水每歲澆地六七百頃沿渠廬舍雲連村舍駢列聲息相援守望相助豈第一方一家之利哉若李君振海者殆真能殖我民生洵非托之空言者矣

#### 論黃土拉垓河渠地沿革利病

按黃土拉垓渠全部地舊隸達拉旂渠創於有清初葉河曲楊氏其得名之由來渠舊有黃土淖包一座蒙人呼淖包亦曰拉垓故以此名渠渠主楊氏名字及該渠始創規模久已無傳至咸同之季楊氏中落渠堙失修沃壤荒蕪至光緒末季庚子教案發生達旂蒙民與天

主教失和迨聯軍迫京都清廷無暇顧及邊地外人遂單獨提出條件向綏遠當道及蒙旗嚴重交涉要求賠款銀十四萬兩綏當道與蒙旗協議以黃土拉垓渠地全部作爲一千四百頃抵賠教款銀十四萬兩當時外人條件異常苛虐時值我國不知外情及國際公例冒冒然許之遂令大好沃壤爲外人殖民地自光緒三十年外人接管後渠兩岸教堂逐次林立如陝壩蠻會大發公玉隆永勝家營子烏蘭淖丹打木堵始則七所迨後丹打木堵教堂取消又添三道橋黃楊木獨二所每堂設傳教士一二人施展其半麻半醉之侵略教化以愚我不識不知之貧民計夫授田按田分廩令我民衆負耒而來仰其鼻息以爲生活復於教堂附設學校俾全部教民子弟終日從事於誦經祈禱使人人只知有教務不知有法治只知有教士會長不有官府治外法權岌岌乎消磨於無形中良可悲已迨歐戰以後我國國際地位日進外交亦因之日有進步十四年臨河分治蕭局長振瀛對於黃土拉垓渠地幾經交涉嗣因奉調東去未果十五年東魯于局長景文對於該渠地日謀所以收回歸爲國有迭次召集紳董會議議決迭函鮑教士到署商洽鮑教士屢以請示總會爲辭事又中

## 臨河縣志

### 卷中

紀略

一四

止迨涿鹿呂局長來宰是邑呈准綏政府正式組織收回黃土拉垓河會議以書面邀請鄧教士到會該教士屢爽約不到復呈准以無條件收回派田委員全貴接收該渠計渠長一百二十餘里派石委員以驥接收該地計地一千零八十頃是役也舉三十年沉沒之領土一旦還我故物復我主權破我民衆昏昏之迷夢何幸如之何樂如之查該渠重修於民國十年外人借楊家河之渠所得之利益五萬餘金逐漸開渠所定歲修章程備極周妥該渠口在黃楊木頭東南十餘里出水由勝家營子村西北十餘里入五加河小支渠密如蛛絲大支渠計有蠻會大發公善召渠三道均長十餘里十七年包西水利局改爲包西水利管理科又踰年復改爲包西水利管理局每渠設水利社設經理一副經理一董事長一均由能種一頃地以上之戶推選十七年該渠水利社李皋當選爲經理劉期副之傅正業爲董事長辦理二年雖無成績可言尙能奉公潔己循從前辦事之舊章詎意十九年改選經董後迭次會議均主張將該渠上游劈寬六丈而對於下游並未計劃當時冒冒然通過冒冒然實行適值本年大河水勢異常洪漲該渠既經劈寬廓乎有容凡上游之地均可上水餘

水愈積愈大滔滔其來爭趨下游乃渠身逼窄容量太少以致決口數十道淹田二百餘頃是豈天災之靡常抑亦人謀之不臧耳作者無水利常識又無水利經驗竊嘗與二三水利專家晨夕過從亦嘗聞其緒論矣治渠猶治一身也疏導其胸膈以順其來路必先暢利其尾閘以開其去路設令尾閘不暢腸胃必致壅塞愈塞愈積勢必有穿脇破腹橫決旁衝之虞治渠亦何莫不然開寬渠口以利之入開寬渠身以使之容尤須開寬渠梢以使之洩此自然之理也三尺童子均知之不待有常識有經驗也自來善治水者無他焉曰公曰平而已無人已彼此之見存此之謂公無大戶小戶貧戶富戶之見存此之謂平以此治水何水不治然則黃土拉垓河渠善後之策可一言蔽之曰加寬渠梢而已渠身外民地也渠梢外亦民地也情形同也渠身之民地照章出費也渠梢之民地亦照章出費也其義務亦同也如之何待遇不同也且渠梢加寬亦非難能之事數十里之工程二三千元之經費借全渠通力合作之餘力分當事者醉舞酣歌之餘神但能多盡一分規劃民間即受萬分之保障此則渠梢各花戶日夜企望口不敢言而心竊默祝之者也曲突不及徙薪亡羊尙可補牢

臨河縣志

卷中

紀略

一五

用特正告之以爲鏡焉

創修楊家河子渠紀事本末

按楊家河子大渠爲後套各經費渠之冠其水利之宏深溥博與永濟官渠相埒時是渠開創前該處百餘里均沙梁耳自有此渠地加闢民加聚萬畝田歌千家烟火蓬蓬勃勃遂有日新月異之勢臨河之有四區也楊家河子渠爲之也誰謂水利之於地方無絕大之關係耶按今之楊家河子渠襲舊渠之名非襲舊渠之地也舊楊家河爲臨河西界西場楊氏創修於清嘉道年盛於咸同時代至光緒初季楊氏中衰地蕪而渠亦與俱堙詢諸故老舊渠規模狹小水利局於一方較新楊家河渠其大小廣狹不啻倍蓰當民國初元河曲楊君茂林以水利專家包辦永濟官渠因勢利導三年水利大治嗣爲有力者撓奪之不得竟其所施於是偕其諸弟春林文林鶴林週歷河套至烏拉河東畔審度河流詳察土宜見夫該地泉甘土肥昀昀膺膺百餘里一望沃壤亟待開闢慨然興殖我民族之思奮臂起曰欲爲我民族開百世之利爲我地方啓新造之區莫如就地開創一絕大規模之渠道庶幾其有濟乎時有尼之者曰先生之志則大矣其如工大費鉅何茂林蹙然曰我國人日日言實業矣

臨河縣志

卷中

紀略

一六

殊不知公家無實業社會有實業社會團體無實業社會個人有實業我輩不言實業則已如真欲著手實業也求人不如求己分任不如獨任之爲愈也於是相度地勢決定在舊渠迤東開創渠道時在民國五年冬預籌渠工糧款備購器具又復週巡測勘延請各水利名家往復辯論以折其中六年春庀工聚材開始修濬由毛腦海口重開渠口茂林先生躬親督工往來督課指揮夙夜無稍怠乃弟春林文林鶴林分段監視披星而作戴月而息迄六閱月開至烏蘭淖計生工已四十餘里沿渠地高亢上水無幾是時耗款已數萬矣族黨戚友爲先生危先生夷然守常度氣不稍挫爰與陝壩各堂教士商洽以各教堂包租之蒙地作爲地股每澆地一頃有以平分計算者有以七五計算者支配分利始得源源接濟盡以所得利益以充工費七年開至哈喇溝八年開至二道橋計大工已及半矣是年渠水不旺收益奇絀兼以地方迭遭匪禍兵災市面凋敝金融無可週轉渠工虧款萬餘元工人五六百名踵門日責索汹汹不可解勢頗殆矣先生舉全家之衣物簪珥牲畜器俱變價償還工費不足又重息稱貸而補之爲地方興利不惜毀家以紓難事後兄弟無後言婦子無評語

先生之信孚內外可知已九年遭黃虫災霉爛殆盡十年收成奇絀浩浩大工進行無費中止不能如登山者阻中道巉巖莫攀如涉海者陷中流危舵欲折借非有堅忍性貞毅心何克度此難關語云打牙和血吞又云豎起脊梁立定脚此之謂歟十一年開至蠶會梢退水渠十二年開至三淖梢退水渠此楊家河渠正身開濬經過之大概也計渠身長一百四十餘里寬八九丈有差深丈餘其開修支渠也第一道爲黃羊木獨渠長七十餘里寬兩丈四尺第二道爲烏蘭淖渠長六十餘里寬兩丈四尺第三道爲老仙渠長五十餘里寬兩丈四尺第四道爲三淖渠長八十餘里寬三丈此最大之支渠其他各小渠密如蛛絲綺交脈注不可勝紀計全渠每年能澆地兩千頃三千家賴以舉火焉按茂林先生天性篤厚敦內行資姿穎悟其先德擅長水利茂林髫年隨侍每行渠畔進茂林隨地指畫輒愷然有會稍長入而講求出而實驗日覺親切有味遂視水利爲唯一之事業每興一工徧集當事者令抒所見已乃參合已見往返駁論以求其至當其有不合者鮮矣卽間有格礙而仰而觀俯而察伏案兀坐繞室旁行臨流癡立終日終夜忘食寢迨至豁然通憬然悟泪乎其有得也則

## 臨河縣志

### 卷中

紀略

一七

有大呼狂喜覺人世之樂舉無以易此者先生有弟八人皆一門之秀均能踵起而世其傳春林鶴林尤日侍先生而得其秘授是役也春林專司其渠工庶務外交諸務鶴林專司籌備欸糧貨物並支發諸務相資爲用正其相得益彰矣嗟乎在民國四年前近渠百餘里舉足荆棘觸目汗萊茂林先生不過當地一紳董耳既非坐攤厚實可以左右人民又非手握大柄可以號召民衆而挺身獨任取甌脫之地而獨力闢之取久湮之渠而獨力開之坐令化礮爲肥化瘠爲沃起萬畝之芳腴黍油麥秀開百里之繡陌耕雨鋤雲致令肇造初區重開天塹不惟一方造福粒我蒸民爲省防計爲國防計爲實業家創新模爲軍事家立要塞有益西北大局豈淺鮮哉迄今春林鶴林諸弟守其成法爲之疏其幹暢其支揚其波助其流令我民衆擊壤鼓腹樂其樂利其利何莫非茂林先生之賜哉

## 教育紀略

臨河地處絕塞跡限遐荒兩漢隋唐間設郡縣而旋省旋併典物飄零忽夏忽夷文教睽隔白茅黃草莫發芹藻之香蠹幕駘漿難翹菁莪之秀梯航不出百里太史停采風之軒游牧溷跡兩河學士返問俗之轡自清末報墾而漢民始願受廩自民國分治而文教始萌胎胚究之地囿蒙俗文化遲開步步甘讓人後無如何也欲紀臨河教育經過請斷自十四年設治始特作教育紀略

民國十四年秋八月縣立初級小學成立

按臨河未設治前地方隸五原西區民國六七年間王知事催令辦學經紳董在強油坊丹打木獨白爾塔臘等處均設有小學當以迭經兵燹規制缺略旋興旋廢泊十四年設治經蕭局長在縣城先設小學一切章程均照部定以資提倡

十五年各區設小學一所  
十六年三月教育局組立

## 臨河縣志

卷中

紀略

一八

臨河教育局組織法及規程

第一條 本局依教育廳頒布教育組織條例與縣政府組織條例組織之

第二條 本局設長一人承教育廳及縣政府之命綜理全縣教育行政事宜

第三條 本局設督學員二人承局長之命職掌督察指導其職務如左

一關於縣內各教育機關對於教育方針及法令遵守狀況之督察宣傳事項

二關於縣內教育機關設施狀況之督察指導事項

三關於社會實況之調查及社會教育之推廣事項

四關於調查表格測驗方案之填記事項

五關於教育機關人員之考績事項

六關於教育機關經費之支配及用途之督察事項

七關於縣內教育方案建議事項

八關於其他督察指導事項

第四條 本局暫設事務員一人承局長之命職掌一切事務其職務如左

一關於會計及庶務事項

二關於預算計算決算之編製事項

三關於文件收發校對及保管事項

四關於統計報告事項

五關於文書之繕寫事項

六關於其他事項

第五條 本局遇必要時得添設事務員一人或二人辦理本局一切事務

第六條 督學員除督察指導外須駐局內輔助局長處理局內一切事項

第七條 本局暫設書記一人遇必要時得酌用僱員一人或二人辦理局務

第八條 本局爲謀教育發展及局務便利得設委員會研究之

## 臨河縣志

### 卷中

紀略

一九

第九條 本局辦事細則另定之

第十條 本法規如有未盡事宜得隨時呈請修正之

第十一條 本法規自呈奉核准之日施行

秋七月縣高等小學校初級女小學校成立

按兩等學校設校長一員國文教員一員科學教員一員文牘員一員夫役兩名高級

第一班學生十名第二班學生十名初級班學生三班共六十名全校每月薪費洋一

百三十八元現又加至一百六十元初級女校設教員一員學生二十名夫役一名全

校薪費洋五十八元現又加至八十元

冬十月縣立兩等學校初級女校校舍建築落成

按兩等學校地址面積寬長各三十丈操場寬長準是大門一楹大講堂六楹東講堂

三楹教員室三楹學生休息室六楹廚房兩楹女校地址面積長二十丈寬十丈前後

大講堂各三楹廚房兩楹兩校建築費洋五千元



十七年春各區初級小學校成立

按各區小學逐漸擴充至十七年春已報成立者計二十處

十八年春三月各村初級小學教授管理法照部章頒行

四月全縣學校組立學生運動會

按各區實行村制全境共組兩鎮二十村每村鎮一區設小學校一所是年四月王教育局長鑒於學風不振奄奄疲茶無起色特呈准組立學生運動會以是月十五十六兩日爲會期與其事者有高等學校高校長建章劉教員象日趙教員存南督學員張國翰張毅辰前女校教員耿秉信教員海桂芝及毛君萃良班君子儀律君聯璽分董其事學生到會者四百餘名主席爲黃設治局長彥邦外賓有檀旅長林楨李團長根車統捐局李局長潤公安局郝局長晉綱電報局黃局長昌建設局楊局長春林財務局李局長增榮一區區長李元楨二區區長陳占財三區區長傅正業四區區長楊鶴林中西醫士田信之計運動課程則有植竿跳高立頂跳高跳遠提燈競走頂囊競走

## 臨河縣志

### 卷中

紀略

一一〇

縫紉競走跳繩競走算術競走拋球競走奪旂競走八百碼競走四百碼競走打籃球比賽智者角智材者角材勇者角勇踵相接袂相聯絕塵而奔攘臂而進人人有競爭之志氣人人有競爭之精神是役也邑之人傾室觀憑軾望神爲眩目爲悚舌爲僞足爲側舉欣欣然相告曰初何料吾邑學子奮發猛厲一至於此也此又何事不可爲何業不可就也噫嘻此一舉也爲我學界雪虛聲之恥爲都人士鼓向學之心所關顧不重哉王局長文墀又慮夫各村小學校教育費就地籌欸之不公平也特提議一律按地攤派以劃一之又慮夫師資不良教授不能一致也特提議設訓練所以訓練之又慮夫教育費向無的款不足以經久遠也特提議每種地一頃攤抽糧二斗計共攤糧八百石援案減半價可領地二百頃以爲基金而厚培之王局長可謂知教育之務者矣

秋九月設民衆閱報所

按臨河風氣閉塞民智未開議定就東關街公所附設閱報所縣署及各機關捐報若

干每月應支公費由地方款挹注之

十九年春重申第一高小學校及各初級小學校制

按臨河城關各村學校經近年整頓勤加督查訓練日有起色本年春季復由彭縣長令教育局通令各校遵照部頒四二制課程方面現採用新時代課本逐漸整理當然依次就緒計全縣各校職教員三十六員女二員學生統計八百四十五名女生四十二名至全境教會學校計有六區向來課程課本往往自爲風氣甚至攙加聖經禱辭近來經教育局暨督學員正式指導亦逐次就範現又通令遵照部頒小學章程實力履行議定經費半由教會半由地方分認互相輔助而策進行又查社會教育如露天學校通俗圖書館講演所等項或限於人才缺乏或困於財力支絀又以近年災荒迭告地方多故旋議旋罷現在正值地方粗平風氣日開教育當局正在策畫進行中未敢視爲緩圖也

按教育原則有三曰學校教育曰社會教育曰家庭教育論其全體則家庭爲本學校

## 臨河縣志

### 卷中

紀略

一一一

社會爲末論其大用家庭爲先學校社會爲後古人重胎教立姆訓講少儀讀孝經卽家庭教育也今歐美之幼稚園等設置亦卽家庭教育也通古今中外凡夫魁儒傑士功名勳業耀耀寰宇者莫不由家庭教育而起醴泉必有源芝草必有根其所蓄積者然也我河套地染蒙俗向則由游牧而成部落今則由部落而始立郡縣舉不知家庭教育爲何事此何怪夷秀穎於荆榛委良材於薪棘也欲振興河套文化斷自提倡家庭教育始一面擴充女學及露天學校平民學校使全境三十歲以下之男女無不識字之人一面參合古今貫通中外爲家庭訂定簡單平易之課程總以養其德性開其知識強其體格使小子易知易行爲標準由是切寔推行不二十年我臨河不人文蔚興人才踵接者未之有也願告之關心地方者

### 商業建置紀略

河套自古及今地方之變遷凡三運一運爲游牧時代再運爲耕畝時代三運爲懋遷時代自有清之季雍乾內蒙歸誠以後而漢蒙始通往來自道成地商闢地以後而漢族始有交

易至其通市伊始均係以有易無交易而退其風近古自近年地力日闢民戶日聚列廛設市商業始萌芽究竟地固一隅交通梗塞貨少則壟斷病民貨多則壅滯病商商人無雄厚之資本無經濟之常識是亦關心市政者所當策勵以圖之也作商業建置紀略

(甲)商會組織沿革之經過

按臨河自十四年設治時因商務未興農會商會合組亦臨時變通之計第一任會長于相龍因比年地方多事諸務未遑經畫洎十六年冬正式改選張文煥被選爲第二任會長以于相龍副之當時經制漸備粗具規模十八年六月改選劉珍被選爲第三任會長于相龍董繼舒副之十九年夏奉令改爲委員制經合縣會員推選劉珍被選爲主席會中設文牘會計書記各員其餘組織悉如制惟會址向於農會合建迭經軍興地址遂久爲軍隊佔據十八年農會停辦商會暫借商號辦公十九年四月始在縣府西北民房爲臨時辦公地方是秋七月於縣府後街擇地建房十一楹商會自此始有定址焉

臨河縣志

卷中

紀略

一一一

(乙)商會經費之徵集

按商會每月薪公洋一百四十一元雜支費洋三十元常務員五員每員每月膳費洋十五元交際費五十元均由本縣各商店攤款項下開支攤款辦法按各商資本大小規定釐股能任一釐股者月捐洋一元不能任一釐股者每月酌攤

(丙)商業概數之統計

按本縣設治未久迭次招商設立行棧迄未實行統計全縣貨舖約有二百五十餘所

(丁)商業出入口銷路之比較

按本地商貨出口品以牛馬騾駝羊絨毛糧米皮張爲大宗銷數價值歲計約在四百萬元左右入口品以茶布烟酒糖紙爲大宗價值歲計銷數價值約在三百萬元左右兩相比較出口銷數盈餘在百萬左右

(戊)銷耗品粧飾品之銷數

按本地每歲銷耗品約計五十萬元以上粧飾品約計十萬元以上

(巳)全縣歲輸稅釐捐之概數

按本縣百貨營業歲納稅釐捐約計洋六萬元以上

(庚)漢蒙交易貨品之名目

按本地漢蒙交易以糧米布茶糖及牲畜羶毛皮張爲大宗

(辛)蒙旂需要品及漢商交換品之名目

按蒙旂需要品以糧布茶布茶酒爲大宗漢商換得品以皮張羶毛牲畜爲大宗

(壬)漢蒙交易通用貨幣之標準

按漢蒙交易除以物品交換外均通用中國國幣或間用俄幣照原定價值計算并不折色貼水惟均以現幣爲限紙幣不能通行

(癸)漢蒙交易度量衡之通行

按漢蒙商業出入向均通用中國之度量衡以爲標準惟蒙人買賣布疋間有論方者仍以中尺爲比例

## 臨河縣志

### 卷中

紀略

一三三

(子)出口商販經過蒙地之規則

按後山內蒙爲烏拉特前中後三公旗外蒙所屬分四十八家合哨漢商在蒙地營業須由該商先指明在某旂或某合哨地交易掛號交納營業捐若干即准在該處自由貿易概不禁制惟不得越境開設舖號然能禁漢商越境賣貨不能禁蒙人越境賣貨是亦中國任客投主不加限制之常例至所謂在蒙地交納營業捐並非蒙人稅課亦似內地各處商家之舖捐所謂在該地經商享其權利即當盡其義務也再蒙旂地面向未設征稅機關惟俄人強干外蒙內政居然在蒙地設局卡征稅且稅率苛重如有漢蒙貨物經過該局卡均照值百抽十征稅即漢蒙商販攜帶銀洋亦值百抽五征稅是不惟我國國際上橫生窒礙亦我國商務上受若大影響也果何以挽救而維持之哉

(丑)本境商業金融之現狀

按本境近年多故金融紊亂達於極點現已奉令將本地各商號所出號帖小票責成各該號一律收回全縣金融在市面流通者計有綏遠平市票十五萬元善後流通券

五萬元豐業銀行票三萬元綏遠總商會票一萬元平市官錢局及綏遠總商會零角  
票一萬元共計全境流通鈔幣約二十五萬元以上

臨河縣志

卷中

紀略

## 交通紀略

地方交通有四大政曰郵曰電曰道路曰輪舶臨河地處邊荒龍堆草白中道迴采風之轄雁磧沙黃臨流返問俗之轡聲息局於一隅梯航不出百里交通梗塞莫此爲甚近年地方設治當道對於交通要政逐漸改進而或限於章制規模未宏或限於財力推行未暢是亦無可如何者也特作交通紀畧

### 一日郵政

按五原當民國二年改縣以後僅設郵信代辦所一處自十四年臨河設治五原改郵櫃爲郵局臨河設治局注意郵政請於交通當局在臨設郵信代辦所因津貼寥寥由設治局每月津貼洋六元藉資維持然文書遲滯信件錯落往往不免而匯兌及郵包僅及五原而止商民大感不便自十七年秋季設治局停止津貼郵櫃益難支持黃鶴音沈青鸞信梗居者秋水望穿征人春雲盼斷矣當地紳董悉心調查按郵局章程非月銷百元以上之郵票不准設局事經開議籌商情願由地方每月代銷郵票百元函

## 臨河縣志

### 卷中

紀略

一二五

請郵政當局設局如果實行則由塞之通郵政之轉機在此一舉近日已照章設立三等郵局開始通行矣

### 一日電政

按五原於民國四年縣署由包移套經王縣長呈准設立三等電局於隆興長時值軍興時期聲息靈活成效昭著十四年臨河設治蕭局長呈准設電報房於縣城規定由地方每月補助電報房洋一百二十元凡關於設治局官電及地方之公電均一律免費此係臨時單行法純爲便利公務起見也乃五原電局逕向電報房每月提取款項臨河商電本少電報房全部薪費每恃地方幫款藉以敷衍更何有餘款補助五局且焉有以地方補助之款取而補助他局之理迨十七年電界奉一律收費之令臨河亦照章收費官紳據理力爭謂臨河邊要自應由公家設立電局經費由公家擔任無論何項電報自應一律取費乃公家既不設局又不發款惟此電報房經費全由地方補助地方既有出款之義務自應享不收費之權利若既出補助費又交電費是盡兩重

之義務而僅享一重之權利豈得謂平云云呈上不報是年冬黃君昌來領是局曲意調停補助費仍由地方擔任電費暫時記賬所願商電日增正式收益日多地方免盡補助之義務公家實行收費之章制此誠兩全之道矣十八年冬彭縣長提議創設由縣城至陝壩電話預算購料及裝置開辦費需一千五百元由地方公認現在積極籌備次第就緒從此防務商業息息相通倘或辦有成績各區仿行血脈貫注四境響應不出戶庭可坐而定矣

### 三日路政

按本縣渠道紛歧交通處處梗塞當夏秋各地澆水南轅北轍即熟悉地理且迷於嚮往路政不修良足深歎十九年綏遠政府發下賑工款六千元議定專爲各縣修路藉資以工代賑當由本地方行政會議議決(甲)由縣城往過五大股黃羊木頭烏蘭淖至陝壩爲第一路計長五十里(乙)由縣城往西門外渡口至第一區區所爲第二路計長三十里(丙)由第一區至蠻會爲第三路計長五十里(丁)由第一區至第二區

## 臨河縣志

### 卷中

紀略

二六

爲第四路計長四十里(戊)由第四區至陝壩爲第五路計長五十里(己)由陝壩至蠻會爲第六路計長三十里以上各路線議由各區長督促村長召集當地貧民修築業經呈報嗣奉廳令略謂案經萬字分會周副會長晉熙提議臨河工賑款應修築臨河縣道查得臨河縣城西至黃羊木頭轉北玉成厚烏蘭淖郭三牛棋陝壩韓巴圖以抵郭四牛棋轉東至蠻會大發公轉東南公益恒元泰隆正南經四分子大文祥以抵臨河縣城再由韓六告西修支線經德和泉趙海油房干汗廟以達陝壩又由黃羊木頭西北修支線經老謝圪卜以達楊櫃轉東北經九分子段三圪凸轉東以達郭三牛棋茲特繪具臨河區域圖並將應修道路註以黃線云云業經賑務總會議決通過函請到廳仰速按照全文所指路線辦理到縣當經縣政府召集紳董覆議僉稱周會長所指路線有須經過沙磧開築費工者有經過多數支渠轉折不便者當即呈覆仍照本縣原議路線六道修築以維原案茲又參合廳令原文之意添修幹路四道(庚)由烏團淖至楊櫃爲第七路(辛)由縣城北門至德和泉爲第八路(壬)由蠻會大發公

轉至聖家營子爲第九路(癸)由二區永安堡經仁義堂聖家營子轉經東皮房趨東至臨河東北界爲第十路如此添修本境各路洵可謂四通八達交通無窒矣

#### 四日航政

按本境大河流域既無正式稅關又無重大市鎮故往來河流均係過往船筏向無公立船廠大約東下者十居八九西上者十居一二誠以順流則費輕而歷時短逆流則費重而歷時長也西來之貨絨毛皮張藥材鹽炭爲大宗東來之貨糧食洋雜貨爲大宗臨河有航路而無航權其數不可得而考焉至本地運糧均係臨時僱用小剗亦屬客剗居多從無操舟爲業者倘能令各渠曲達旁通則舟棹運載不三日即可周歷四境較之陸運省費省時又何難帆檣林立艫棹交集舟棹之利將日增而未有已是亦地方之幸已



兵防紀略

自古邊防大計不外築亭障設斥埃立烽墩建寨棚奠山堙谷經田安屯其大要不外因地之利設險固守綏省西部南有烏拉山北有陰山迤邐西來至大奈太兩山逼近氣局爲之一聚故余太占天險一步自余太西來北山南河地勢平行形勢散漫過豐濟渠迤西北山南逼河流北漸至臨河西界氣局又爲一聚故臨河烏拉河占天險二步兵家學所謂要塞也自有清以前州郡省併廢置歷代變遷設防遺迹莫可詳考至入民國歷遭兵燹當道規時取勢遂趨重於防務然臨時補苴僅苟一時之安未遑百年之計時爲之勢爲之也特作兵防紀略

漢元朔二年置朔方郡縣十臨河隸之

後漢光武以并州領之省朔方郡之修都臨河呼道厭渾渠搜五縣以西河郡之大城縣隸之

晉永嘉後爲前後趙前秦地後爲赫連勃勃所據

臨河縣志

卷中

紀略

二八

魏太和中改置夏州東夏州領偏城朔方定陽三郡地

隋大業初改夏州爲朔方郡

唐關內道夏州朔方郡中督都府轄縣三

按唐朔方郡轄縣三其一曰朔方縣貞元七年開延化渠引烏水入庫狄澤溉田二百頃有鹽池二有天柱軍長慶四年節度使李德裕築烏延宥州臨塞陰河等城于盧子關北以護塞外有木瓜嶺又天寶初安北單于二都護并屬朔方郡歷八年徙振武軍此唐代朔方郡兵防見諸載籍可考者也

五代地爲李夏所有

宋地爲李夏所有

遼地爲李夏所有

元滅李夏立西夏中興等路

明初爲東勝等州城并立屯戍天順間爲蒙古所據

按明初王保保據河套洪武中追逐之築東勝等城并立屯戍天順六年瑪古里海阿勒綽爾博勒呼三部始入河套成化四年阿勒綽爾爲其黨嘉勒斯賚所殺併其衆而結元裔們都而居河套九年總督王越率兵擊逐之宏治八年北部復入河套未幾和實據之總制楊一清及總督曾銑先後請復河套均不報是終明世地不內屬兵防更不遑經畫也

清 初天聰間太宗征服其地編爲烏蘭察布伊克昭兩盟設正副盟長

乾隆元年設廳分治

乾隆二十五年設口外五廳薩拉齊廳隸之

光緒二十九年析薩拉齊廳轄境西部設五原廳

民國元年改五原廳爲縣治

按民國以前朔方郡地在鄂爾多斯旂地在北河以南南河南北統稱爲河套漢之朔方郡卽元魏之夏州隋唐因之至五代遼金均爲李夏所有元滅夏立西夏中興等路

## 臨河縣志

### 卷中

紀略

二九

明始終淪陷蒙古清雖征服其地末季廳分治而鞭長莫及邊防之計不詳然查咸同年間回回馬化龍構亂大軍西征河套爲大軍孔道五原全境柵寨相望烽柝不絕居然重鎮迨同治七年軍事告竣休兵纏金渠附近就食該地三載悉索一空此爲臨河駐軍極盛時代迨光緒二十九年析薩拉齊廳西部地設五原縣三十年匪首劉天佑由五原錦繡堂地方借復仇爲名號召黨徒數百人西至今臨河天德太地方扼險紮寨四出搶掠勢汹汹山西派王總兵率常備軍千人綏遠派譚參將湧發胡參將太才率八旂千人合兵蹙之殲魁宥從事旋平宣統三年哥老會乘革命軍紛起匪首楊建寅馬景濤藍玉堂等由阿拉善王旂揭竿聚衆來臨境大肆擄掠十一月攻陷強家油房墾務局搶掠一空綏遠當道派哨官張寶和率四旂馬隊平之

民國四年八月五原民警弓占元叛據東皮房綏遠騎兵一營攻不克敗潰

按弓占元之變聚衆不過三十人五原西路土默地馬場地東西場到處騷擾是年八月三十日佔東皮房五原王知事文輝迭乞駐軍一營馬營長品元馳救拒弗顧迨九

月十日派兵一連攻之遇伏兵潰三百不成列匪勢日張綏當道派鄭團長金聲率所部往剿鄭團駐隆興長月餘官紳乞援卒不報

九月寧夏馬護軍使福祥遣昭武軍統領馬鴻賓率隊援套屢戰皆捷匪遁入山

按寧綏界毗連馬軍使見套變日亟思爲固防卹鄰計派馬統領鴻賓率軍三百人來套辦匪甘軍均百戰健兒又兼馬統領調度有方屢與匪接有戰皆克斬獲無算匪窮遁入山馬統領欲掃清餘孽面商鄭團長約與入山會師於銀格爾圖以攻之馬統領簡精騎百人冒險深入至銀格爾圖鄭師爽約不至馬部馳入沙漠二百里至科布多卽俗呼爲可拔者也遇匪憩息馬軍乘其無備合團大進血戰三小時斃虜數十人匪潰圍東走是役也後山居民謂本地百餘年來不見官兵旂影今大軍從天下如霆如雷從此後山得享太平矣馬軍出山紳民椎牛釀酒載旂歡迎夾道而觀者數千人競嘖嘖頌神功不置時有忌功者造蜚語幸當事者調和之乃解

冬十一月馬護軍使福祥適拜綏遠剿匪會辦之命率軍來套西路防務以馬統領鴻賓任

## 臨河縣志

### 卷中

紀略

三〇

之

五年三月地方肅清甘軍回寧防四月騎兵四支隊接防

按西路防地以四支隊三營全部任之分駐丹打木獨狼山灣等地

六年二月匪首盧占魁就撫全部來套編制

按盧匪就撫所部編爲游擊隊一旅旅長以盧占魁充之該部不下萬衆內有僞皇帝一部份張九才等各部份份子複雜難就範張與盧不合擁僞皇帝西去編制兩月餘卒不就緒所部借徵糧爲名四出劫掠官紳哀請綏政府罔應殆棄河套爲甌脫矣盧部分兩團一團駐烏蘭腦包二團團長各爾計駐狼山灣計自二月至五月搜糧逾七千石民間儲蓄蕩盡劫掠姦淫之案日有數起居民逃散踵相接轍相尋王知事求去不得商妥紳董分立軍糧局以抵制之自是軍隊不復假徵糧之名居民得遂安居之志秩序漸復民生賴以保全爲不少矣

十月騎兵第四支隊會一師步一二營驅盧軍出境

按自盧軍出境後地方救平西路由四支隊分兵駐防歷七八九年悉如舊制十年改歸陸軍一師駐防

十一年陸軍一師步三營分防強家油房秀華堂等路

十四年春三月國民軍第八旅分駐強家油房秀華堂等路

秋七月臨河設治防務仍由國民軍第八旅任之

按是年秋國民軍開往甘境者爲劉郁芬全部

十五年國民軍全部駐套

按是年冬國民軍開往甘甯者有韓復渠部方振武部繼發者有弓富魁部陳希聖部

石友三部在臨駐防者有石海部蘇雨生部陳得勝部大辦四子部

十六年一月國民軍全部出境石海部東往防務由郭旅長鳳山王司令英分任之

按郭係奉軍所部王司令英部由護路隊改爲第三十四師以王英爲師長統之嗣郭旅東調防務由王師獨任之時有楊團長壽臣廣團長林駐二區侯團長子清杜營長

## 臨河縣志

### 卷中

紀略

三一

子玉駐一區李團長占彪金團長寶山分駐三四區尋升李占彪爲六旅旅長以李團長鳳山劉團長致祥分駐之他部東調

十七年冬李旅長占彪去職以袁旅長占鰲代之劉團長部調察以楊團長子清代之

按是年十月匪首趙青山率全股竄擾全境賴袁旅會譚旅合力追剿十八年一月趙

匪四竄賴趙司令承綬郭師長鳳山會王師長英所部合擊出境尋該匪首在五原授

首始告肅清

十八年三月袁旅調包以二師一旅王旅長奎元接防以所部蘇團分駐各區五月令王旅調五以譚旅長林楨代之以李團長根車王團長樹棠分駐之

按是年二月回匪攻陷寧夏經國民軍反攻驅該匪至距臨西路之大灘約萬餘餓軍侵擾臨邊殆無虛日幸檀旅長操縱合宜恩威並濟該軍互相携貳日漸解體去檀旅長捍禦邊防消弭鉅患功足多焉

十八年譚旅長辭職仍以王旅長奎元代之王團長樹棠步營賈營長燕如分駐之

十九年旅團駐防如舊制

按臨河西通甘寧東障包綏南臨秦晉北控蒙疆省防國防重重鑄鍵况蒙俄窺伺蠢蠢欲動設一旦有事臨河首當其衝閒嘗登高縱覽襟河倚山天然形勝且腹地渠道縱橫紛糾套搭天生濠塹處處可限戎馬此軍事家不可必得之形勢而坐攬其勝置堡設墩固可便一時之封守屯田立戍亦可成萬世之金湯是在當道以全力注之也幸甚

## 風土習俗紀略

積千百年之涵育薰陶積千百族之服習觀感而播爲正風蒸爲善俗此其道在因積千百年之封蔽錮蒙積千百族之附會沿襲而流爲變風傳爲陋俗此其道在革是故省方采風入境問俗而其國之政教可知也卽其國之人心亦可知也臨河在鄂爾多斯旂界其人善游牧好騎射相沿成俗由來已久漢唐雖經邊置郡覃敷文化然而忽華忽夷倏興倏廢治日常少亂日常多歷代風土習俗蒐采難詳自清末開墾而漢族始聚自民國分治而聲教始通究之風靡不競俗雜不純爰舉近年里閭之流傳以資後日訓型之根據特作風土習俗紀略

### 一 商業習慣紀聞

按民國四五年前套地交易純以銀爲本位市面尙沿用生銀納價者探囊而予收價者啟櫝而藏色不折平不較有古風焉民間通行貨物以茶烟糖布爲大宗往往以有易無入市者不持一錢歸市者飽輦百貨何便如之近十年來市上現銀如鱗角鳳毛

## 臨河縣志

### 卷中

紀略

三三一

近五年來市上現洋如晨星碩果紙幣充斥錢賤物貴商人利競錐刀無裨筐篋時勢遷流安得起而挽救之也

### 二 農業習慣紀聞

按河套農業以渠水爲命脉諺云地隨水走人隨地走甲歲南阡成聚乙歲北陌列塵民無恒業人無定居勢使然也所謂農功者耕不必深耕不必易坐貪天功不盡人力而載收載穫卽滿篝滿車地有餘力然也民國初元本境糧價奇絀斗米百錢石穀一金不能販遠只有囤藏所以普通中戶往往食客盈座予取予求而莫之靳迨至春耕時期借牛力貸籽種假食糧春付秋還緩急可恃甚或流民丐食初來則到處羅雀轉瞬則肇牽車牛固由於風俗敦厚亦儲積素裕者然也近五年來天災人禍靡歲不臻地力日竭收益日歎用途日多求過於供糧價昂貴生計艱難交際往來風俗日形澆薄環境所迫由來漸矣

### 三 社會交際酬酢習慣紀聞

按河套居民散漫向無旅邸千里過客非息裝於社區卽投轄於大戶鷄黍歡迎芻秣羅供懸榻待客截髮留賓西顧何憂東道可託良足感也他如逋客遊宦日暮途窮或則指困贈綿毫無吝色或則傾囊倒篋不待哀呼甚至年凶告賑效王倉出十萬之錢乞糴呼援學梁惠移兩河之粟曾不少靳惜焉惟風氣僿閉禮節疏闊進退不嫻揖讓野人之禮貌亦恭投贈聊備棗脩鄉老之享儀必敬所謂禮失求野正謂此歟

#### 四 婚嫁喪祭習慣紀聞

河套文化遲開禮典闕略嫁女必索重聘贏得兼金百鎰束帛盈筐娶妻敢望厚奩邀來何寶盈門邢譚滿座此婚嫁之特別習慣者也喪葬則練裳柳襯足以飾終祭祀則斗酒隻鷄無豐於昵此喪祭之尙近於古者也

#### 五 衣食住習慣紀聞

河套漸染蒙俗服御由來簡陋衣則羊裘一襲足以御冬食則酸粥一甌足以永朝住則茅茨三弓足以容膝家無垣室無牖居然有夜不閉戶之風衣無裘食無羹儼若守

### 臨河縣志

#### 卷中

紀略

三四

太璞不完之素此衣食住只求需要不尙安適之習慣也

#### 六 服飾習慣紀聞

按本地重女輕男積爲習尙床頭獅子坐也效七寶裝嚴其夫則形同奴隸坐上鳩盤尊恍被五雲裳帔其子則狀類乞兒而且押鳳堆螺得行人遮道爲幸品頭題足邀過客爭靚爲榮此又特別之習尙也

#### 七 沿習蒙俗習慣紀聞

按河套屢經淪陷夷俗沿習習馬不察內外之辨不嚴下帷則娣姒同幙男女之嫌不避滅燭則主賓聯床而且男不諳重婚之條居然同心重綰帶女不知從一之義倏爾撒手上別船兒與弟竟稱隔山夫與婦儼如陌路跳神跳鬼舉國若狂打掛打蹤歷驗不爽居焉遊焉已成牢不可破之習夫誰糾之而誰正之

#### 八 家庭教育狀況紀聞

按有子而養有子而教理也亦情也乃本地積習呱呱墜地竟忍棄嬰於平林莘莘舒

翹竟甘委子於牧豎當養不養當教不教此善士所以有育嬰堂之設官府所以有平民學校之組也

九 社會各種錮習紀聞

按地方錮習百年染之而有餘一旦革之而不足日言禁烟而滔滔者沉迷終夜日言禁賭而耽耽者竟坐場頭剪髮之令頻頒而豚尾披肩時慚面赧天足之會林立而鳳頭蹙步竟甘膝行此誠遷流不知所所極者矣

十 祠祀習慣紀聞

按南人尙神北人亦崇信巫覡大仙廟望衡對宇坐享萬戶香花龍王祠畫棟雕楹歌祀千年俎豆至於迷信風水則拜迎土神醫治瘍瘡則延招喇嘛此又囿於地理而成爲習尙者矣

十一 沿襲文字名稱紀聞

按本地漢蒙雜處不通蒙文不能通商不諳蒙語不能租地而且兒戲官場竟有羊官

臨河縣志

卷中

紀略

三五

車官夜官之名出人頭地羣上渠頭甲頭地頭之號遷就沿襲顛倒錯謬此則猝難變革者已

十二 氣候方言服飾之特別紀聞

按河套地處邊荒氣候方言服飾與內地迥殊聽臘鼓而納稼幽風易圖佩艾符而披裘巖瀨徧地冬行夏令圍爐食七月之瓜炙手灼膚暖氈續四時之火啾啾亂四聲正韻居亦胡亦越之間佶偈雜五方元音在不蒙不漢之界男效女裝雞皮膚也衷紅甲中學西服羊肚巾爭纏白頭猶是樵子牧奴攘臂則鉤鳴碧玉到處荆釵裙布過膝則帶垂茜羅此又習俗使然無足怪異者也



## 荒政紀略

自古備荒有政救荒無政周禮以荒政十有二聚萬民乃臨時補救之法非經常預備之策故倉人藏粟旅師聚粟遣人委積卽樹漢常平隋義倉宋社倉之先聲後世人廣土稀耕九餘三之制勢難復行漢代下巴蜀之粟移江陵唐人移西都之民食東都三代上謂爲變計三代下謂爲善政時勢之所趨雖聖哲不能不與時消息後套自民國以前地力沃肥民戶寂落一夫耕穫盈陌連阡萬室藏儲露積雲疊家給人足向不知有荒政之經畫比年生齒日繁登收日歉悉索日敝儲蓄日竭一遇水旱之偏災每患補苴之乏術十八年之義賑各區義倉之設置因時可以制宜有備乃足無患荒政始有權輿焉特作荒政紀略

民國十七年秋大饑官紳組立賑務分會以賑之

按臨河向稱產糧之區比以近年兵燹匪禍水旱災侵紛至沓乘民間蓋藏蕩然一空兼以東路包薩武固東勝各地方赤地千里比歲比不登負襁担簦來臨就食者絡繹於道不下數萬口又兼回軍攻寧敗東駐距臨百里之大灘饑軍萬餘仰食臨境是時

## 臨河縣志

### 卷中

紀略

### 三六

外來饑民計有四萬口之多糧價騰湧昂於平時十倍設治局黃局長彥邦教育局王局長文堉公安局郝局長晉綱建設局楊局長春林財務局李局長增榮保衛團劉團總長義一區李區長元楨二區陳區長占財汪區長治泉三區傅區長正業四區楊區長鶴林商會張會長文煥于會長相龍董會長繼舒公同開會照章組立臨河賑務分會以黃局長爲主席分四股辦事以公安等局各局長各區區長商會會長爲常務員及各股股長紳學商農各界共捐賑糧一千五百餘石賑款五千餘元經各區實地調查饑民共計四萬一千餘口賑區共分五組城關爲一組四區各立一組自十七年十二月起至十八年五月底止賑期分八期每大口半月領糧九升小口半之其清查饑民辦法則以各區區長輪易之如以一區區長查二區二區查三區是也而徇情濫列之弊清其收發賑糧辦法必分派委員隨時抽查檢視也而攪雜雜質短少斤兩之弊清其情願回籍者酌量道路遠近人口多少量給糧米川資也而流離失所窮無所告之弊清是役也在事人員皆以民命爲要義本良心爲主張精乃心勤乃職不畏難不

辭勞不憚煩檢查必確鈎稽必嚴升合必較顆粒必惜澤必思普被惠必期均沾終其事入無冒領數無浮收糧無濫發歷時六閱月濟民四萬口盡人無缺望比戶無浮言考其成績惟三區傳區長爲最優彼以教會之觀念施慈善之手續尤能挈領提綱淪肌浹髓其一二四區均能立起轍鮒望慰哀鴻正在辦賑時期趙匪大股兩次竄擾各區饑民竟無一從匪者此可見辦賑認真能使各得其所之一證夫臨河一邊荒新建之邑耳賑務大政官無成憲野無前例而官紳一體同德同心急起直追竟能始終貫徹綱舉目張如此此可見爲政在人天下事之大可爲也後來者可以鑒已

十八年春二月綏遠賑務會分發賑糧賑衣到縣悉數支分之  
按綏遠賑務總會分發賑糧三十四石賑衣八百餘件由包運局當卽支配散發呈報

十八年九月設治局地方行政會議教育局長王文墀提議積穀設立義倉經全體通過執行之

## 臨河縣志

### 卷中

紀略

三七

按徵糧散賑爲臨時補苴之計可以救偏災而不足以備大荒周禮五黨相調及移民通財實爲救荒之本惜去古既遠其法不詳其次則積穀設倉漢唐下奉爲良法王局長有見於此特提議地方積穀辦法莫如建設義倉原議每種地一頃捐穀三斗以四千頃計應捐壹千貳百石分城關四區立五倉存儲規定倉穀管理保存收放及春借秋還章程與糧荒平糶糧竭賑放各細則以垂久遠而立經制案經全體通過於本年實行嗣經彭縣長及白縣長分飭各區察看情形設立義倉如此良法果能官紳慎選公正耆老負責經理可期百年無弊雖有災荒吾民可以無饑矣

農業林業紀略

河套以農立國農業擅西北之勝然地理未盡闢地力未盡開其於深耕易耨之常法一易再易之古制曾不少留意更何論新法詢以當地農業應如何改良均僑舌而莫能對所謂終身由之而不知其道者歟至於河套林業近年來戶口日增建築日多感於木材缺乏之困難又深知隙地之多沃壤之富水利之便驗人事察天時審地利無在不適宜於造林及詢其造林之本源及造林之作用則又各執一說各據一是余嘗延訪當地專心農林有學識兼有經驗之士與之往復討論特取其因地制宜規時定制簡而易從可坐言即可起行者莫如耿君房君兩說用特登諸簡端以爲先導後來者仿而行之引而長之卽糾而正之補而劑之均可以爲嚆矢焉特作農業林業紀略

臨河農業改進芻議

河套農業三世老農行不著習不察由之而不能知外來僑客無經驗無比較知之而不能言言之而不能切此所以企圖農業者亟欲延訪周諮而求得要領也耿君德忱

臨河縣志

卷中

紀略

三三八

以魯北雋才擅長科學尤究心農林樹藝實業來套領墾經營規畫皆有心得本諸實地之試驗加以精密之研求參以往復之駁辯罔不持之有故言之成理矣客有問於耿君曰河套沃壤千里地利占勝農業應蒸蒸日上矣乃何以地不加闢也民不加富也粟米不加多也子能得其受病之處而治之乎耿君愀然曰吾知之吾不敢盡言之寧使言之而不用不忍用之而不言其一曰排除障礙河套農業以水利爲根本各渠灌田除二三道真正農民自開之渠能水利公沾外其餘官渠商渠管理者旣形格而勢禁主持者又假公以濟私甲地則萬流分潤乙地則一勺未輸甚或自封自啓曲防屯膏坐令旁決旁流以鄰爲壑利民其名厲民其實農業尙可問乎擬請仿行前達局王局長建議水利歸地方官承辦以每年澆田之多寡等其殿最嚴定賞罰責專情親費省勢便有百利無一害便國便民便地方特不便於贅瘤機關駢枝用款耳倘能仿行事權旣一責成亦專水利日宏農業未有不日進者何障礙之有其二曰化除意見天下事自用則敗自專則錮閉關自守齷齪曰此我之殖民地未有不立蹟者近年齊

魯燕豫之士鑒於內地人滿爲患更兼軍興未息實業墮落不得不另有企圖往往携絕大資本負耒遊套受廛領地此輩知識階級人士甚願與當地勞力界交換智識爲精神上之輔助指導工作爲資力上之餉遺河套爲中國之領土卽爲全國人民之公產與其故分畛域終讓後來之居上何如不分町畦同享無量之利益主伯亞旅吾同胞也比閭里鄰吾同體也通工易事併力合作農業焉有不一日千里耶其三曰分辨土宜臨河地質曰黃膠土曰黑土曰沙土黑土沙土宜麥黃膠土宜豆蓋麥性喜鬆和豆性耐長養地氣有剛柔穀性之資生隨地質爲發育然黃膠土雖膠滯任令載芟而載柞以化其結深耕深耨以通其脈並非不適宜種麥此人工可化地質之證也獨怪套農坐食天功不盡人力動謂生地易於種植遂厭薄熟地竟有舍其買地另包生地者惰農苟安抑何可笑殊不知周官制地法不易之地家百畝一易之地家二百畝再易之地家三百但使更番休息地力卽互爲週環又何生熟之分焉其四曰改良農器河套農器窳劣其最須要者曰犁曰鋤曰鏟本地之鋤尙可應用惟犁式過仄且直耕

## 臨河縣志

### 卷中

紀略

三九

時用力多而鏟地窄莫如改寬至五六寸成側面形省力旣多闢地又寬便何如之又鏟腰太仄鏟鏘太輕仄則開隴亦仄不惟不能芟草抑且不能生苗太輕則播種不易深入費籽旣多出苗亦不勻故加寬加重以劑其平而適於用其五曰改用肥料周官草人掌土化之法以物地相其宜爲之種辭剛用牛等法適於不必拘泥仿行然河套牧廠林立牛羊馬駝之糞就近輦運不竭化無用爲有用能令地移其氣礮變爲肥樹植罔不蕃滋此又贊助地力之一法也其五曰捍禦水災從來大利所在卽大害所在善治水則有水利無水患不善治水則有水利亦有水患擬仿周官稻人遺治以瀦止水以防止水以備乾涸以溝蕩水以遂均水以資流通以列舍水以滄瀉水以防泛溢與水利爲節宜爲水利設保障農夫所以無恐歲事所以屢豐也至於防旱防潦防蟲防霉防霧防黃黑丹諸法可參照中外各法農業之發展可翹企而俟之矣

### 關於臨河急需造林之管見

民國十九年春四月房君魯泉呈准縣政府領官荒地二十五畝於城北試辦苗圃以

爲企圖林業者倡甚盛事也客有前席致請者曰子來臨有年矣日日言林業口講之指畫之早興夜思無少息究竟驗諸過去考諸現在預察將來子果能發展林業而貫徹其主張乎抑試可乃已需以歲月以待其成也房君瞿然曰旨哉齊人之言雖有智慧不如乘勢雖有鐵基不如待時我臨河隙地如是之多地質如是之沃水利如是其互貫交注而又歷嘗材木缺乏之痛苦確見造林之實效當是時也勢有可乘時不能待有導斯從有響斯應林業之興其在斯乎其在斯乎今將臨河森林興廢之沿革及將來發展之利益詳述之以餉同志焉一日臨河林業阻滯之原因查臨河田地分墾地外墾地兩宗外墾地大戶包自蒙旗轉而分租各花戶人無地權誰肯植樹墾地領自大戶第規目前之利不作百年之圖况地隨水走人隨地走人無定居居民鮮世業各租戶春去秋還更無植樹觀念此其一因近年蒙旗多數放墾人口漸次增加對於森林有無之利害人漸覺悟惟後套故習每年白露以後牲畜滿灘滿谷踐踏樹木蹂躪秧苗恬不爲怪口頭誥諭正式交涉均置諸不理故植樹者保管無法人多氣沮此其

## 臨河縣志

### 卷中

紀略

### 四〇

二因三日臨河造林之利益套中向來需用木材全恃西來筏船輸入接濟近年來河路常梗又兼西來木植有減無增甚至拱把之木貴逾拱璧經寸之材珍如寸珠萬廈廣建尋巖搜材百堵日興停工待料良足太息設能迎機植樹以地十畝計可植樹兩千四百株十年成材每株最低以價洋兩元計可收四千餘元之利益除臨時保管及常年培養費至可少可獲三千元之利益較之種穀之利可加五倍雇或者曰人人植樹處處植樹得毋價值低落無利可言歟不知此後戶口日增建築日多製造日廣十年之中仍是求過與供斷不至供過於求證之奉吉熱河森林瀰漫山谷而水陸絡運不絕於道其價有日增無日減可爲明證二日造林保管有法本境試辦林業預防牲畜踐損必須繚以三尺高之矮垣垣外護以三尺深之濠凡民堡村鎮街舍傍均限令植樹若干嚴定保管責罰章程責成村閭長完全負責以植樹多寡及保全損失樹木多寡爲考績之殿最凡故意損失樹木者按現時價值加十倍罰賠村閭長亦嚴重處分之事當創始懲一警百絲毫不容假借法立必從令出必行乃克有濟四日保護苗

圃以資倡導苗圃爲森林之母他日千百森林皆由此苗圃所孕育先立一苗圃以爲標本然後每區須立一二所凡苗圃購籽取秧力所不能及者官紳應輔助之放水澆水勢所亟需要者水利社應維持之強梁掠取人畜侵害官府應嚴制之迨至樹秧長成也酌中定價分發各區村既盡特別之義務應予相當之權利吾意取不盡用不竭可以製造無量數之森林不出三年綠蔭參天碧雲匝地林業未有不日新者也五日收林業間接之利(甲)固堤防凡渠岸有樹之處根柢盤固永無冲刷之虞利一(乙)調氣候河套寒燥不時氣候失調森林多則吸收風沙消納烈燄天氣適中利二(丙)防旱災森林繁茂足以納炭氣吐吸養氣雨澤自多利三(丁)活地脈地中水脈往往聚於樹根古人傍樹鑿井可爲明證利四(戊)增燃料套地煤礦未興燃料支絀萬分森林矗立則繁條支柯材不可勝用萬戶炊烟不至中斷利五近數月來地商大戶及有志士民踴躍爭先分秧購種實行造林者接踵而起統計此最短期間臨河新增樹株已不下二三十萬是亦林業前途大好現象也魯泉不敏願與地方人士共圖之

全境蒙旗界址戶口生計保衛禮俗召廟紀略

恢復久淪之疆域開闢重新之版圖漢唐故址遠而難稽蒙旗舊封近而有據所以有清建置廳縣均以旗界爲界論畫地之由來則旗爲經而縣爲緯論治邊之大略則縣爲經而旗爲緯方今五族共和漢蒙一家鷄犬相聞聲教相暨將欲躋同軌同文同倫之盛而進於無猜無詐無虞之休必辦其疆索之廣狹計其戶口之登耗察其生計之盈虛觀其保衛之強弱察其風俗之純漓紀其宗教之盛衰然後可以爲行政施教立養敦化一道同風之張本焉作蒙旗界址戶口生計保衛禮俗召廟紀略

(甲)全境蒙旗之地界 按本境蒙地分四旗曰烏拉特前旗即西公旗烏拉中旗即東公旗曰杭錦旗曰達拉旗烏拉前中旗地套搭廻環向未分界由五加河北岸起東至義和久西至阿拉善王旗東界止東南至達拉旗地北界西南至杭錦旗地北界地約四千餘頃達拉旗地自公益恒起北至五加河南岸南至公中廟西至大發公南白淖包東至剛濟渠西岸地約五千餘頃杭錦旗地東至剛濟渠西至烏拉旗地南至大河南

臨河縣志

卷中

紀略

四二

岸北至古新廟灘地約六千餘頃

(乙)全境蒙民之戶口 按杭錦旗理民官府一曰中巴噶大臣名八圖布浪的所屬蒙民一百二十戶男口五百五十名女口五百餘名計一千餘口一曰西八巴噶大臣名八達葛代所屬蒙民二百一十餘戶男口九百十三名女口八百二十名計一千七百餘烏拉前中旗地均坐最大陰山前麓勢如弧角形蒙民寥寥共計不過二三十戶男女丁口不過百人達拉旗理民官府曰西召朋桃賴梅令所屬蒙民百餘戶男五百口女四百餘口約計九百餘口

(丙)全境蒙民之生計 按達拉旗蒙民戶口地不分男女每口發給地兩頃杭錦旗蒙民戶口地向以個人勢力之大小爲受地多少之標準既不能計口授地即不能稱物平施有力者坐享膏腴無力者貧無立錐立法不良是亦專制流毒之一班已烏拉前旗蒙民戶口地計二百五十頃中旗地報墾尙未收界並未劃定戶口地數俟再詳考至牧畜乃蒙人天賦自然利權無論何戶未有不養牛羊者惜各旗理民官府不能提倡

勸導因其所利而利之故各戶牲畜數目素無精密之統計明晰之比較徒恃我方面比戶調查彼蒙民各懷疑慮其牲畜狀況數目知之不言言之不盡總之全境蒙民畜羊不下萬隻畜牛不下二三千頭蒙人食料取材牛羊居多此外日用簡陋無他耗費故目前景象官府雖不能代謀其生蒙民尙能自謀其生也

(丁)全境蒙旗之保衛 按各旗保衛均設有遊擊隊烏拉前旗游擊隊五十名以小梅噶克加拉長之中旗游擊隊五十名以阿拉布長之杭錦旗兩巴噶所屬游擊隊共二百名以八圖布浪的與八達葛代分長之達拉旗游擊隊四十餘名以朋桃賴梅令長之查各游擊隊性質以安輯地方保護蒙民爲宗旨同是國土同是國民自當無分畛域捍衛地方臨河十五年匪燄日張杭錦旗游擊隊竟能協助警團奮身爭先合力剿匪具見深明大義地方紳董莫不欽佩嗣後數年遇有寇警均能聯絡一氣頗資倚畀各旗如果仿此行之何慮地方之不靖耶

(戊)全境蒙旗之禮俗 按蒙人階級分三種曰台吉日喇嘛曰黑人黑人服役貴族者曰

## 臨河縣志

### 卷中

紀略

### 四三

奴才服務召廟者曰黑徒蒙人中黑人最賤最苦即其婦女子弟均爲貴族之奴才性堅樸有毅力能履險耐勞惟服從是其特性視官府如神聖見官則屈足典禮則膝行習與性成由來久已近日狡詐侈驕無復從前樸厚風氣所趨者然也其王公服飾仍尙舊制袍褂頂戴相沿勿替平民則純尙布服寬領大袖繫以佩帶重重暑日赤足冬襲老羊皮裘不裝面男子尙拖髮辮達旗風氣開通近年頗有剪髮者亦吉光片羽也女子袖闊衣寬裙長拖地珮環簪瑱極紛沓重且笨喜塗飾堆螺描黛以爲工處女未嫁則編辮旣嫁則結髻髻用膠刷光可鑑人髻不恒束因束一次須膠一次也飲食以乳食爲上肉食次之乳品中取鮮牛奶以鹽類和之以茶調之曰奶子茶以作奶豆腐之漿覆之俟其酵酪久復蒸於鐵釜塗以牛糞使閉其氣味蒸氣自在流出卽爲酒曰奶子酒又以新奶和水俟其酵酪帶酸味名曰酸奶子爲蒙人飲料中美品能却暑解渴取新奶置盎中稍靜油上浮濾以絹布使淨徐煎之結如金黃色如蠟色味遠過舶來品宴貴客餽至友始將之名曰黃油此外製奶豆腐製牛酪以水化以火化無非以



氣化其製炒米其法不外曰乾曰淨曰透故能咀嚼彌甘行商行軍視爲適用之糗餌王公均有府宅普通蒙人均在蒙古包間有土屋名曰板身然院內仍置包示不忘本也包製取圓形皆面南上架爲梁若張傘蓋然寬深十尺至十五尺週圍圍以氈數層束以毛繩門高三尺五寸寬二尺餘男女分左右居其中間設佛龕家主位龕前有宅中居正之象焉有客投止未入包先投鞭於地然後入趨左主人以爲知禮款以酒漿若再通蒙語益足結主人歡招待禮節送哈達換烟壺客如式敬答之蒙俗詳於上下略於內外男女之嫌不知避忌平時嬉笑戲謔履舄交錯恬不爲怪甚至兄妻其姒弟妻其嫂者時所恒有故無孤憤之男無終寡之女惟婦人再醮必歸母家夫家聽之婚姻不計門第不問行輩不問名不納采以家之貧富定聘資牛馬之多寡婚時居然行親迎禮男子腰弓矢乘駿馬往迎之女子紅巾覆額乘馴馬偕婿歸登堂不交拜入幃不合盥新婦飯後粧飾出堂與戚友爲禮送哈達烟袋均如儀若喪葬有力者延喇嘛誦經以火化屍囊骨送五台山貧者禮懺後投屍於野三日往視若爲禽獸攫食則狂

## 臨河縣志

### 卷中

紀略

### 四四

喜否則家人戚戚悲平日日用極簡單男子出外牧畜遇天變女子趨而助之歸夫供力作女治家事女紅不甚留意獨於榨乳諸事爲全責娛樂以跑馬爲首務無老無少無貴無賤均善乘控馭有法又善角力決鬥比賽身命不顧惜有羅馬人風氣殆半由天賦半由人事歟

(已)全境蒙古召廟之設置 按蒙古大召多係奉勅建修小召係由蒙人捐置大召膳召地三方里小召膳召地半之烏拉前旂地一日狼山畔地方別拉圖廟活佛二尊一日口口淖地方推末廟烏拉中旂一日五善地方察汗高廟二日三拐後口子地方五郎托拉蓋廟三日狼山灣地方東修廟四日三淖西北山裏孛拉廟五日太陽廟六日後山畔地方陰山代廟活佛二尊杭錦旂一日千友廟漢名廣堂寺活佛二尊二日梅林廟活佛一尊三日加東巴廟活佛一尊四日素拉各廟活佛二尊五日樹爾台六日章嘉廟七日察汗淖廟達拉旂一日班禪召二日善達公廟漢名宣化寺活佛一尊三日古新廟漢名樹拉台廟考蒙古崇信神佛發源於漢盛行於唐喇嘛分紅二教紅教爲

寧夏巴派准肉食娶妻能降墨經咒人死黃教爲噶達謨派起於宋仁宗時自元世祖利用宗教以羈縻強蒙有清仍行之而亦效凡爲喇嘛者輕其差徭故每家三丁必有一二人充喇嘛又有所謂呼圖克圖稱曰活佛蒙民奉爲上帝天神不可侵犯尤可笑者聚石爲堆名曰鄂博春秋致祭必敬必誠迷信愈深對於生計愈不知過問無論其他就後套二十年前蒙民戶口比較現在當不止減少十倍應如何灌輸文化破除錮習使其從事墾植牧畜導以同種同族之義養其沈毅慍悍之氣斯人人皆袍澤人人皆干城以固吾圉以張吾威有餘矣特推論及之以俟夫有政柄者鑒焉

臨河設治局蕭局長振瀛事略

蕭局長振瀛字仙閣吉林依蘭人少秉異才抱不世之志尙肝膽與人無町畦無城府見義勇爲不知工趨避計禍福以是鄉國咸推重之民國初造奔走國事爲異已者所嫉幾瀕於危十四年來綏上游一見卽目爲國士倚如左右手是年秋委充臨河設治局長臨河初分治爲綏西巖疆北通庫俄西扼甘新襟山帶河天然形勝爲國防計爲省防計非有長駕遠馭之才不足立長治久安之計 公下車伊始獨任艱鉅首先延攬人才凡地方紳士公忠貞亮及有一材一長者罔不優異而特起之尤復廣詢周諮考察地方之政治實業經過之成迹與現在之情狀以爲創設張本於是披棘芟荊宅中正位爲之區畫疆理奠定城社建築市廛創設校舍謀必協衆事必躬親舉措必合人情取舍必衷輿論邑之人見其平民以出治也富者輸其財貧者効其力智者貢其謀巧者獻其藝奔走偕來羣起而聽官府之指揮公乃沐雨櫛風早作夜思所以獎勞撫慰之者無弗至故凡百建設工無曠料無廢欸無糜事無墮民無後言士無非議在事者無惰色無媮容不罰而人自畏不賞而人自勸不三

臨河縣志

卷中

事略

四六

月而大工告成 公誠所謂善於用衆者哉 公之馭衆也如執六轡御羣馬而一塵不驚公之立政也如以快刀斬亂絲而百結立解 公之執法也如然通犀照鬼物而羣陰懼伏如縱鷹鷂擊梟鴟而禽薙無遺且也時值軍事交棘臨河當甘綏孔道悉索敝賦急於星火公以隻身支柱之他人瞠目咋舌皆望望然去 公獨如持危舵於驚濤駭浪之中而穩渡重洋如扛九鼎於金戈鐵馬之場而平貼委地 公眞所謂智周萬物力包萬象者歟惜任事未久奉檄東調不得竟其所施邑人憩遊棠蔭嘖嘖頌神君不置古人所謂孰殺孰嗣庶幾近之矣

臨河設治局呂局長成事略

士君子經世之學爲其大者遠者而已至錢穀簿書之瑣瑣分其餘力舉而措之也有餘若呂公咸之治臨河此道得矣呂公河北涿鹿人名咸字著青幼聰穎束髮受書目十行俱下父老目爲大器早年蜚聲校黌績學篤行天性孝友與人交重然諾有肝膽壯歲關心國事服務外部熟習中外國際情狀十六年充綏西水利總辦嗣又兼任臨河上游殆以公將大有爲特畀以兼職使之爲所得爲歟公感逾分之知抵臨後勤求民隱務在解除煩苛以與民休息境內駐軍複雜供億無算公齷齪力爭約定額制額外莖草顆粟不住強索民稱便之先是臨河城工築未半而止石海之變憑陵闌入士民遂注重城防公堅持修城之議屬紳商分董其事公日夜督巡無少息三閱月而工告成是役也支款一萬八千有奇於地方公益費內撙節用攤派并未加重民不勞財不傷可謂善於得民已先是縣西境舊有黃土拉垓河渠創於河曲楊氏尋就湮庚子教案達旂失和外人以該渠地賠教條件異常苛虐爲我北方外交史最痛心之事近年河套教務澎漲全賴該渠地利益操縱我

臨河縣志

卷中

事略

四七

民衆官廳無如之何也十七年北伐成功不平等條約逐次刪除公因利乘便擬收回黃土拉垓河教堂渠地上書反復陳請上峯壯之一以任之公正式組成委員會遴任熟悉外情聲望素孚者佐之時有王君文墀李君增榮楊君春林于君相龍君全貴石君以驥爲秘書爲委員爲接受員曾以書面邀該教士等到會該教士延稽爽約不得已請以無條件收回呈上報可派員接收計渠長一百二十里地一千零八十頃一旦收歸國有光我故物還我主權張我國體樹大河以北外交勝利之先聲是役也排衆議破羣疑嶽嶽獨行俾貫澈始終之主張何啻以暮鼓晨鐘喚醒我北方二十年外交之迷夢也厥功亦偉矣哉至於提倡文化促成民治善政書不勝書去後留思至今嘖嘖頌不絕於口焉亦足以風已

臨河設治局王局長績世事略

王氏爲太原望族明德之後代有達人兩千年來世德懋蒸其人多易直溫良達則爲一國循吏窮則爲一鄉善士前後輝映若合符節吾於雁代間得一君子人焉曰績世王先生先生天性敦厚篤內行幼與羣兒遊抑然自下有一視同仁之意泊少長周旋族黨以忠爲體以恕爲用初不知人間有機巧變詐事亦從未見其與人爭得失較短長其善氣迎人雖獷夫悍卒亦爲之氣折至誠動物者然也 先生厭棄帖括業於中外古今經世書能得其綱要清末季考入晉省優級師範學校以優等畢業嗣屏去一切專心實業遊歷綏區將欲展其大西北之志而得所藉手也至薩縣爲同人挽留辦學手創學校數區成績昭著迄今人才蔚起多出其門民國初元來套試辦牧畜墾植時以地方多故未竟其志十四年臨河分治出鉅貲建市廛連楹高棟數十架以提倡商業時值地方初創臨紳留 先生襄助地方大計十五年國民軍全部駐套臨河當孔道駐軍復雜匪氛日惡烽燧亘宵不少息征索日亟七月後勢益焚如紳董先後相引避莫可蹤跡 先生不得已獨留支危局時有于董

臨河縣志

卷中

事略

四八

事相龍爲 先生左右臂不匝月于以病辭 先生屹屹獨立遇有征索差徭以一身承應之飛書告糴和淚和血而言乞粟餉軍傾箱傾囊而至戈矛列前斧鉞脅後 先生自若也百口喧呶千騎驕嘶 先生自若也力能致者支配而予之力不能致者溫語以却之開誠心布道直令威不忍劫力不忍奪巧不忍篡出萬死一生於金戈鐵馬間亦岌岌危矣如是者五閱月迄不少息十六年一月城陷縣署殘破一空各職員裸體瑟縮 先生傾篋衣之傾甌食之人栩栩然有生氣焉時縣政失綱都人士羣推 先生暫主縣政駐軍長官請於當道報可先生掃除灰燼撫恤瘡痍宵旰勤勞日不暇給維持地方可告無愧已乃或有竊議 先生戀戀不去也得勿有利之見存歟噫爲是說者殆未度當日之情勢貿貿然出此責人無已之譎言也試問烽鏑徧地礮火連天大多數商民舉拋棄其產業入山唯恐不深初未聞別有一人焉冒大險蒙大難犧牲其可貴之生命希圖其不可知之利者 先生卽爲利留亦以其生命換得其有造於全局爲不少矣以視掉頭不顧視地方無關痛癢者已加乎其上加乎其出入分明事事公開更無利之可言求全之毀何足當識者一笑耶總之

先生對地方不惜出全力以持之者亦行其心之所安而已亦無所爲而爲之而已 先生  
何所容心哉特表而出之以待知人論世之君子

臨河縣志

卷中

事略

四九

臨河縣彭縣長繼先事略

邊吏之難得也自古爲然矣不惟疲瘞闕茸之吏試之輒躓卽反其道獎進武勇梟將債帥曾不知經邊安民爲何事小則浮動而召侮大則債事而喪權吾未見其有濟也臨河爲包綏屏障蒙漢雜處號稱難治太原軍府惓惓西顧亟思得人而理之特任彭參議繼先來宰是邑公蒞任卽以刷新政治洞達民隱爲先務凡前任議決未行之件如設義倉立村制築民堡清查戶口槍械厲行清鄉諸大端均次第實行事無不舉才無不庸復呈准改升縣治縣署組織如制尤復注重交通籌設長途電話督飭區村修官道十段以期通行其弭盜要著全在警政團政使家自爲衛人人自爲戰壁壘改觀旌旂變色伏莽潛消宵小遁迹終其任并未發生一盜案此無他人人有自衛之能力戶戶有自衛之精神環境所迫時與事會而已在任五月旋調充察省市公安局長士民籲留不報識者惜其抱大爲有之志而席未暇暖奉調他任未竟所施也然卽此舉舉大者在公已啟其緒後來者引而伸之恢而張之可也此則邑之人企祝者已

臨河縣白縣長保莊事略

民國十九年四月彭縣長繼先奉調察省要職綏政府注重邊要特簡白公保莊接臨篆白公秉性敦厚天質聰彊有幹才久爲上游器重蒞臨伊始痛念地方迭經浩劫民生日望蘇息首在解除煩苛以紓民生時語人曰爲治之道革弊爲先興利次之况弊除利亦俱興凡遇有不便於民者悉予革除而減輕之民咸稱便可謂善於得民矣其整頓教育也臨邑學校師資缺乏人才闕塞爰由綏延聘學術優長人員分任管理教授學風蒸蒸日上每區設模範小校一所學額限六十名爲準遴有學識有經驗者治之成效日進各教堂學校編制課程多違制乃就附近地方設模範校一所以資觀感并召集各教士暨民中有資望者特開教育改進會議定各堂小校一律改爲私立悉照章編制至如增設鄉村小學以期普及籌撥升學津貼以資策勵又其範圍不過者已其改良司法也凡準傳之案勿牽累勿稽延均隨到隨訊隨訊隨結必令獄無滯囚案無留牘而始快又復分民刑分男女分監所既免雜居釀變又免時疫傳染至如考選法警以清流品改建法庭以示威嚴又其纖細無遺者

臨河縣志

卷中

事略

五一

已其規定鄉團也每區編定常備保衛三十名區長負責教練經費列入預算并令每村送有身家之壯丁五名由區送縣訓練兩月發區再行抽送週而復始農皆爲兵何難自爲守戰再蒙旅游擊隊向來衛護地方頗資得力彭前任已委各旅士官爲一二三隊長公尤優待各隊長復加達爾計爲游擊總隊長并予以圖記以爲信守五月間楊匪擾臨該隊助剿尤力此其一證不第此也後套大患莫大於蒙旗構亂二年外蒙內犯民衆至今猶爲寒心本年五月中風聞赤俄侵略外蒙煽惑漸及內蒙鶴淚風聲人民惶恐公不惜重貲厚備多儀派商會于會長馳赴東達公旂接洽以規意嚮該旂主巴保多爾濟派員來臨報禮表示本旂素明大義決不附和内蒙尤望時加臂助共維國艱云云從此信使往還儼然一家邊防可望永固焉此信孚外交者一本縣城垣迭被水患特派魏紳三槐王紳侶監修城工并將附城護城壩加高培厚永杜水患民堡足禦外侮後套尤有明徵惟民情憚於創始實行爲難爰令各村限期趕築秋後報竣以固冬防此注重防務者二按軍隊住居民宅軍民交感不便特開地方會議決定修復縣府西院安設旋部又於東關相度地勢創修大規模



之營房刻已開始工作指日可告成功此奠厥民居者三按本縣地面遼廓防務商業消息端在靈通公本彭前任規定商辦電話當以太安鎮地近狼山爲內外蒙通商孔道又係商業繁盛巨鎮先設臨陝電話然後依次建設四區如在一堂已本境渠道縱橫伏秋上水交通輒梗慮其襄涉之多苦也特修徒杠輿梁以濟之慮夫窮途之中阻也重築經路緯路以便之此發展交通者四此外勸募設立銀號以劑金融提倡舉辦車捐以輕徭役規定路線傳遞公文以期迅利所謂平民出治無時不從民情著想無事不以民事爲先傳曰樂只君子民之父母此道得也紀之以爲留心吏治者勛焉

臨河第一區李區長增榮事略

李區長增榮字仁甫河北棗強人其封翁樂山公秉性剛毅有奇氣蚤歲長技擊捍衛鄉里人莫敢侮壯年從事家人生產光緒初元來套治農業執事專而有恒與人忠而有信各大地主優異逾常格是以田產日豐家道日盛卜居五原西區強油坊南偏德和泉乃其地商之名號如王氏之同興東是也封翁尙風義重道德好善如飢渴嫉惡如探湯惟視衆生如平等恤困扶危推食解衣無吝色有善人之目語云積善餘慶有由來已生丈夫子二仁甫區長能承其志繼其業性孝友篤內行與人推誠布公渾無涯涘無智愚賢否日在其包羅中而不自知馭事有幹濟才任紛錯危疑之交乘隨機以應之均能秩然理帖然平後套以水利爲命脉民國初元渠堙田蕪公慨然動殖我民族之志爰約同田君全貴趙君海共投重貲重濬蘭鎖渠開闢三大股新渠早作夜思渺慮澄心測勘規劃冒風雪犯寒暑日夜督治渠干食不甘寢不安偶有挫折而再仆再起其志不稍挫氣不稍摧卒底於成渠長八十餘里寬七八丈每年澆田七八百頃食其利者千餘家豈第爲一人一身計哉地方之樂利

臨河縣志

卷中

紀略

五三

夫豈有浹涯耶六年春盧匪在武川就撫來套編制全部萬餘人複雜無紀假徵糧四出騷擾居民皇皇懼紳董相率引避公關念大局不忍言去傾廩倒倉盡出歷年儲積以餉飢軍時閱五月耗糧兩千餘石當日窮檐蔽屋得以稍留斗勺餘粒藉以苟延殘喘者全賴公傾倒不吝獨以大力幹旋之也古人所謂毀家紓難公詢無愧矣十四年臨河設治任公爲一區區董建置經始賴公贊助之力居多十五年軍事倥偬征億奇重公因應無方不窮於用十八年本境糧荒儲藏殆盡東路各縣比歲告災難民來臨就食者四萬餘丁口縣府奉令辦賑公首先慨認捐糧二百石以爲之倡衆大戶聞聲響應不崇朝募糧一千餘石欸五六千元事得以濟借非公登高一呼義聲首倡安能應如桴鼓實惠均霑如此也本區賑務悉心策畫實力進行事竣無一缺望無一後言可謂稱物平施功歸實濟者矣公長君元楨字幹丞儀容脩偉才具練達父老推重僉謂雛鳳鳴盛當清於老鳳也德門獲福克昌厥後其信然歟

臨河二區 陳汪區長 茂林 事略

張弛消息而天道亨剛柔交濟而人事成一身然一家然推之一區行政之道何獨不然吾於二區陳汪兩區長而歎其相資爲用亦相得益彰也陳區長占財字聚民天質穎異髫年就讀目過成誦有神童之目惜早歲失學族黨以爲憾事臨河二區田地荒蕪民戶寥落在勢不能獨立然爲行政區域計又不能不分治陳區長承凋敝之日撫貧瘠之區又值駐軍複雜供億煩苛巨天烽火徧地荆榛爲區長者以獨力支柱感無所施智無所用惟有不辭勞不避怨不憚煩不苟安雖鋒刃加頸槍彈次胸亦能聲色不動進退裕如寧任屈已以求全決不肯輕率以激變卒令難關勉度危局得全天下能忍辱者能負重老氏以柔道勝人陳區長庶幾近之矣雖然有弛必有張者天之道也有柔必有剛者人之道也天道不能常弛人道不能偏柔繼陳區長而起者有汪區長區長名茂林字治泉南徐人其先德於咸同年隨軍征回凱旋道經河套留居經營農業遂家焉區長少聰曠家貧失學生平留心世故於人情物理洞鑑無遁影與人接物和而介寬而有制任事能當機立斷無依回無阿徇平

臨河縣志

卷中

事略

五四

日長於治水永濟剛濟各大渠沿革利病均能燭照計數洞中竅要及其任區長也舉辦建築築路清鄉保衛諸大政謀必衆協事必公開凡遇危疑震撼之事他人均側足咋舌斂手而去者汪區長則奮臂而起力任之而不疑其見義勇爲有定識故有定力也古訓曰惟斷乃成又曰貞固幹事其此之謂歟

臨河三區傳區長正業事略

自古一鄉善士不必有赫赫之功奕奕之名但令口無過言身無過行即足楷模鄉黨地方無事斤斤勉爲束修自好一旦有變則必本同憂共患之誼亟起爲披髮纓冠之救其衛顧桑梓深切獨至有過於齷齪吏萬萬者於何徵之徵之傳區長正業而得之已傳區長府谷人田山其字其先德以醫術名於世正業能大其傳女科尤得秘鑰手術接青主元鑑而盡其變足跡所至踵門請望塵拜者不絕於道先生則無親疎無貧富無貴賤概予施診罔不應手奏效初未嘗受寸縑叨杯酒焉謂可謂普濟宏施者已先生性豁達休休有大度持家儉奉已約一粥一飯珍惜無弗至獨至慈善事業雖傾倉倒篋不少各居恒嘗曰人世階級境遇吾視之皆軀殼外事惟同此血氣同此心知衆生皆吾平等吾能膜外置之耶計其生平義行善舉任恤睦婣美不勝書獨至十七年辦賑一節尤其卓卓大者溯自十四年臨河分治大兵大役水旱偏災靡歲不有民間糧儲搜括殆盡十七年秋成僅告下稔冬季糧根奇荒又值東路饑民來臨就食者不絕於道十八年斗米萬錢外來及本境饑民調查共計

臨河縣志

卷中

事略

五五

四萬丁口三區居其半數哀鴻遍野勢洶洶不可遏先生當夏田初登先期密約各大戶爲預防劫奪禾稼計多留滯穗以瞻餉之或另指熟禾數畝以分惠之慮其錯處無紀也另編一組以部勒之慮其舊業之坐廢也酌發糧款以助之歸耕護以團隊以導之出境此皆賑濟常例之外所以曲成之者且無不至也至其承辦賑務抽查戶口毋冒毋濫監督散放毋漏毋徇所以綜覈之者洵可謂功歸實濟者已是役也論事實惟三區最難論成績惟三區最優嗟乎自古備荒有策救荒無策自周官散佚三代下久不知荒政爲何事先事漫無預備臨事竭蹶補苴卽補苴得法生民之元氣已傷况舉動一涉張皇章制卽滋紛擾數萬涸鮒不入枯魚之市也幾何矣若傳區長者可謂以不忍人之心行不忍人之政者矣十九年甯夏楊某由中衛於六月十九日揭竿倡亂聚衆至千餘人東犯各城邑勢如破竹及入臨境劫掠三區諸村堡人一夕數驚時先生解區長任家居聞變攘臂奮起號召全區保衛團及各大戶自衛之丁壯得勇士百餘人復糾合杭旂游擊隊遙爲呼應於是激昂誓衆士氣百倍乃爲設間用伏用蹙匪隊於黃土拉垓河各支渠支渠套搭紛歧匪騎陷泥淖迷途不

得出我軍合圍大進批元搗虛疾如風雨匪四潰如鳥獸散迅逐至剛濟渠日已昏未便窮  
追凱旋日邑人士歌頌盈路 縣府列其功上聞請優叙焉

臨河縣志

卷中

事略

五六

取甌脫久曠之地以獨力闢之化磽爲肥化瘠爲沃取堙圯不治之渠以獨力濬之易塞而通易窒而暢地加闢民加衆戶口加多租稅加增一家之賜千家食德一姓之功百姓樂利此何怪衆口交推舉全區之政付之於一門而奔走聽命焉如臨河四區楊區董茂林及若弟春林鶴林兩區長洵可謂造福地方後先濟美已攷楊氏系出河曲世傳山後楊氏自宋代以武功起家名滿海內代有達人清同治之季其先德玉珍公偕弟玉璽來套治農業家於永濟渠側覃心水利從濬川王氏游能得其秘家日起子姓日繁兄弟有丈夫子九人均英英露爽茂林春林鶴林尤能繼承其業矯矯傑出者也茂林爲羣季長天性敦篤內行實踐能以身作則一門孝友里黨欽矚河套言家教者首推楊氏其處衆和而不流其應事公而有制其爲五原西區董事也課農林講牧畜興教育時值盧占魁之變供億煩苛凡有征求盡出其所有以急急以紓民力民國初元包租永濟渠經營擘畫水利大治六年改租他姓坐廢半途氣頓沮是時也春鶴兩弟進曰我兄弟以殖民爲志當求其大者遠者欲獨立

臨河縣志

卷中

事略

五七

一幟莫如以全力開闢楊家河子可謀百世利毋寧俯首倚官府爲生活茂林蹙然曰楊家河工大費鉅恐非我兄弟所能任春林鶴林曰吾輩作事所憑者信用所恃者精神愚公移山精衛銜石同心自克濟有志事竟成何自餒爲於是茂林奮袂起偕同春鶴兩弟計劃全局悉心測勘虛衷延訪參合高下順逆之勢推求循環往復之宜其有合者當機決之其不合者面壁而冥默繞室而旁皇甚至登高遠眺臨流兀立渺乎若思茫乎若迷及其有得也則有豁然貫通狂喜累日者以一身攬其大綱得兩弟分理其節目可謂同條共貫者矣有時雜工人工作塗體沾足不顧也有時同工人食息豆粥草薦自若也如是者六閱月由渠口用生工開至烏蘭淖地方此四十里地皆高阜不能上水計糜欸數萬元耗糧千餘石工未及半而力已無餘欲罷不能欲進無力此正所謂成敗得失關頭也爰乃熟慮兼權妥商救濟之策由春林鶴林商洽教士以烏蘭淖下之教堂地上水爲度按厘股分利於是水利日宏收益日多大工得以繼續進行終底於成此卽春林鶴林所謂同心克濟有志竟成者也計該渠全身長一百四十里寬十丈深一丈共歷時七年之久用欸四十萬元之鉅每年

能灌地兩千餘頃廼思民國六年以前該渠左右百餘里僅一片荒磧耳自有此渠而黍油麥秀彌望青苗廬舍雲屯村鎮霧列田歌百里烟火萬家蒸蒸我民得以鼓腹遊擊壤歌者伊誰之賜哉騰騰大地得以啟爾宇固爾封者又誰之力哉向非茂林區董倡於前春林鶴林區長繼於後何以致此十四年臨河設治劃該地爲四區任春林爲區長爲地擇人從民意也十五年二月茂林猝患中風不起手造地方功在民社積勞成疾正命以終歿之日野祭巷哭道路隕涕未邀生榮可謂死哀已春林區長幼秉特質有血性持家應世悉本至誠當民國四五年地方多故是時適長五原西區出其全力以支應多方任怨任勞現狀得以維持迨充臨河四區區長值國民軍全部駐套徵發無虛日春林區長多方供億振廩傾倉無吝色全區民戶得以各執其業各安其生遇事必取公開寸銖之輸將顆粒之征索攤派一本大公故全區翕孚無爭議無後言十八年春歲大饑東路饑民就食本區者萬餘糧根奇荒斗米萬錢承辦賑務慨捐糧數百石又勸募各大戶照章支放事必躬親惠期均沾全活無算鶴林於十八年接充區長時值回軍攻寧敗竄駐距楊家河數十里之大灘飢軍萬

## 臨河縣志

### 卷中

事略

五八

餘時時出入四區焚劫淫掠勢岌岌不可終日鶴林商承官府駐軍或則減價平糶以示卹鄰之仁或則正式制止以申保民之義如持危舵於驚風駭浪中操縱在手晏然不驚穩渡重洋同舟客子談笑食息竟若行所無事者厥功亦云偉矣夫楊家河子一渠關係全區之命脈如此茂林畢生之精力與事業盡注於該渠是誠不愧爲實業家而兼大建築家矣尤可幸者春林鶴林區長聯袂接踵繼起而敬承其業又善師其養渠之法以培養花戶爲先務春耕則貸以食糧借以籽種秋收則薄其租入寬其逋負俾令家有餘粟戶有餘財人有餘力有無相通緩急足恃相需以長相資以生從茲大渠水利恢之彌長引之彌廣是又在因時制宜善通其意者矣近日言實業者多矣伊孰能不畏難不避險堅苦卓絕爲地方開闢絕大水利又誰能善守勿失爲地方永保此絕大水利若楊氏兄若弟者可以風矣

臨河商會劉會長珍事略

旨哉貨殖傳之言曰其善者因之其次利導之其次教誨之其次整齊之臨河商業始兆胚胎無所謂因也利導之以開不匱之源教誨之以立樽節之制而已然而利導教誨之方非有進退商業之權而又熟悉商界情變因地制宜因利乘便者不能措置裕如焉吾於商會劉會長得之劉會長名珍字明卿河曲人幼聰穎勤學問讀書能得大意年少長一日廢書歎曰讀書破萬卷不能立產致千金與其螢窗坐枯何如及早從范少伯遊以謀生計耶於是棄儒而賈西遊河套究心物產登耗之數殫志百貨流通之原億無不中計無不盈商界中爭傾倒之十八年商會改選公推爲會長任事以來根據原定商法參合當地商情於商路則疏通之於商情則聯合之於商貨則消息酌劑之而且評定物價以示其信疏通金融以暢其流其有利商業者保持之不便商業者革除之臨河商業散漫重以比年多故原狀幾難恢復得劉會長倡導而崇起之商界始有一線曙光遂蒸蒸焉有生機焉吾爲之進一解曰長袖善舞多財善賈儻能多募股資經營一絕大規模之行棧高視遠矚聚四方之貨積而常流通百族之財贏而不匱所謂利導而教誨之又進而整齊之矣豈不盛哉



臨河商會于副會長相龍事略

河北寧津于先生清泉商界中巨子也天性溫厚材力聰彊多機警工計然術早歲從河北大賈遊往來西盟內外蒙地嫻熟蒙人文字語言習俗善揣時尚好爲投機事業奔走氈廬毳幕間與蒙人杯酒通欵曲如家人昆弟歡故懋遷所得常倍於他商民國初元來套治農業講求種植樹藝法物土之宜盡地之利歲致豐盈家日起兼業酤麴香泉冽爲河套之冠十五年地方差務煩重紳董皆引避出佐王丕卿先生主持農商會支配軍需應付各方不窮於用危局得支柱十八年商會改選公推爲副會長臨河漢蒙交易向居一大部分先生熟習蒙情消息盈虛因勢而導之稱物而施之操奇計贏攸往咸宜不止此也內外蒙向背之機離合之局倏忽百變外人莫得真相得欵洽蒙旂如先生者何異傳音於空谷燃鐙於暗室也豈惟地方賴之政府亦利賴之已

臨河抵產局魏經理三槐事略

緊古軫重民生春有省而補之秋有省而助之周禮旅師以質劑致民平頒其興積荒政十有二首曰散利此非徒煦沫爲仁噢咻爲惠張皇補苴於吾民也取民之所有以爲質益民之所無以爲劑所謂因民之利而利之如我綏遠流通券抵產之法真能得古法不泥古法者矣雖然宜民者法也行法者人也以人行法法足利民有法無人法轉厲民求一實心實政而實惠及民者其惟魏經理三槐爲近之已經理承出府谷名族書香繼世代有傳人太翁紹業有聲庠序碩望耆德爲一鄉祭酒經理生負雋才夔校翹舒有遠志民國初元來套治實業與李區長增榮訂杵臼交歷充地方機關要職幹理措置罔不井井以是官若紳競推重之十四年臨河設治經理協助地方凡百建設贊畫不留餘力十六年省府頒發流通券定抵產法臨河設抵產局公推魏君三槐爲經理任事以來通籌兼顧循名綜實有產可抵者則分配而頒發之無產可抵而確有保證者亦結約而調劑之人無缺望無後言全境貧民得以費牛力購籽種東作興事西成告豐者胥賴乎是已地方近年迭遭浩劫財政紊

臨河縣志

卷中

事略

六一

亂重沓影射莫可究詰自十六年設立公款局十八年改設財務局經理出其縝密精覈之思坐理夫糾結錯綜之緒必令入之也有制而不煩不苛出之也有節而母冗母濫不素其端自不匱於用何莫非經理相助爲理有條不紊耶噫士君子懷才不遇不得竟其所施而効職於一鄉一里但使能拯災捍患給求養欲民力得紓民生得遂盡其力所能爲已可對地方而無憾矣古所謂小用之則小效其在斯歟其在斯歟

移墾門

湘民移墾西北合作社緣起

郭 皋

中國自民元以還兵燹迭起盜匪蝟集瘡痍滿目載道流離湘省遭災較他省特酷揆厥原因其主病中於生齒日繁人滿爲患民生問題無法調劑間有慈善團體設會賑災不過臨時補苴何與本治欲求根本解決莫如移墾西北之一法 先總理提倡民生主義於建國方略中對於移墾規定極爲詳明又國民黨第一次全國代表大會農民運動決議案有移墾荒徼以均地利之策舉本 總理地無棄利國無游民之宗旨提倡開發西北拯救各省災黎十餘年來奔走南北到處宣傳無如氣竭聲嘶百無一應不得已退而謀諸桑梓同鄉中如馬鄰翼孔昭綬曾繼吾粟戡時曹典球狄昂人辜天佑王季範廖漢瀛舒漢祥成蒙三李維城陳任菴李咸亨王伯徵凌樹人周聲漢諸同志發起湘民移墾西北合作社省縣政府立案委 主任其事社址設於湖南長沙湘潭等處其宗旨以集貲移民開闢西北爲首要並印刷宣言分寄各省以資提倡十四年偕周壽椿羅先覺羅良德許履道諸君子親歷

臨河縣志

卷下

雜記

一

西北河套一帶實地察勘果爾地質肥沃氣候適宜種植牧畜斯爲奧區且交通日便文化漸開新村制度逐一實行時值達拉特旗地杭錦旗地先後報墾時無可待機不可失時機相迫愚者昧目智者捷足焉當指定臨河以北七十里六合公地方爲湘人移墾區域建屋數楹并挂領達旗地五十餘頃十五年購置牛具招募佃農著手開闢不意是年河套告變同人均南旋事竟中止 氣不稍沮仍主持社務收合餘燼力圖再舉以本社名義向國省政府提案請撥鉅款作大規模之移墾因近年國步多艱國府雖有組織全國墾殖委員之計劃迄未實行 一息尙存必以再接再厲之神貫澈此殖民移民之志大而風行全國小而實行湘省此 之責也十六年 長河北南宮公安局不得親履墾地擬將眷屬移套以子姪輩暫代其事爲破釜沈舟之計詎料包西道梗移家至包頭而止十七年春路通託凌君樹人偕 長子先哲等盡室赴臨僑寓六合公實行工作如修渠闢荒牧養牛羊植樹種菜男則刈穀造林鋤雲犁雨女則牽蘿澣葛戴月披星田家樂趣較湘省尤爲濃厚焉十九年 抵臨建築西正街私人房舍迭接同鄉黃女士碧源等函件匯款購地移墾西北之結

約日形堅厚惟願我鄉人不畏難不惜費不辭勞負襁至乘未來通力合作建百年之渠滄  
藝萬畝之桑麻俾我父老子弟含哺歡歌擊壤嬉遊以爲各省開其先路豈不盛哉豈不快  
哉

臨河膠東移墾社紀事本末

黃子義

魯省東隣渤海北筦津平南控徐淮西障汴維泱泱雄風誠南北之綰轂黃河流域之奧區  
也沿海登萊人民負有遠志往往踰海走遼瀋企圖實業肩負而去輦運而歸近年生齒日  
蕃人滿爲患負襁乘耒移墾東三省者歲以數十萬計起視郊野流離載道貧民仍不加少  
有心者亟思另籌一善地以安插之時勢之所迫者然也民國十四年東魯黃君樂德服務  
於西北軍總部縱攬綏西沃野千里民戶寥落棄若甌脫殊屬可惜時值馮總司令有志發  
展西北爰商諸綏遠李都統允照山東移墾外極端贊助黃君偕諸同志即日返里徧歷鄉  
里縷陳移墾河套之利奔走號呼糾合同志集貲萬餘元定名曰膠東移墾社十五年春返  
綏在都督署立案聯袂來套週歷勘查至達旂地白爾塔臘察汗淖等處購地百餘頃於李

臨河縣志

卷下

雜記

二一

貴橋地方建築田廬置備農器選擇籽種若者分租若者分佃若者自種耗貲數千元歷時  
五六月規模大定專恃東作日興西成露積矣詎料西北軍退駐後套土匪蠶起橫行鄉曲  
焚擄淫掠嗚鶴日驚哀鴻徧地移墾事業盡付泡影計損失不下萬元其墾民欲進不能欲  
退不得又值大劫甫脫比年天災兵禍紛至沓來渠堰田蕪補救無方已往者言之寒心未  
來者聞之裹足蚩蚩何知舉歸咎於一二代表求全之毀衆矢集的此真欲辯無從而亦不  
必深辯者也所幸革命成功政府注重民生遠略宏模行將實現惟望我老兄弟暫忍須臾  
以待地方大定水利普及同心協力課農造林實業發達蒸蒸日上我墾民必有含哺鼓腹  
食樂利於無疆者豈不快哉

魯民移墾紀事罪言

談何容易舉千百族窮蹙無告之貧民移之於絕塞廣漠之域而爲之分其田理正其經界  
建立廬舍購置耒耜籌備其牛力籽種使之聚而不擾比而不好相養以生相資以長是必  
有詳實之估勘親切之結約充分之經濟先事之規畫而後乃可與言移墾初非隨指一方

而可以來之任舉一地而可以安之也記者當民國十一二年服務保署及歷北平政界披閱報紙即聞有魯民移墾綏區之事未嘗不欣欣然爲我魯民幸也及詳翻公牘竟無其事以爲有此創議并未見諸實行也迨十四年一月復蒞五原任紳董僉稱魯民移墾不日實行記者徧查近數月檔案竟無片紙隻字涉及此事猶以爲傳說不足深信也及三月初旬有同鄉于君培祥以山東移墾事務所委員名義投刺請見及延見後于君聲稱魯省墾民千戶現由包頭出發不日到五云云詢以事前指定何地是否派員估勘是否建築房舍是否購就牛力籽種是否籌有相當之經費于君均對以不知迨墾民全部抵五暫借住水利局東院是時也田無一隴房無一椽粟無一粒羣情皇皇感汹汹動紀者既長是土又與有梓桑誼既不忍作壁上觀又不能爲井中救只有設法籌供糧芻以維現狀而已幸而馮督辦及綏遠當道連電王紳同春囑撥地貸糧妥爲安置王紳先借出糜米若干石各渠地二百五十頃衆心稍安嗣王主任鴻一先生到五事有主者當然就緒當分懇民二百餘戶駐固陽分七百餘戶駐臨河適值臨河分治達旂地報墾分給駐臨墾民地七百五十頃一夫

## 臨河縣志

### 卷下

雜記

### 三

百畝以內地之人工治後套之地力穀應不可勝食矣無如後套之田以水爲命脈墾民無費開渠地不能上水之原因一墾民人地生疎與水利當局隔膜地不能上水之原因二墾民勢如散沙不知顧全全局既不能各出人力合衆挖渠又不知各爲堤防反水患爲水利地不能上水之原因三有此三因而撫撫沃壤變爲磽磽石田計自領地以來每年種地不及五分之一吾魯民飢困顛連真有欲進無門欲歸無路者矣查墾民來套本不足千戶臨河之七百餘戶祇以連年田地失種廢然氣沮接踵回籍及轉徙他圖者比比皆是十五六年間只存四五百戶迄今更日見減少矣所有二三百頃之餘地當事者名之曰公地所有收益指作移墾事務所公用究竟事務所十五年一現於五原十六年再現於臨河十七年三現於五原如曇雲泡影隨生隨滅初不待公地之補助總之如登肉於俎羣思爭嘗一櫛爲快甲攫之甲飽乙攫之乙飽於墾民無補也於事務所無涉也原夫移墾原議發起於王鴻一先生先生愛國愛鄉遇事勇爲其奔走呼號而得有此舉也請准魯省府由實業廳籌款七萬元又分令各縣每縣攤認七百元計共十四萬元是每戶應領一百四十元按每戶

領地一頃邀免半價先交二三成不過由各名下百四十元中扣留二十餘元其餘旅費及建築土房購買牛馬器具籽種耕作食用儘可敷用倘能全數發給更派廉幹人員爲之經紀監督必能各安其業各治其地不三年戶有餘粟人有餘財人烟茂盛比戶可封是真能爲魯民造福矣乃何以民猶是也地猶是也任若民之自聚自散自生自養他人之地萬流分潤墾民之地涓滴莫霑冷無烟魯困誰指室如懸磬周粟誰頌哀哉魯民親歷五年來之兵燹匪變寤甘墳溝塹壑爲強毅不屈之鬼從未有一戶一人揭竿從賊爲苟活偷生之人我魯人有此特殊性洵可告無罪於地方矣所惜者性情贖直使氣任性動違人情因而意見齟齬口角爭執久而發生誤會動成冰炭究之當地賢明紳董無不理喻情恕並無畛域之見也往者難追來者可諫亟籌善後之策莫如取事務所名目概行取銷由魯政府澈底清查原案之欸作何用途浮冒者追還實銷者開除存款有餘固善如有不足設法另籌計有六七萬元卽足一日清償地價查駐臨駐固移民不過五百戶每戶百畝有五百頃卽足每頃以中地計邀免半價有三萬元卽可繳清地價此爲吾魯民籌定根本中之根本也

## 臨河縣志

### 卷下

雜記

### 四

一日代籌開渠由魯政府遴派樸實耐勞魯紳二三人携欸來綏欸以三萬元爲限以四分之一給駐固之墾民補助其置辦牛馬農具諸項以四分之三給臨河墾民於適中地延聘本地公正兼熟習水利之紳董勘定渠路開創支渠立定澆水章程及歲修渠費攤派辦法此爲墾民籌定補救中之補救也再由全部墾民中推定品望素孚一二員爲全部墾民之經理權一責專實行管理指揮凡對上對外統由經理負責如衣挈領若網在綱未有不俯首受治者也嗟夫此墾民也夫非猶是吾魯之父老兄弟哉顧何忍令遠徙三千里苦力五年餘而使其淪陷於此也又何惜清理此原有之欸而慰此延頸望救引領請命之哀鴻也紀者目覩耳聞據事直書罔知忌諱知我罪我俟諸國人

哥老會紀事本末

河套哥老會卽四川袍哥會之支流發源於川省蔓延於大江南北旁溢於後套後套之有哥老會始於咸同間西夏金鷄堡之役金將軍所部多南人凱旋道經後套留套治生業哥老會之根卽於是伏焉該會江南分幫川省分堂後套分排名異而實同其主旨以金石同盟堅明約束爲體以任俠尙義舍命不渝爲用會中向無會首會長名目凡有權力者統名之曰大爺其下亦分職辦事大爺主中堅運魁柄生殺予奪高下在心有雷霆不可藝之威有神聖不可侵之勢會律極嚴有違犯者輕則鞭背灼膚重則立置重辟刀踞水火不能緩須叟死原夫哥老會之緣起其始則胚胎於有清竊據中夏恣肆殘暴有明諸先烈糾合同志希圖恢復不得不多樹旂幟秘結黨會厚集勢力其繼則再接再厲再起再仆輜光匿采羣思蟄伏江湖保持其固有之勢力希圖再舉指天誓日椎心泣血遂成此牢不可破之幫會迨至嘉道以後各幫會堅苦卓絕之旨日湮奇梧英雋之材日少狡黠桀驁者流遂起而承其乏出奴入主其賢者樹黨結援憤世嫉俗不肖者招亡納叛虎視鷹瞵變木加厲久之

臨河縣志

卷下

雜記

五

浸失其本旨然其蟠結堅固伏之勢力固自在也河套有清光緒末葉五原廳開始分治漢民寥落智識短淺最易煽動哥老會蔓延綏區幾有不可禁遏之勢宣統三年西排哥老會大爺楊建寅馬景濤藍玉堂乘革命紛起因利乘便由阿拉善王旂地假借革命名義揭竿聚衆東犯臨境大肆劫掠十一月攻陷強家油房墾務分局焚掠一空當是時套民經外蒙內犯驚魂甫定突聞會匪勢汹汹一夕數驚西路人民均紛紛逃竄幸綏遠當道派哨官張保和率四旂馬隊平之楊馬蘭各首領均漏網其勢尙未稍戢也民國四年記者在五原任奉張道尹秘令調查全境哥老會人數當卽查得只西區一隅已達四千人記者條陳謂秘密結會當然依法禁止惟該黨徒蔓延殆徧設概予芟除適足滋擾莫如不問會不會祇問匪不匪會而匪只治其匪會而不匪只解其會呈上大蒙嘉納是年秋會匪弓占元由南區警所叛變借寧軍馬統領鴻賓全力始克之該會黨魁梁玉亭盧金魁藍玉堂聞風遠遁十四年寧海軍馬統領子乾駐隆剿匪獲會魁梁玉亭立決之人心震懼十五年綏當道拏獲哥匪小五羊立置之法由是該會首領星散勢浸衰不振雖然其根蒂猶未盡除也蓋其深

固不可拔之勢流傳已歷有年所其統係秩然不紊其魄力能左右其部衆設能利用之使就我範圍小之足以保護地方大之足以捍衛邊疆所患者梟鸞同集蘭艾同升其中良莠不齊分子複雜篝火狐鳴蠢蠢欲動一旦有事乘機猝發如原燎堤潰大局已破裂無餘此又當懲前毖後者也方今村制修明詰暴禁奸責在區村但明曉順逆邪正之義厲行勸導糾正之功該會之纏結不攻自破自可消患於無形矣是在有地方之責者加之意焉



建築門

重修臨河護城壩記

城何以護以壩防水患也自古有依山爲城者慮山洪之冲發也特設壩障之有憑水爲城者慮江河之漲溢也特築壩以堰之此因地設險因險立防實萬不得已之規畫非建城設邑之經制也若當騰騰平原眇眇禹甸如河套千里沃壤建設城邑只求辨方正位奠陰陽之序會風雨之和宅中以圖外居高以馭下據四方之形勝有犄犄之勢一旦有變不至於受制於人亦已足矣民國十四年臨河分治設邑按原案在强家油房設縣之議如欲憑水爲險則西枕永濟大渠逼渠立城仿山東濟陽齊河例塹以金堤當可收地之利不至受水之害矣否則就强家油坊南五里德和泉地方築城據高原亦可永絕水患也又不然當日俯從本地熟於地理者建議以原定城址移東半里許則全城盡佔高阜可免水患亦無不可也乃何以均不出此照原定地址一定不移遂使西半城基勢如覆孟大錯一鑄不可復挽卽令築護城壩以預防之亦揚湯止沸之計也按永濟大渠長一百四十餘里寬八九

臨河縣志

卷下

雜記

七

丈不等爲各官渠之冠病在渠稍比歲澄淤下流壅塞如人身尾閥梗阻中隔食水充滿日積日脹有入路無出路愈壅愈積勢必穿脇破腹橫決旁溢臨城適承中流此何怪比年水患難澹也十六年春三月永濟渠決口臨河城西洪水日漲紳董走告設治局請預防之弗報翌晨水薄西南城垣高不踰五尺西南隅有裂隙已爲水嚙紳董喘汗走告曰請亟令民夫五六十人加工塞漏穴水猶及止又弗報踰刻許穴大數竇水大至俄頃西城內成澤國縣署西急築堰三尺水始不東泛而西城建築市廛三四百楹圯塌無一存者計損失不下十萬元十八年三月永濟冰汛大漲李三渡口決口水偏護城壩闔城文武官吏及紳董均守壩上設治局長黃彥邦王旅長奎元公安局局長郝晉綱教育局長王文墀財務局局長李增榮建設局局長楊春林商會會長于相龍紳董王績世董繼舒康寶銓閻天昌分督民夫二百餘人負土束薪絡繹搶險明炬照耀三四里如列星時則天冥風急波濤汹涌拍壩水濺人身如珠瀉黃局長令各舖商居民羅酒漿餉民工相屬於道又懸重賞能守壩禦險者優賞之王董事侶督促尤力奈舊壩土料鬆浮千孔百隙水十挾十邊且穿且潰相

持三小時之久風暴起波流突漲五六尺漫壩而下不可復遏大衆不得已退守城圍扼要加高堰以遏水城得安全焉本年秋召紳董會議公推王董事侶充修壩經理王經理爲之加高培厚一月工竣計費洋六百元有奇十九年三月永濟上李三渡口層冰結壩冰汎陡漲橫決數口勢如萬馬爭馳二十一日夜半城西平地水四五尺迷漫壩頂直薄城垣金拆聲不絕城關商民皇皇懼幸王董事侶比年董治城垣工料堅固於城西南隅受水之處注重築堰是以有備無患城闔屹然獨全夏四月大召紳董會議往返籌議共商永絕水患之方略僉稱城址根本已錯另遷城社事鉅費重未敢輕言只有急則治標就舊有護城壩加高培厚俾令鞏固堅實以遏水患公推公正耐勞熟悉工程之董事王君侶專任其事王董事慨然力任之於六月一日開工炎天烈日往來巡視工次必令層層搥碾處處培補怠惰者必嚴斥之勤奮者必厚賞之以是羣情踴躍人人無苟安之心而工無曠人人無畏難之心而事易集王經理誥諭層焦指揮腕脫汗流相屬莫敢食息歷其煩絕未嘗憚煩也任其勞并未敢告勞也迄七月十日而工成計壩高五尺寬一丈長一千三百餘丈計用洋一千

臨河縣志

卷下

雜記

八

三百餘元落成日邑之人咸謂巍然砥柱全賴此蜿蜒大壩足以障洪流迴巨浸而今而後吾儕可以免其魚之患矣特表而紀之尙望賢達紳董預籌城週退水之方以疏水路而分水勢庶與王君修壩之功交濟爲用則更進而益善矣

民國十七年冬趙匪青山大股兩次竄擾本境軍團分途截剿地面遼廓匪勢漫散南竄北突東見西伏飄忽無常軍團應接不暇苦於消息之不靈偵諜之往往中梗也昌特提議裝設臨陝長途電話無事可以便防務通商務有事可以便徵調通諜報用費少而收益多設治局黃局長頗趨其議案經縣政會議通過嗣以趙匪全部消滅地方稍靖事遂中止十八年彭縣長蒞任首先注重地方交通擬創設全境大規模之電話就商於昌特召集紳董如王君樂天傅君田山魏君蔭堂會議決議由臨陝開始創辦以次推行委昌赴天津購料昌於十二月抵津接洽商行購訂妥協飛電催欸迄未見復不得已毀約退料返臨始知王君樂天自稱由包訂妥又不知料存何所以是推延稽遲於無形中又停頓焉十九年夏白縣長蒞臨適值馬楊等匪股叛竄臨洶洶勢莫遏王旅長率隊堵剿痛念夫軍報之稽遲徵調之梗滯呼應之不靈也力促當地之官若紳於最近時期安設臨陝長途電話時值張營長購到大批木料經建設局購訂齊備官紳公推昌督治其工爰於九月杪開始工作昌往來工次指揮督課無廢料無曠工至十月十一日大工告竣開始通話噫臨距陝僅八十里非有山川遼廓之險阻也裝設工料僅兩千元非有積萬累千之距欸也事經全體公認人稱便又非意見紛岐障礙橫生也然且旋議旋罷忽輟忽作歷三年之久始能實現者何也憚於創始樂於觀成恒情大抵然也昌服務是邦忽忽三載幸賴賢士大夫雅意提挈晨夕與共今日躬親是役深願出其全力不憚委曲周折以促其成亦聊以答地方人士之誠歎留雪鴻之印紀而已敢因以爲功哉

風俗門

臨河竹枝詞

砭骨朔風塞上高 氈裘重複尙輕飄 男兒也學婦人樣 一例束裝紅主腰  
 納稼樂場有定程 連綿農事告西成 如何六琯灰飛日 打麥始聞叱犢聲  
 陋俗流傳是棄嬰 家家父母太無情 只緣婦女懶閒慣 忍令呱呱付梗萍  
 潺潺伏水貴於油 七日秦庭乞未休 戊巳一包馬一匹 香花膜拜獻渠頭  
 後寢前堂溷不分 土階茅茨好鋪陳 硃紅長櫃栽絨毯 大鏡雙雙畫美人  
 羊肚手巾包白頭 鄉村裝束也風流 阿儂不怕周郎顧 高捲車簾懶下鉤  
 不重頭婚重二婚 孤鸞身價值黃金 周婆新訂親迎禮 送上陽臺更作雲  
 嘉賓式燕樂如何 燴菜炸糕五味和 四盤四盤八大件 歸來夕照醉顏酡  
 野人敬客好排場 大匹高登禮節詳 上等磚茶濃潑就 一盤瓜籽一盤糖  
 酸菜點心麪片湯 田家風味客先嘗 賓來同抱如歸樂 風俗敦龐屬此鄉

臨河縣志

卷下

雜記

一〇

厚聘索來色色強 立人三百帛承筐 專條又結十年約 五頃沃田養阿娘  
 天桃灼灼野花繁 百輛鼓吹六市喧 廣廈安排千萬戶 邢譚何竇盡盈門  
 娶妻也會生財香 紅毯分鋪跪拜忙 阿姪一元姑五角 金錢亂撒喜洋洋  
 於今宗法竟全刪 同母弟兄喚隔山 胡越一家成骨肉 誰云痛癢不相關  
 鼻孔撩天投地呼 床頭低首念南無 鳩盤也要香花養 難煞人間小丈夫  
 柳絲細雨海棠風 姊妹街頭一笑逢 相約明朝看跳鬼 弓鞋預繡碧芙蓉  
 弓鞋三寸巧安排 五色綾羅手自裁 低囑阿姨牢下鍵 須防天足會員來  
 多少工夫手自纏 凌波微步嫋如仙 陡聞天足重開會 霹靂一聲降自天  
 自古人情富易妻 誰知後套歧中歧 當年多收十斛麥 臨老花叢覓別枝  
 走馬少年小市東 銀鞍玉埒度春風 拚將糶出三倉麥 買笑千金付小紅  
 駿馬嘶風盒子槍 地商子弟氣高揚 昨朝蓬戶今華屋 血汗十年夢一場  
 漢蒙雜處須調和 蒙語學來費揣摩 執手穹廬通款曲 駱漿奶酒獻多多

百貨挽輸走漠沙米糧布疋酒糖茶商人慣說蒙古話吳越從今是一家  
女男階級不分明蒙古俗流傳習慣成滅燭留光同下幙聯床風雨到鷄鳴  
黑塞輒廻學士駕青林不駐文人車俚詞聊備輶軒采豆架瓜棚洒墨華

臨河縣志

卷下

雜記

礦產門

探查狼山西八口鑛質記

耿秉信

陰山橫矗廣漠綿互千餘里餘脈發自賀蘭蜿蜒東來古者樹榆爲塞受降築城今日中外一家古蹟湮零無關體要惟登高望遠見夫岡巒起伏岩壑重沓其脈雄而厚其狀譎而恢意必有握瑾抱瑜沈璧藏珠韜光匿采瑰璋待啟精英待洩者所在多有由是延訪過客旁詢土人非諱莫如深卽習焉不察如是者有年余之企圖之心猶未有已也十八年冬余于役狼山之西二百餘里善丹廟時則朔風砭骨冒雪宵征同行者均瑟縮起玉樓粟余意興勃發竊幸此行庶有所得也入山後晨夕宿止均以蒙人爲東道主穹廬氈幕賓至如歸奶酒駱漿剪燭通欵乘間叩以山中地質及礦質各項蒙人酒酣耳熱得言忘形知無不言言無不盡蒙人多坦率胸無宿物其特性然也按狼山迤西自東五蓋口起至葛拉淖包止計三百五十里有奇其間直通外蒙計有八處曰東五蓋口曰西五蓋口曰達拉克口曰義太魁口曰紅淖包口曰達巴圖曰哈拉納口曰葛拉淖包口此八口前後之山脈石質約分三

臨河縣志

卷下

雜記

一一一

種自東五蓋口至達拉克口爲青石質前山煤礦苗最旺最淺距石面丈許卽現煤質惜多零星碎塊山後石中含有玉石水晶兩種距石面五六丈卽現惟玉石出品稍粗尙待淘洗晶石則秋水湛泓洵稱佳品自達拉克至紅淖包石質青黃錯出炭苗豐富距石面丈餘卽能得炭惟經考驗該炭油性缺乏入火炸爆或係石質未淨採取不得其法之故山後向產石棉石青色多碎片斷處多棉絲入火不燃俗謂浣火布卽此織就其信然歟惜無人就地提鍊以考察其用途是否爲出口貨之需要品安得廣延中外科學家一考驗之也由紅淖包至葛拉淖包百餘里石質雜紅黃沙綠三色石重量倍常石而質堅逾常至間有勢如蜂巢細孔映日作作有銛據一般推考礦質者言重量之石卽石青石綠類蜂窠之石卽含有五金礦質之類惜蒙人閉關自守不肯發其藏又惜夫地限遐荒無專門名家一化驗之又無明通之工師完備之機料設場開採依法化驗致令棄寶於地此真可爲太息者矣用特表而出之貢諸簡端以待後來者考證焉

古朔方郡鹽城礦產記

按伊克昭七旗之鹽城湖淖惟鄂爾多斯爲最多蒙地莫大利源將於是乎在惜蒙旗棄貨於地不知經營利導開闢而發展之也特詳列於左

曰長鹽池在右翼前旗南三十五里

曰紅鹽池在右翼前旗西南三百里

曰大鹽灘在右翼前旗東五十里

曰特默圖插漢越沒灘在右翼前旗西三十里

曰毫賴甲達亥水淖方圍約十里距鄂王府西南二百七十里

曰迭不拉亥水淖方圍約十里距鄂王府西南一百九十里

曰摩多圖察汗淖方圍約十里距鄂王府正東一百五十里

曰大攪池淖方圍約二十里經本旗派員設局採取出售每斤一文二厘收稅一文產銷甚

旺靖定兩邊及本旗仰給食用距鄂王府西南三百四十里

臨河縣志

卷下

雜記

一三一

曰荷池淖方圍約十里一切辦法銷路同上距鄂王府西南三百六十里

曰腦包池淖方圍約十里一切辦法銷路同上距鄂王府正南三百八十里

曰察斌達布素淖方圍約三十里鹽質淨味佳僅供本旗食用不知推銷他處距鄂王府西

南一百七十里

曰納林淖方圍一十里出城甚佳惜無人包採距鄂王府東北八十里

曰察汗淖方圍二十里出城最佳經鄭張兩商人包辦十年每年納租銀千兩

曰巴彥淖方圍約二十里距鄂王府東北一百二十里

曰敖龍淖方圍約十里城質甚佳無人包採距鄂王府東南十五里

曰大小克泊淖方圍約十里距鄂王府東北一百六十里

曰烏克淖方圍約十五里距鄂王府東北一百八十里六台地內

曰達拉吐魯水淖方圍三十餘里距鄂王府東北一百六十里

曰皂素水淖方圍約十五六里距鄂王府東北一百六十里

曰伊哨城淖方圍約二十里距鄂王府東北一百四十里

曰沙拉可免水淖方圍約三十里距鄂王府東南六十里

曰哈達免水淖方圍約二十里距鄂王府東南七十里

曰毫賴免水淖方圍約十里距鄂王府東南六十里

曰烏爾杜水淖方圍約十里距鄂王府東南百里

曰可克城淖方圍約二十里城質較劣無人改良距鄂王府東南一百五十里

曰哈比里汗奴素水淖方圍約十餘里距鄂王府東南一百五十里

曰叨好免水淖方圍約十里距鄂王府東南一百里

曰鋼達氣烏素水淖方圍三十里距鄂王府西南一百六十里

曰可克烏素水淖方圍二十里距鄂王府西南二百二十里

曰沙拉烏素水淖方圍七八里距鄂王府西南二百五十里

按以上各池淖或產鹽或產城所謂地不愛寶取之不盡用之不竭者是也惜封閉自守

臨河縣志

卷下

雜記

未發現者不能創闢已發現者不思改進致令鹽城之大利不能供軍國之用良可惜也  
該地卽古朔方郡屬地究竟某地某淖隸屬朔方某縣則莫可詳考用特表而出之以見  
蒙荒否塞二千年來之地利竟闕遏不發也留心政治與實業家應如何急起以赴之也



古蹟門

高家油房古城考

距縣城東北九十里距五加河南岸十餘里高家油房地方有古城一區周圍千餘丈城堞久圯高不知其若干尋丈垣厚二丈許土堅而白若間灰石碾之猝不易破城內壇廟官廨基址均沈圯無迹闔城無碑碣無塔表創不知何人何年何月日并不知何名有清光緒三十一年河套蒙地報墾地商爭就地開渠城當永濟大渠稍路穿城開渠墾地八尺許發現古式盔一具形似兜牟較常盔略小質以銅製出土已破碎無完質上飾珠數十粒大如豆小如黍爲土蝕久色黯然無華土工爭攫取之時爲于氏以廉值贖去城據高原土質肥沃均可耕種收益倍常地土人呼其城爲楊家營俗傳宋將楊業兵爲北胡敗息兵於此因城之然枕河屯兵非連營列寨不足以聯聲威而當強敵楊業亦知兵者安敢以孤營犯此險著故楊家營之說殊不足信或又曰清咸同之季金將軍大軍征回凱旋留兵就食河套或其當日營壘歟然自咸同迄今不及百年留屯當作久計其建築壁壘工堅料實經久不圯

臨河縣志

卷下

雜記

一五

何至蕩然無存若是是又未可信者或又曰本境爲西漢朔方郡地郡隸十縣如渠搜廣牧等縣以地形測之當古臨河東北河南岸一帶今城或卽漢城歟不知朔方郡與所隸十縣當日同時并建嗣以華夷代嬗兵燹迭經二千餘年之遷流轉移古城無一存者則今之古城又非漢之舊城又斷然可信焉作者以是之故曾親歷其地詳察周巡并諮詢故老莫得確證一日於城隅見有古井一所井大於常井兩倍磚堅厚異常磚色舊而紋理堅細洵古代物井水甘冽終日汲縵不停而取之不竭澄之不滓本地牧畜者均取汲不絕於道統計每日可供三五百牛馬之飲料亦神矣哉查張氏綏乘一書新受降城北有鵬鵠泉斯井也借非有名泉在下又烏能取不盡用不竭如此也其爲鵬鵠泉庶乎近之井以泉名則是城當爲新受降城也亦有足信者惟查唐書中受降城屢經河患李吉甫請於天德故城修新城李絳盧坦謂舊城當磧口據要衝得制匈奴上策又豐水美草邊防所利况天德故城僻處确瘠去河絕遠烽埃警急不相應接是無故而蹙國二百里也云云觀去河絕遠蹙國二百里之語則新城當在南河之南仍非今之古城可知總之漢唐無可考已河套淪陷在李

夏及遼金元代最久沿河設險必多立城堡堅壁樹柵以限戎馬惜書闕有間朔夷又不嫻紀載遂今湮沒無傳生千載下而欲詳蒐千載上之事蹟已非易易况又迭經淪陷典物金石銷沈掃地徒令文人學士披荆斬棘剔鮮掃苔考證無由良可慨也

#### 訪古城遺址

落日照頽垣晚晴鴉背翻春風墜麥秀秋雨野花繁  
城荒狐何憑社空鼠失穴何年重建築宏圖大式廓  
祠壇委荆榛市廛夷萊莽剩有鵬鵠泉終古發清響

#### 登狼居胥山

漢室喜開邊式廓大九有北征奮撻伐揚威禽夷醜票騎出雁門誓師椎牛酒單于遯精驍  
幕北戰雲黝天風浩莽吹破空播塵垢漢幟大合圍鐵甲突圍走七萬全軍墨降虜盡授首  
幕南無王廷烽烟靜刁斗大封狼居胥玉檢金泥剖告廟羣獻俘大勛集功狗戰征爲國際  
金石垂不朽

### 臨河縣志

#### 卷下

雜記

一六

#### 登高關塞

立扼單于吭坐繫白羊頸漢家重邊防龍旂高關擁  
雪花滿刀弓高關孔道衝爲爭國際位百戰足言功  
莫道陰山險天然關石門黃流東折處秦漢戰雲屯

#### 遊洪羊洞記

洪羊洞爲狼山古蹟之一徧考傳記廣攬圖冊其名不傳而土人嘖嘖盛稱之或以爲風景絕佳或以爲靈異昭著若以爲惟一之名勝十五年來余以匏繫一身未暇一往探之是亦憾事也戊辰七月臨邑解組借廛僑寓意致蕭閒九月中旬天高氣爽邀商會劉會長明卿于會長清泉建設局楊局長序東聯袂前遊時值夏歷中秋前野外秋田多稼黃雲萬頃年豐人樂田歌盈耳一路迤邐入狼山灣路折西行時則投止氈幕酪酒聯歡時則息駕山家鷄黍通款早起則朝嵐迎旭涼露濕衣晚眺則暮靄菴林斜陽掛樹西山爽氣挹人眉宇余年來簿書鞅掌塵垢滿胸一旦置身山水間令我萬慮皆空飄飄然有出塵之想余深喜此

行爲不負矣第三日抵阿貴廟廟係蒙人建距狼山灣二百餘里廟居半山峯廻處有喇嘛十餘與同行諸君子皆素稔據云洪羊洞距廟西三里許凡遊洞者皆借榻於此次晨沐盥訖各食炒米一撮奶茶一盞出廟兩喇嘛前導逾峻坂兩折見西面有陡崖如壁立高矗清冥洞門東向寬三尺許高六尺喇嘛導入中虛無一物面積方丈高下僅容中人軀西面有石門大如合簣喇嘛俯身導升勢如登坂始則偃僕若膜拜朝頂狀三十步後始得昂首進穴中石隙露微光僅辨階級但聞風聲狂吼人兢兢欲墜手捫兩壁石滑而膩階盡百級豁然開曠身已在石室中室無窗無門高二十尺寬廣面積方十五六尺東西有石罅穴透光線通空氣似人力鑿通者四壁石作赭色色鮮欲滴北有石佛高丈餘跌坐作大歡喜狀佛像上有巖泉直噴佛頂巔而下如瀑布如貫珠如醍醐之交灌無稍止息佛座下有窅井水瀉其中黝深不能測深淺據同行喇嘛稱此井通西藏兩日夜能往返言之容甚莊噫是誠喇嘛之言也知有西藏而已矣室四壁平削無斧鑿痕似純出天然者石隙風厲甚同行者均起粟凜乎不可久留遂由舊道而下至洞外東望距洞五百餘碼有懸崖高聳百丈崖半

## 臨河縣志

### 卷下

雜記

一七

有巨物縋懸形似長匣長丈餘粗如五石之甕以望遠鏡測之色黝黑似以鐵製兩端若以索縋繫確係崖外附屬物擬近前詳察奈中隔深澗怪石枒杈如虬蟠如虎蹲如筍排如劍豎同行者均不敢冒險而止返廟詢諸老年喇嘛據云相傳數百年來卽有此物樵獵者結隊紆道踪跡之終可望而不可近云云該地久隸蒙疆或係紅教中人故作覽勝術特矯揉造作以神其說歟未可知也余此行往返五百里需時十餘日尋幽攬勝暢然意滿所不足者摩崖掌壁剔蘚掃苔竟莫得一字之標記相與考證其事實始末是誠一大憾事也夫洞近狼山二百里地當要衝并非絕幽極深人跡不能至之區况狼居胥封山燕然勒銘下至受降築城二千年來必有王公大人宿將魁儒相與籌邊設險樹埃立屯爲之鋪烈揚功鏤金刻石以紀盛美而垂不朽卽洪羊洞亦必有名流之車塵馬跡流覽紀載垂諸文字以志形勝奈何縋險窮幽卽殘碑斷碣竟掃地無餘推其原因一則由於表功之觀平戎之銘必有發揚蹈厲犬羊醜虜之語彼族惡其無狀也蹈而去之亦固其所一則由於淪陷日久彼族故步自封迷信風水一草一木不敢輕動其視千里陰山皆其世守故物並不知保存古

物珍護文字爲何事所以陰山諸名蹟如榆塞長城高闕塞拂雲堆范夫人城均卓卓大者何至今無一字可考樵牧摧殘牛羊踐踏彼族當不復措意焉嗟嗟處窮荒絕塞聲教闕寂之地而欲探訪名勝遺文落落墜緒茫茫憑弔深之不禁感慨係之已

游洪羊洞

古崖嵌且岑 古洞窈而深 悠然遠塵囂 天風撼不禁

巖泉倒流冷 醍醐正灌頂 我佛空色相 悟激秋水影

石磴接天梯 一步一膜拜 同登歡喜地 靜觀大自在

榆塞懷古

聞道長城路 編榆已樹關 胡人同一哭 不敢度陰山

大河已南遷 陰積撤亭障 開關竟延敵 誰爲虎作倀

在昔重天塹 而今大無外 風會隨推移 何必論成敗

李陵碑考略

臨河縣志

卷下

雜記

一八

按李陵碑舊有兩說一則謂碑在宣大交界山畔一則謂碑在後套狼山畔查西漢武帝時匈奴數爲邊患陰山高闕塞左右爲入寇必經之路中朝命將出師往往踰雁代度朔方直薄陰山前後北暨瀚海時與北夷相馳逐李陵爲漢代驍將建旆從征揚威絕塞邊民受其保障立碑表功以誌紀念亦事有必至是碑在狼山山畔其說較有據也光緒末葉貽欽使來綏辦墾雅意訪求古蹟派員赴狼山灣一帶訪查洪羊洞李陵碑諸勝蹟歷時雖久均已確得其所在本邑士紳至今猶言之鑿鑿余於己巳冬月承乏縣志總編纂之席蒐采古蹟於李陵碑反復考查邑人士同聲稱爲在狼山深處至詢以碑在何處建自何年何人均瞠目莫應又詢之狼山土人又言人人殊大抵事誠有之惟不能確指其處耳余嗒然意沮者久之今春與友人李君聖三縱譚此事李君曰先生欲知李陵碑發現始末乎余爲貽欽使派查古蹟嚮導員之一當時同行委員二蒙員嚮導員二兵士四裹糧束裝由狼山西二百餘里之高闕塞自西徂東到處探蒐於阿桂廟山麓得探洪羊洞之勝又東進陟層巒踰疊嶂縋絕壁搜丹穴時而斬荆披棘時而攀葛附蘿迤邐東來備歷險阻直抵狼山口尙無蹤

兆同行者幾欲廢然返矣乃鼓餘勇東行二十里偶遇山畔牧豎詢之遙指東北十許里高巔有大碑屹立殆謂是歟當約牧豎同往瞻以重賞始踴躍前導途經羊腸凡三折坂而高峯矗前同人攀登蹂而上歷兩時許始躋其半有側坡方三丈中立碑高丈許闊四尺苔色斑斕字跡模糊窮盡目力僅辨爲李陵碑不署建立年月及人姓氏二千年古物惜爲風霜剝蝕其不至漫滅者幾何矣該山向無主名山口不通後山商路闕絕人跡地屬蒙旂當日未便特立標誌以故途雖已經而再至其處第見黃葉漫谷白雲迷徑如天台路迥桃源港斷此何怪土人故神其語目是碑爲或隱或現也乃閱時不久有自山中來者詢其碑則云已僵臥沙土是殆蒙人守閉關主義此疆彼界故步自封一則恐當道據碑爭界一恐外人自此遊覽不勝其煩故培而覆之必欲消沈之而後快究竟班班可考余固得諸目見者也云云聖三余之執友也亦當地之耆獻也言之足徵紀之以爲考古之一助爾顧或者曰執是說也何解於宣大間又有所謂李陵碑者然昭君墓綏區凡兩見何妨并存之以待博雅君子參考焉

### 臨河縣志

#### 卷下

雜記

一九

#### 李陵碑

|       |       |       |       |
|-------|-------|-------|-------|
| 誰教孤軍陷 | 將軍百戰空 | 漢家恩意薄 | 錄罪不錄功 |
| 誰與紀邊功 | 三軍悲路窮 | 殘碑沈沙漠 | 夕照野花紅 |
| 虜廷望陰山 | 豐碑矗天起 | 縱鐫百戰功 | 難洗千秋恥 |
| 英雄一失足 | 北廷拜夷虜 | 何年樹華碑 | 徧佔漢家土 |
| 胡騎將三萬 | 倒戈効血戰 | 碑畔夕陽紅 | 返照將軍面 |
| 巍然山中碑 | 愧對海上節 | 漢廷伸明罰 | 罪案定如鐵 |

#### 燕然勒銘懷古

一將功成萬骨枯戰功何庸大張鋪君不見小戎婦人思板屋石壕老嫗充軍徒又不見白骨高墳曲港岸碧血橫流長城窟月昏雲黑燐火聚新鬼故鬼悲嗚呼我輩同種本一家何忍肉薄相剪屠爭地爭城爭侯王威尊命賤爲前驅凌烟伊誰題名字雲臺何人列祠廡天子窮兵喜開邊多士紛紛擲頭顱華碑刻劃臣能爲天語褒嘉出中樞英雄盡入吾彀中藐

爾功狗盡庸奴功成戰士歸不得雪滿刀弓戍山隅我今登高尋片石斜陽古塞剩啼烏自古邊功不敵患戰場憑弔空歎歎

### 范夫人城懷古

漢家天子喜黷武陰山設險抗醜虜相其陰陽觀流泉邊城臺起維天柱雉堞左倚拂雲祠龍堆右襟燕然府削之平平築登登將軍經營心彌苦大功未成身先殂此事留待後人補崛起金閨夢裏人珠壘金墉精練組繡鞍有淚春愁多銀甲無聲夜光吐翟翬威懾憑城孤環珮聲伏出林虎十二瓊樓禁斗杓三千粉黛執桴鼓卸却金釧貫藥糧戰士瘡痍徧指撫聯得衆志可成城娘子軍威莫余侮雁門聲筋動地迴貳師長勝馳風雨夫人開關挫凶鋒屹如山立嚴卒伍兒女到此是英雄畫像雲臺饒媚嫵丈夫報國妻報夫名字無傳沙沈羽史官書勛有闕文巾幗芳聲壯千古

### 遊蒙旂各昭廟

勅建卽爲昭私建卽爲廟羈縻原多方神道以設教

## 臨河縣志

### 卷下

雜記

一〇

政府示優崇無上賚尊號輿服踰章制金碧飾廟貌

曠悍猛鷲氣寬裕溫柔道千族盡皈依大化不言造

天親夷土苴宗祧棄曇泡梵音達百里身如靈山到

### 北假戍考

按方輿紀要北假戍在廢豐州西北酈道元曰自高闕以東夾山帶河陽山以西皆北假也史記秦始皇三十三年使蒙恬渡河取高闕陽山北假中築亭障以逐匈奴漢書元帝初元五年罷北假田官按北假之義以地假民使各從事墾植也所謂陽山者卽陰山南向向陽之地山北爲陰山南爲陽非陰山外另有一山也查古黃河距陽山二三十里地傍山隈石骨草根不便耕作且隙地有限何能容多數人之耕種北假範圍當合故河南北之地言之是五原南部朔方北部均隸於北假也明矣

### 西受降城考

按西受降城在廢豐州八十里志云本漢朔方郡臨河縣舊理所唐景龍二年張仁愿置城

於此開元初爲河所圯總管張說於城東別置新城元初七年河溢城南面多毀壞八年振武帥李光進請修受降城兼理河防李吉甫請修治於天德故城李絳盧坦以爲舊城當積口據要衝得治匈奴上策又豐水美草邊防所利今避河患退二三里可矣奈何捨萬代久安之策爲一時省費之謀况天德故城僻處确瘠去河絕遠烽埃警急不相應接寇忽唐突勢無由知是無故而蹙國二百里也上卒用吉甫策於是西城遂廢惜哉又元和志西受降城在豐州西北八十里又有李華三城韓公廟碑序云

### 烏拉特旂諸泊諸泉考

按烏拉特中旂勒炳戈壁之北曰察汗泊曰烏蘭鄂博南北二泊曰孤吐魯烏蘇泊曰和碩山東泊在和碩山東曰那倫烏蘇泊在白英諾綠山北曰夾大廟山三泊在夾大廟兩山之間曰木倫沙河泊在一合戈壁之東曰恩格里泊在狼山西北麓古漁海也清一統志烏拉特下哈拍察齊泉在旂西四十五里藍泉在旂西九十五里臺泉在旂西北四十里插漢泉在旂西北五十五里克爾布泉在旂西北六十五里五藍拜星泉在旂西北九十里布各泉

## 臨河縣志

### 卷下

雜記

一一一

在旂西北九十八里冷泉在旂西北一百五里蒙古名魁屯杜窩勒泊在旂西一百十五里托博克蘇海泊在旂西北一百八十里魚海在旂西北一百里蒙古名札哈蘇台亦名魚兒海又謂之魚海子唐高適詩洗兵魚海雲迎陣是也今按諸泊共十有一而今圖烏拉特境內山北之泊亦十有一數相符也由此推之陰山以北泉泊星羅碁布無事可以興牧畜開渠道闢地利有事則到處水草甚便亦可供行軍之用於以見天下無廢地人自廢之天下無曠土人自曠之也用質之留心地理者

### 赫連夏故都考

按大清一統志鄂爾多斯旂隸於朔方郡地該地寧跳梁之北今名橫都城卽赫連之統萬城道光二十五年懷遠縣知縣何炳勳奉命往查統萬故城由縣西渡磨姑河又西水河又西渡無定河地勢漸高二里許至舊相傳之白土城細加相度在懷遠城正西九十七里黑水河在無定河東距縣五十里有淖泥河東入無定河之下流疑淖泥河爲古黑水其地有土城週圍三重俱用土築渡無定河西行二里許進頭道城又西半里許進二道城又西數

十武進三道城頭二道城內但餘瓦礫三道城內南面西隅鐘樓東隅鼓樓僅存基址堅築白土墩高五六丈無級可乘鐘樓尙堪登眺高約十餘丈白土築成雞籠頂式大厦一間半已圯其半懸鐘屋頂形迹宛然週圍飛欄八層插椽孔穴歷歷可數南面列土墩七堅硬如石似係臺樓之基北頭有白土坡似係宮殿之基東西兩角亦有土墩當卽俗所謂轉角樓者內城東西不及一里南北約一里有餘噫嘻以赫連夏當日志吞六合威懾八荒其力非不能驅萬民之力以營其城闕宮室其權非不能收一世之財以恣其游觀宴樂然且安於簡陋如是以視市井小夫忽而置身通顯脾睨自若興作從心崇墉百尺傑閣千重鐘漏未歇華屋變爲山丘長門鞠爲茂草其識量相度越夫豈可以道里計耶

#### 朔方臨河故城考

按朔方故城在五原東南北河南岸或謂什賁城漢置屬朔方郡又按臨河故城在朔方縣故城西北漢置屬朔方郡水經注河水自高闕南又東逕臨河縣故城北又南河東逕臨戎縣故城北又東逕臨河縣南按黃河北流逕故朔方之西行五百餘里一枝分爲二歧東注

### 臨河縣志

#### 卷下

雜記

一一一

水經所謂南河也其北河流至套外之阿爾布坦山南迤西溢爲大泊土名騰格里腦兒卽古屠申澤也自此屈而東流過古高闕南行二百里許稍東南流又折而西南與南河合水經所謂北河南屈逕河目縣左又南台南河是也始直向東行逕古五原之南至大土爾根河入河處始轉向東南行過古東勝州境以地勢測之臨河縣在北河之南南河之北水經所謂自高闕南而東逕故城北者北河也自臨戎縣北而東逕縣南者南河也

#### 漢度遼營考

按漢光武建元之季匈奴內訌互爭雄長八部大人立呼韓邪之孫比爲大單于歟五原塞願永爲藩蔽捍禦北虜光武許之詔立南單于於五原置中郎將以領之於是匈奴分爲南北二部尋詔徙南匈奴入居西河美稷南匈奴遂於北邊列置諸部王助漢扞戍北地自朔方至代郡皆由匈奴諸王領部衆爲郡縣偵邏耳目於是匈奴之衆遂與漢族雜處而啟五胡亂華之漸匈奴亦懼求和親不許時北匈奴數寇邊明帝時求互市漢廷冀其交通不爲寇許之遣鄭衆北使南單于知之頗懷嫌怨欲畔密因北使令遣兵迎之鄭衆疑有異徇得



之乃上言宜置大將軍以防二虜交通由是始置度遼營以中郎將吳棠行度遼營將軍事屯五原曼柏按南匈奴界自朔方而南北匈奴界自五原而北度遼營隔絕南北當在朔方五原兩界之交又查古臨河居朔方西北曼柏居五原南界度遼營當在曼柏臨河之交今之臨河北境高油坊之古城垣壘堅厚土色古黝非近代工作且近枕北河遙控狼山要口形勝天然或卽漢之度遼營舊址庶幾近之惜官書散佚碑碣無存徒使考古者登高憑弔良可慨也

#### 十六國都邑沿革考

五胡十六國遞嬗建置都邑多在山陝直豫地後先相望河套惟盛樂統萬城最稱古都其他劉虎建國曰鐵弗地在山西邊外及後套南部其後裔衛辰攻赫連勃勃不能克辰卒爲其下所殺勃勃奔薛干部按薛干爲匈奴別部雜處河套地郝連氏雄長諸部高視遠跋盡取河套地而有之遂建統萬城於河南其遺址在今之寧跳梁北卽土人呼爲橫都城是也

慈善門

庚午縣境賑捐募啟

敬啟者臨河僻處綏邊地曠人稀向恃墾植爲生計比年水利廢湮渠圯田蕪重以兵燹之頻遭遂至蓋藏之立盡又兼各路扣門乞糶絡繹舶輪求過於供輒告糧荒客歲春夏奇旱秋季兵災雖興東作未卜西成乃本境之饑民方思雁集外來之災黎又悲鴻嗷散處計二百里廣集至四萬衆處則穴居巖伏沐雨擲風行則兒啼女擗採藜掘藿始也草猶可茹登高作采薇之吟繼也樹已無皮比戶下繫桑之淚當是時也求嗟來其何地思蹴爾其誰人此真仁人君子目不忍覩耳不忍聞者已同仁等患忱剝膚誼切援手勉搜灰燼之餘同效纓冠之義公組臨河賑濟災民籌備會其大旨先就本地募糧散放急賑一面願乞各省各界廣發宏慈完成善果同仁等號呼奔走舌敝唇焦幸子敬好義指困無餘王蒼施仁傾囊不吝值此金穰而木饑欲思補瘡而剜肉亦可謂杯無餘瀝斗無顆粒者矣無如杯水莫救燎原寸壤難塞巨浸倘使後來不繼勢必前功盡虧是有數之饑民仍不得生恐無

臨河縣志

卷下

雜記

二四

數之饑民誰甘忍死鷹饑思搏鹿銜走險隱患何可勝言同仁等草杼短簡用代哀鳴伏懇

仁人善士  
達官長者 恢如傷之抱廣普度之仁

惠普發棠維多多其益善

恩周移粟喜喁喁其來蘇我數萬溝瘠千里涸轍舉延喘須臾引領企踵共盼

大澤之將至此則日夜馨祝而無已者也儻蒙

惠施請書

台銜

臨河創建育嬰堂募捐啟

粵維大學絜矩政在恤孤葵丘立盟道重慈幼古之人情殷少懷由來尙已後套地僻俗漓棄嬰之風相沿既久已成習慣或則菽水分甘棄諸草陌或因烽烟遁跡寄諸桑園猶可說也所不可解者富室大族不知出洗兒之錢祚薄門衰竟各出乳傭之值任婦女之嬌懶忘却十月呻吟聽肥字於牛羊何計三年懷抱謂人父謂人母自斬宗祧靡所依靡所瞻甘案

血系烏鳥尙知哺雛老牛且思舐犢愛子之心烏獸且有同情人何以堪此真百喙不能解其迷而破其惑者也同仁等惻然動念公同籌議擬建築育嬰堂一所惟一腋不能成裘端資羣集一木不能支廈要賴衆擎募來金光徧地天花散祇孤之園結到夏屋連雲落蔭免墮溺之劫出顧入復無父亦依抓棗覓梨不母可活按籍可考人人不昧所生普被無遺事均歸實際幼吾幼以及人之幼道在推恩親其親以及所不親理先保赤此真普渡之慈航宏濟之寶筏也儻荷慨助請書

台銜

臨河縣志

卷下

雜記

二五

贈別門

送彭縣長進吾先生有感

綜覽全局眷西土特簡賢良出大府景略謀猷穆之才參贊秘樞劍光吐平陸甘棠塞下移  
狼山潤灑如膏雨下車首先軫民瘼巡行郊垌問疾苦厲行團政壁壘新軌里連鄉嚴卒伍  
鶴唳無驚烽燧銷四民安居幸如堵君不見法明能懾當路狐威重足伏在山虎又不見自  
古致治起於鄉村政刷新重織組電政路政促并營交通如同履庭戶爨舍蠹起排雲開平  
民教育陶冶普經營民堡不日成從此我民不野處官書披覽宵旰勞起視霜天月正午政  
績報最上考書軍幕依之如肱股寵命下頒賀鶯遷士民旁皇心無主借寇一年志未償臥  
轍攀轅式歌舞來何暮兮去何速德政留待志乘補

紀異門

山市影談

長夏午夢初覺夕陽欲下偕二三同人延爽於古柳陰畔時則鳴蜩噤咽倦鳥歸巢披襟當風各道生平奇聞創見事余引聊齋山市記索解諸同人或以爲筆墨遊戲或以爲幻由心生或以爲借諷入市者之無色非空諸同人議論紛紜莫衷一是張君海瀾起而言曰諸君少安不必爭辯此紙上之異聞請靜聽我目中之怪狀本年四月余小住勝家營子經營農事一夕夜初晴長空如洗星月皎瑩余目無障物胸無宿芥登屋遠眺狼山迤西諸峯翠煙數點爽挹眉宇倏爾山麓雲氣迷漫層巒頓失突見危垣百仞高聳雲際西望綿亘七八里雉堞筍排恍見旂旌森樹甲士環立城樓上轟霄漢窮極壯麗城門出入人如蟻行如繩貫一炊黍時忽而雲烟萬狀化爲崇樓傑閣連棟接楹不知幾千萬落窗扉皆洞敞人或倚欄立凭牖伏傍檻坐平視則六街雲連九衢霧列朱簷連棟碧瓦覆甍有若坊者有若肆者有若堂者有若行棧者有若官廨者有若兵舍者人有若肩挑者有若背負者有若輦運而挾

臨河縣志

卷下

雜記

二七

持者百貨山積五金光眩車如水馬如龍轂相擊肩相摩酒帘飛揚書幌高揭五光十色錯采散綺萬縷炊烟高入青冥余神搖目炫略一停瞬忽而大風猝起雲氣蒼莽已而風定雲收一切烏有噫嘻奇觀哉其漢唐故城精氣未盡時而發現歟抑山氣蒸騰化爲幻象歟奇乎幻乎吾不得索其解吾其叩諸山靈

余太龍見記

大余太北倚陰山山綿亘數百里古稱天塹所以界中外防戎馬也其山皆軒豁呈露并無幽壑深淵可以窟穴神物也山勢環抱處往往蒙漢人聚族而居以耕以畝以樵以牧皆以爲常距余西五十里刀浪胡同地方於民十九六月十七日村有蒙婦汲於井是時也天地倏晦雲氣迷濛四布村人突見空際有物長數丈蜿蜒盤曲如星馳虹流向村際下垂村之人弱者屏足避強者瞠目視驚聞毒霧腥雨中村婦嗚呼聲尋寂然既天稍霽略可辨色循聲迹之去井里許硫磺氣刺鼻欲嘔知有異逼視之見蒙婦臥井畔井上翹巨首如五斗栳栳怒睛大於盃睽睽如巖下電角嶄嶄齒斷斷揚著噴沫鱗甲作淡金色曄曄有光頷以下

陷於井莫測其狀父老走相告曰此龍也夫龍之爲靈昭昭也乘乾健御陽剛孕於天池化於龍門朝遊蓬瀛暮遨滄溟上九天下九淵浩浩乎與雲作雨不崇朝而徧天下其功用抑何神也至其爲體也能大能小能屈能伸能隱能見能起能伏放之則氣吞八荒神遊六合斂之則蝸角可藏蟻睫可巢卽令潛而勿用亦能遵時養晦遯世無悶而不悔必不屑以一鱗一爪逐聲光於流俗當夫龍之墜於井也有譁爲怪者有詫爲妖者有卜爲祥占爲災者而龍如故也鼎熱香酒醜爵俎登肉諷經禮懺梵音琅琅聞十里鄉之人駭汗相屬於道而龍如故也蠅蚋嘍之螻蟻附之牧豎樵子姍笑之丈人韻士悼惜之而龍如故也遲之久遲之又久地氣升天氣降山澤通氣膚寸雲合遠山近樹陰沈審暗遙望井側濃烟絮霧中恍惚有鼓鬣張吻之狀倏見電光如匹練隨霹靂而下是時雲氣盈涌有大聲發於井上如三峽倒瀉萬騎驕嘶黃龍已扶搖直上天矯盤旋半隱現於空際當其昂首天外略一騰蹕山川震眩風雨晦冥奇情詭狀莫可方物已而雲斂日霽時百里內正苦炎旱忽而大雨滂沱農民頌神功不置神哉龍乎何不幸而不善藏身竟至墜落如斯也又何幸風雲際會終得

臨河縣志

卷下

雜記

二一八

克自振拔也嗟乎在天在淵或見或潛龍亦率性而遊任天而動而已矣古今來升沈顯晦之迹盍以龍爲鑒諸

附記

五原王紳同春行狀

民國八年春 文瑞 奉令卸五原任邑紳張君厚田等來署盛述王紳同春開闢河套殖我民族事蹟綦詳請爲文以狀之爰撮叙其崖略爲之狀曰按王君同春字濬川直隸行唐人幼負異稟嬉遊里巷不與羣兒伍人爭異之髫年隨其先德來河套縱覽周原嘗語人曰沃野千里何居乎蒙人自封自閉爲其有殖我民族之志固已夙矣於是攷求農牧實業孜孜不遑而其生平樂而不厭嗜而彌篤有與終身結不解之緣者厥惟水利同治十二年首先創開老郭渠光緒六年開哈拉各爾河嗣又開渠口至梅令廟五加河七年由和合源創開永和渠至補紅村十五年由老郭渠上游創開同和渠復由土城子開口接至同和渠改名義和渠渠長百餘里二十五年創開中和渠至五分子二十八年隨墾務督辦貽欽使週勘永豐剛黃沙義通長各大渠指導動合機要每有大工他人咋舌束手退避不遑者先生從容措置高下之宜向背之勢得失順逆之局均能測於幾先定於臨事一時造門請者得其片

臨河縣志

卷下

雜記

二九

言一語大用之大效小用之小效是其果操異術哉蓋其經驗有獨至者然也普通工作無論已遇有疑難大工俛而察仰而思面壁終夜臨流癡立慮其結而不解也以無厚之精心入之慮其膜之不破也以至銳之果力出之及夫豁然貫通直有覺上下通明踴躍狂呼雖南面王莫易此樂者何快如之昔張南通與先生談水利終日無倦容導淮大計先生力持導入海之議南通深韙其說識者惜其未見諸實行也當光緒末季蒙旗猶守閉關主義報墾之地寥寥先生長駕遠馭出全力闢地五千頃開大渠三道待以舉火者萬家其真能造福我民族民生者爲何如耶一旦盡奪其所有而歸於公先生視之如棄敝屣若此其器識又爲何如耶先生持平平等主義尙博愛好施予光緒十七八兩年地方告凶慨出糧萬餘石二十七年歲大饑慨出糧六千石賑之活人無算辛亥王爺地劉天佑之變蹂躪河套無完土晉軍全部軍糧數千石獨力任之此其樂善不倦爲何如耶按臨河未設治前地方悉隸於五原臨河當日農業水利何莫非我濬先生經營締造之所賜士食舊德農服先疇至今父老猶樂道之用附志乘以志不謬云